

## Fangkenio We Foatogiaen Luke

### *Fangkenio we Foatogiaen Luke*

<sup>1</sup> Aerhaengerhaeng Theophilus:

Aeremas towunap reoarhorho pwe repwe foatogi kkepessaen meeta kka a wewwen me neemaem.

<sup>2</sup> Iir ra foatogi meeta kka eitto ngaeniir me reer rho akka ra fasiun weri minikkeei me neerhaepetaen nge ra aepesa iiy kkepas mwamwaai we.

<sup>3</sup> Iwe een pwonno iga iya wori firhiy oanongaen minikkeei saengi pweoneotaen, iya niuwaennei pwe epwe mwamwaai pwe ipwe foatogi wunuunun aetettaeniin ngaeniug.

<sup>4</sup> Iya feori minnee pwe een wopwe giuneei gacchiuw minna wenewenen oanongaen meeta kkewe ra kapwiung ngaeniug.

### *Kkepessaen Wupwutiwen John Baptist*

<sup>5</sup> Noan oatowe Eroles eno pwe kingaen Judea, eno erhai patere itan Zechariah, iiy etapweei tettaenin patereen Abijah. Itaen rhoapwut na rhoan ngaenneyan nge Elizabeth; nge iiy epwan itto saengi eew faminiin patere.

<sup>6</sup> Iir me riiurhai nge eigin mwamwaai noan meneweer faaen mesaen Deus nge re tapweei gacchiuw oanongaen aaen Soamwoon anniug me akkiuneo.

<sup>7</sup> Iir esooar naiiur pwe Elizabeth ese mmwenen nainai, nge igina mwo nge ra igin tugufaeyi.

<sup>8</sup> Eraaen nge Zechariah a itinong feeori aan engang noan *Temple* we, pwe a toori oaton ginigin we aan epwe engang noan raaenin we.

<sup>9</sup> Noan peigin aaen engang patere, nge iiy minne ra fini pwe epwe fifi oappwongesaen wooan antar. Iwe a toonong noan *Temple* we aaen Soamwoon,

<sup>10</sup> nge rhooa towunap kkewe reno niugiun pwe re maeipin reen oatowe iiy e fifi oappwongas kkewe.

<sup>11</sup> Angkenus we naiun Soamwoon a pwae ngaeni, nge eiu peig mwaaenen antar we igiwe oappwongas we eno ee.

<sup>12</sup> Oatowe Zechariah a weri mwaaen we, a riu nge a mesag tae.

<sup>13</sup> Angkenus we a aengaeni pwe, “Wosoapw mesag, Zechariah! Deus a rongorong oamw maeipin, iwe Elizabeth we reemw epwene naini erhai aetemwaaen. Wopwe aeitae ngaeni pwe John.

<sup>14</sup> Epwene ifa mwo oamw wenepwu me pwapwa, iwe me aar aaemweoi wenepwu reen aan supwutiw.

<sup>15</sup> John epwene igin taegias me faaen mesaen Deus. Esoapw iun *wine* me aerhi. Saengi rhag aan wupwutiw epwene sseog reen Espritu Santus,

<sup>16</sup> nge iiy epwene pwiigiir towuneppeer re Israel ngaeni Soamwoon we aar Deus.

<sup>17</sup> Iiy epwe gommw me wenimmwaei Soamwoon, pwe e mamaaw pwe taeppen rhag profeta we Elijah. Epwe aesefaaeni fengaenniir saam me

naai pwe repwe eew rhag; iiy epwe wegiti sefaeniir rhooa serong feon ngaeni niunniywaen mwamwaai; nge epwe oamoannaar tae aeremas weni mmwaei Soamwoon.”

18 Zechariah a aengaeni angkenus we pwe, “Epwe ifa wusun nge iya giuneei pwe ennet minnee? Ngaang iya tugufaeyi, nge manna pwiuniwaei nge a pwan tugufaeyi.”

19 “Ngaang Gabriel,” mwaeniaen angkenus we. “Ngaang iyu weni mmwaen Deus, iwe iiy minne efang ngaang pwe ipwe pwigito kkepas mwamwaai een reemw.

20 Nge een wose niugiuniug ngaeni mwaeniaei, nge minnee epwe noa pwaetae minna wenewenen noan oaton naan. Iwe nge iga wose niugiuniug, een wosoapw mmwenen kkepas no; wopwene anniug noa rhag toori aan itto iiy raaenin na iya fasiun ppwoneei ngaeniug.”

21 Noan oateei nge aeremas rewewweti Zechariah nge ra niunniywaennei aere meeta a igin itinong pwongiy noan *Temple* we reen.

22 Enoa toowow, nge esa mmwenen kkepas ngaeniir no, nge ra giuneei pwe eyor minne a itinong weri me noan *Temple* we. Igiwe esa mmwenen kkepas no, iwe a taenepom ngaeniir rhag.

23 Oatowe a moanno noa engaang we aan noan *Temple* we, Zechariah a sefaaen noa nee iimw.

24 Enoa eew oaton nge Elizabeth a pwoopwo nge a no rhag nee iimw noan nimowu meram.

25 “Ennaen igina minne Deus a tipaengiaei,” mwaeniaen niewe. “A arhiuwa saengiaei aessaewaei me neeiir rhoanap!”

### *Kkepesaen Wupwutiwen Jesus*

<sup>26</sup> Noan oawonowuwaen meremaen Elizabeth Deus a fangetiw angkenus we Gabriel noan eew aepinoamwon Galilee itan Nazareth.

<sup>27</sup> Eyor eew aan kkepesaen oarong ngaeni erhai rhoopwut a kkefoat ngaeni mwaaen we itan Joseph, iwe itto saengi teo we aan *king* David. Itan nge Maria.

<sup>28</sup> Angkenus we a itto reen niewe nge a iura pwe, “Oapoas epwe no reemw! Soamwoon eno reemw nge a aewenepwuwoag.”

<sup>29</sup> Maria a gin riutae reen miniwe mwaeniaen angkenus we, nge a niuwaennei meeta faan iiy kkepas kkewe.

<sup>30</sup> Angkenus we a aengaeni niewe pwe, “Wosoapw mesag, Maria; pwe Deus minne eigin mwamwaai ngaeniug.

<sup>31</sup> Wopwene pwoopwo nge wa nainitiw erhai aetemwaaen, nge wa aeitae ngaeni pwe Jesus.

<sup>32</sup> Epwe igin taegias nge epwe ffai pwe iiy naiun Deus na oarosaen taegias. Soamwoon Deus epwene feeori pwe iiy *king* taeppen rhag David we aan rhaepeto,

<sup>33</sup> nge epwe no pwe *king* reen teo we aeen Jacob oanongaen oat; minna mweoiun ina esooar aigiugiun!”

<sup>34</sup> Maria a aengaeni angkenus we pwe, “Ngaang erhai piirgo. Epwe ifa wusun rhag nge a mmwen minnee?”

<sup>35</sup> Angkenus we a iura pwe, “Espritu Santus epwene ittiw woamw, nge minna kkaeinen Deus ina oarosaen taegias a no woamw. Nge faaen minnee nge aetena esooar epwene ffai pwe Naiun Deus.

<sup>36</sup> Womaengiy rhag Elizabeth we re pwugusoamw? Iwe reiura pwe esoapw mmwenen nainai no, nge igina nge a wonowu mereman, inamwo iga a igin tugufaeyi.

<sup>37</sup> Pwe esooar eew meeta ne Deus esoapw mmwenen feeori.”

<sup>38</sup> “Ngaang erhai naiun Soamwoon rhooran akki-uneo,” aalen Maria iura. “Nigiti pwe epwe wen ngaeniaei petenaen kkepas mwu wa iura.” Iwe angkenus we a siusaengi niewe.

### *Maria a Noa Emwaeri Elizabeth*

<sup>39</sup> Ese mmwaei mwo me weni mwirin nge Maria a oamoannatae epwe mwekkaei noa reen eew aepinoamw eno neeiin rhugun Judea.

<sup>40</sup> A noa reen imwaen Zechariah pwe epwe noa koapwong ngaeni Elizabeth.

<sup>41</sup> Igiwe Elizabeth a rongorong aalen Maria koapwong nge aetewe naiun a mwagiut me noan upwan. Elizabeth a sseog reen Espritu Santus

<sup>42</sup> iwe a aekkepwas faeregiti tae nge a iura pwe, “Een minne wa oarosaen wenepwu me neeiir rhoapwut, nge epwan wenepwu aetena wopwe naini!

<sup>43</sup> Meeta ppweoniun aalen min mwamwaai eei aan epwe itto wen ngaeniaei, iye nie inaan soamwoon a itto sengaeriaei?

<sup>44</sup> Pwe igiwe rhag i rongorong oamw koapwong, iwe nge aete noan upwaei a mwagiut reen aalen kker.

<sup>45</sup> Ifa mwo oamw kker pwe wa niugiuw pwe kkepas we aalen Soamwoon ngaeniug nge epwe nnet noa!”

### *Aalen Maria Keoniun Aepingeping*

46 Maria a iura pwe,  
 “Nee tipaei a aepingepinga Soamwoon;  
 47 ngeoniuy apwapwa pwe aegin Deus iiy aaei  
 Rhooan Aemenaw,  
 48 pwe iya maengiaei ngaang naiun rhooan akki-  
 uneo man sessoan!  
 Saengi igina oanongeer aeremas nge repwene  
 faingiaei pwe ngaang wenepwu,  
 49 pwe reen min mwamwaai kka Deus na  
 oarosaen kkeman a feeori ngaeniaei.  
 Minna itan ina essoar;  
 50 saengi eew me eew saaer epwaeri aan ffayeo  
 ngaeniir rhooan oassoara.  
 51 A aeiti noa paiun na e kkeman  
 nge e oamwotoraar noa rhooana re namanam tae-  
 gias noan aar niunniuwaen.  
 52 A oatoraar tiw *king* kka re mamaaw me woan  
 nenien mooatoor,  
 nge e saeregiir tae ikka re sessoan.  
 53 A oamwongoor rhoa pecchai ngaeni min  
 mwamwaai,  
 nge a aefengaar noa rhoa pisaegisaeg nge esoar  
 oawton paiur.  
 54-55 Iiy eammwarhiuto rhag ppwon we aan  
 ngaeniir rhoawe rhaepetorh,  
 nge a itto pwe epwe fang tipaengieer rhoawe re  
 Israel iwe naiun rhooan akkiuneo.  
 Iiy e maengiy rhag pwe epwe pwaeri ffaayeo we  
 aan ngaeni Abraham  
 me oanongeer rhooan teowe aan iwe esoar  
 iaenin!”  
 56 Epwe enuuw meram aeen Maria no aegini  
 reen Elizabeth nge a sefaaeniti pwugusan.

### *Wupwutiwen John Baptist*

<sup>57</sup> Enoa tooto oatowe Elizabeth epwene nainai, nge a timenewaegini erhai aetemwaaen.

<sup>58</sup> Rhoan weni oaron me rhooa kkewe repwugusan ra rongorong ifa mwo aaen soamwoon mwamwaai ngaeni, iwe iir ra maegin tapweei reen aan pwapwa.

<sup>59</sup> Igiwe aetewe a eew *week* aan no, ra itto repwe *circumcise* aegini, nge repwene aetae ngaeni pwe Zechariah, aeiteitaen mwaaen we seman.

<sup>60</sup> Nge rhoapwut we inan a iura pwe, “Aapw! Epwe itaeni John.”

<sup>61</sup> Nge ra aengaeni niewe pwe, “Aetae esooar re pwugusoamw ne e ina itan!”

<sup>62</sup> Nge iir ra taenepom ngaeni mwaaen we seman, meeta e mwerhaen pwe aetewe epwe itaeni.

<sup>63</sup> Zechariah a tingoar eew pwapwior nge a foatogitiw pwe, “Itan nge John.” Ifa mwo aar riutae rhoawe!

<sup>64</sup> Reen oatonaan rhag nge Zechariah a mmwennen kkepas, a rhaepetae aan aepingepinga Deus.

<sup>65</sup> Rhoan no oaroor ra igin mesag, nge kkepesaen minikkeei a rheei noa woan rhugun aepinoamwon Judea.

<sup>66</sup> Rhoan rongorong kkepas we ra gaen ni-unniuwaennei nge ra aeiweg pwe, “Meeta aetei epwene no pwe iiy?” Pwe igiwe epwae noa pwe maemaewaen Soamwoon eno woan.

### *Aaen Zechariah Woowo*

<sup>67</sup> Zechariah we semaen John a sseog noa reen Espritu Santos, nge a aepesa wow kkepesaen oarongorong we aaen Deus:

68 “Sipwe aepingepinga Soamwoon iwe aaen Israel Deus!

A itto epwe fang tipaengiaen naiun aeremas nge aessaenetaegiir noa.

69 A fang ngaenigirh naiurh rhooran aemenaw eigin kkeman,  
rhooran teowe aaen David iwe naiun rhooran akki-  
uneo.

70 A ppwon ngaeniir profeta kkewe mweoiwe

71 pwe iiy epwe aemenewaegirh saengiir rhooran  
kkoapwut ngaenigirh,  
saengi maemaeweer rhoakkena reaeni giirh  
aeffaeioapwut.

72 Eiura pwe epwe pwaeri ngaeniir rhoakkena  
rhaepetorh ffaiyeo  
iwe me e maengiy ppwon ssoar we aan.

73-74 Noan aan aekkepan ngaeni Abraham we  
rhaepetorh

iiy eppwon pwe epwe aemenewaegirh saengiir  
rhooran oapwutaegirh,  
iwe nge enigiti ngaenigirh pwe sisoapw mesag  
noan aarh engaang ngaeni,

75 pwonno giirh sipwe ssoar nge si mwamwaai me  
weni mmwan  
noan oanongaen raaenin aarh menaw.

76 “Een naeyi, wopwene ffai pwe profeta we naiun  
Deus na oarosaen taegias.

Een wopwene mmweei Soamwoon wopwene  
oamoannatae ennepan,

77 wopwe aengaeniir naiun aeremas repwene  
menaw igine emwus noa monofitiir.



78 Naiurh Deus ina e sseogiun ffayeo nge etip mer-  
erhaeg.

Epwe feeori pwe seremaen menaw epwe ttinitiw  
woorh

79 nge seremaen wooan naaeng epwe ttin noa  
woor rhooa no noan rorhappiungiun  
maenoa,  
pwe epwe aeitiiti mesaen gupworh noan en-  
nepaen oapoas.”

80 Iwe a temoag tae aetewe iwe a mamaaw noa  
oanongan me ngeoniun. Iwe a no noan *desert* we  
e toori noan raaenin we a pwae ngaeniir re Israel.

## 2

### *Wupwutiwen Jesus* (*Mat 1.18-25*)

1 Noan oatonaan nge Soamwoonin Rome we  
Augustus a akkiuneo pwe epwe yor paaepaen  
fainaaw noan oanongaen faniuw kka nemaeni-  
aen Rome.

2 Reen igiwe aeyewaen paaepae a rhaepetae nge  
Quirinius minne eno pwe *governor* reen Syria.

3 Erhai me erhai nge enoa foatogi itan reen aan  
taeninimw.

4 Joseph a noa saengi Nazareth noan Galilee a  
noa ngaeni Bethlehem noan Judea, igiwe esiup-  
wutiw *king* David me ee. Joseph a noa igiwe pwe  
igiwe iiy teoteeon David.

5 A noa pwe enoa foatogi iteer me Maria,  
rhoopwut we a no pwe kkefoaton. Niewe a  
pwoopwo,

6 oatowe reno Bethlehem, a toori oaton aan  
supw aetewe naiun.

7 Niewe a timenewaegini aetemwaaen we mesaemmwaei naiun, nge a tiugiumi nong noan mengaag nge eoana nong noan miniwe nenien anan maan, pwe igiwe esooar no nenieer me noan imwaen waseona we.

### *Rhoan Neginegin Sheep me Angkenus Kkewe*

8 Eyor aekkaerhai rhoan neginegin *sheep* reno wooan menaai neepwoong re aefaenniir naiiur maan. 9 Erhai naiun Soamwoon angkenus a pwae ngaeniir, nge nningen Soamwoon a ttinitiwoor. Ra igin mesag,

10 nge angkenus we a aengaeniir pwe, “Oaw-soapw mesag! Ngaang iya pwigito eew kkepas mwamwaa reemi, kkepas een epwe pwigito eew kker temoag ngaeniir oanongeer aeremas.

11 Raaenin eei noan aepinoamw we aepinoamwon David rhoan aemenaw we aaemi a supw—Kristus we Soamwoon!

12 Ieen minne epwe aniugiuniugiuw ngaeni-gaemi: oawpwe noa rhuungi erhai wonigaet e tiugiutiug noan mengaag nge ewon noan nenien anan maan.”

13 Ese mmwaei mwo nge eew mwirhaen angkenus a pwae noa me oaron angkenus we erhai, ra aepingepinga Deus noan aar keon:

14 “Sia fang ssoar ngaeni Deus na eno woai naaeng,

nge oapoas enoa ngaeniir rhoakkena emwamwaa nee tipan woar!”

15 Oatowe angkenus kkewe ra nigitiir ra sefaaen noa naaeng, rhoan neginegin *sheep* kkewe ra

kkepas fengaen nee fineer pwe, “Sa noa Bethlehem sipwe noa weri meeta minne a wen, minne Soamwoon a aengaenigirh.”

<sup>16</sup> Iwe ra siu mwetekkaei noa me igiwe, nge ra noa weri Maria me Joseph iwe nge reweri wonigaet we ewon noan nenien anan maan.

<sup>17</sup> Oatowe ra weri aetewe, nge ra aengaeniir rhoowe meeta we angkenus e iura reen aetewe.

<sup>18</sup> Oanongeer iyo kkewe rerongorong miniwe nge ra mwaar reen miniwe mwaenieer rhoowe rhoaan neginegin *sheep* kkewe.

<sup>19</sup> Maria a maeng ngaeni oanongaen minikkeei nge a niuwaennei nong rhag nee tipan.

<sup>20</sup> Rhooan neginegin *sheep* ra sefaaen, nge ra aepingepinga Deus reen igiwe meeta kkewe ra rongorong nge ra weri; nge taeppen rhag miniwe angkenus we a aengaeniir.

### *Ra Aeita Jesus*

<sup>21</sup> Enoa eew *week* wenimwirin, reen oatowe aetewe epwene *circumcise*, ra aeita ngaeni pwe Jesus, itiwe angkenus a fasiun ngaenneer weni mmwaen aan supw.

### *Ra Pwigi Noa Jesus Noan Temple we*

<sup>22</sup> A toori oatowe Joseph me Maria repwe feeri eew pwaengepwaengin aenimenim, pwe ina miniwe oasoapwosoapw we aaen Moses e aepesa. Iwe ra pwigi noa aetewe Jerusalem pwe repwe noa pwaeri ngaeni Soamwoon,

<sup>23</sup> pwe ina miniwe effoat noan oasoapwosoapw we aaen Soamwoon pwe, “Oanongaen mesaemmwaai naiiur aetemwaaen nge repwe aeyimweoiur ngaeni Soamwoon.”

<sup>24</sup> Ra pwai noa pwe repwe noa aeni maenigaech riiurhai *dove* aere riiurhai aeppaen *pigeons*, pwe ina miniwe e fasiun no noan oasoapwosoapw we aaen Soamwoon.

<sup>25</sup> Noan oatonaan nge eno erhai mwaaen itan Simeon eno noan Jerusalem. Iiy erhai mwaaen reepiy nge emwamwaa noan menewan nge ewewweti oatona epwe cchipw Israel. Espritu Santus a teotiw woan

<sup>26</sup> nge a anugiuniugiuw ngaeni pwe iiy esoapw mae weni mmwaen epwe weri Kristus we Soamwoon e ppwoneei.

<sup>27</sup> Espritu Santus a paeni Simeon a itinong noan *Temple* we. Oatowe rhoawe inan me seman ra pwigito goagoa we noan *Temple* we pwe repwe feeori ngaeni meeta we oasoapwosoapw e iura,

<sup>28</sup> Simeon a ammwarihu aetewe noan paiun nge a fang aerhigerhig ngaeni Deus:

<sup>29</sup> “Igina Soamwoon, een wa iseni ppwon we oamw, nge wa mwiuti ngaeni noawumw rhoaan akkiuneo pwe epwe noa noan oapoas.

<sup>30</sup> Iya weri ngaeni mesaei oamw engaengaen menaw,

<sup>31</sup> iwe een wa oamoannatae me weni mmweer oanongeer aeremas:

<sup>32</sup> eew seram epwe pwaeri ngaeniir re Gentiles mwerhaen na oamw iwe me pwigito nning ngaeniir noawumw re Israel.”

<sup>33</sup> Rhoawe inan me seman aetewe ra mwaar reen meeta kkewe Simeon e iura reen aetewe.

<sup>34</sup> Simeon a aepiniir nge a aengaeni Maria, iwe inaen aetewe, “Aeteei a ffin tae me reen Deus pwe epwe ootoaropa nge e aemenewaer towunepaen

re Israel. Iiy epwe no pwe eew aeginn me reen Deus pwe towunepaen aeremas repwe appani-uwaeni noan aar kkepas,

<sup>35</sup> iwe a pwaeritae noan niunniuwaen mwoanomwoan kena aar. Nge niemaam eweei kaengin saeitan, epwe fereei pwunnomw.”

<sup>36-37</sup> Eno erhai profeta tugufaeyi itan Anna nge a mae noa pwiuniuwan. Nge iiy naiun Phaniel saengi aeinang we aaen Asher. Fisuuw raeg aan pwiuppwiuniuw nge emae noa pwiuniuwan. Nge igina a waniig me faawu raegin. Iiy ese nigiti *Temple* we; pwoong me raaen nge e aesirowu noa rhag Deus, e aecchigipin nge e memmaeipin.

<sup>38</sup> Noan rhag awa we e tooto nge a fang aerhiger-hig ngaeni Deus nge a fioangei mmwenen aetewe ngaeniir oanongeer rhooa kkewe re iya wetiwet ngaeni Deus pwe epwe saeneti noa Jerusalem.

### *Ra Sefaaen Ngaeni Nazareth*

<sup>39</sup> Igiwe Joseph me Maria ra moannon feeori minikkewe eno noan anniug we aaen Soamwoon, nge ra sefaaen ngaeni miniwe aepinoamwoor iwe Nazareth me noan Galilee.

<sup>40</sup> A tootae aetewe nge amamaaw noa, nge a sseog noan reepiy nge Deus a no woan.

### *Aet we Jesus me Noan Temple we*

<sup>41</sup> Oanongaen raeg nge rhooawe inaen me seman Jesus ra noa Jerusalem pwe repwe noa tapweei gupwunon *Passover* we.

<sup>42</sup> Oatowe a seig me ruwowu raegin Jesus nge ra noa tapweei gupwun we taeppen rhag miniwe regaen feoffeori.

<sup>43</sup> Enoa moanno noa gupwun we, rhooawe ra sefaaen noa neepwuguseer, nge Jesus a notiw noan Jerusalem. Rhooawe inan me seman rese giuneei minneei;

<sup>44</sup> iir re niuwaennei pwe eno reer rhooanap we, iwe eraaen nniuw aar nennoa nge a rhaepetae aar kiukkiutta fetaeneei aetewe me neeiir aei oaroor me maereyaereer.

<sup>45</sup> Nge iir rese weri, iwe ra sefaaen noa giutta me Jerusalem.

<sup>46</sup> Wooan ayeoniuraenin aar giut nge ra noa weri me noan *Temple* we, emooat neeiir sinsein Jews kkewe, e aiussaening ngaeniir nge e kekkepas aeiineo ngaeniir.

<sup>47</sup> Oanongeer rhooa kkewe re rongorong mwae-nian nge remwaar noa reen aeseaaenin kkepas aeyeg kkewe aan.

<sup>48</sup> Rhooawe inan me seman re riutae reen igiwe ra noa weri, iwe nge rhoopwut we inan a aen-gaeni pwe, “Naeyi, meeta wa feeri ngaenige-maem minneei reen? Pwe ngaang me mwaaen e semoamw aeiya gin noanineeng reen aemaem giutta fetaeneog.”

<sup>49</sup> Nge iya paniuwaeniir nge a iura pwe, “Meeta aaemi oawnoa giutta fetaeneaei reen? Oawse giuneei pwe ngaang ipwe no noan imwaen minna Semaai?”

<sup>50</sup> Nge iir rese metaf reen miniwe e iura.

<sup>51</sup> Iwe Jesus a tapweei sefaaeniir noa Nazareth, nge a noa aiussaening ngaeniir. Miniwe inaan a iseni nong rhag oanongan nee tipan.

<sup>52</sup> Jesus a temoag tae wooan oanongan me aan reepiy me temoagon rhaengiin me reen Deus me

aeremas.

### 3

#### *Aaen John Baptist Fenai*

*(Mat 3.1-12; Mark 1.1-8; John 1.19-28)*

<sup>1</sup> Noan miniwe seig me nimowu raeg aan Soamwoonin Rome we Tiberius nemenem, nge Pontius Pilate minne *governor* reen Judea, nge Eroles minne soamwoonin Galilee, iwe nge Philip we pwiin minne soamwoonin faniuwaen Iturea me Trachonitis; iwe nge Lysanias minne soamwoonin Abilene,

<sup>2</sup> iwe nge Annas me Caiaphas minikka Patere taegias—noan oatonaan nge Deus a fang to kkepas reen John iwe naiun Zechariah me noan *desert* we.

<sup>3</sup> Iwe John a noa fenai fetaen noan faniuwaen rhan pwupwu na Jordan, “Toagun saengi monofitimi nge oawpwe paptismus, ina nge Deus epwe saeneti noa monofitimi.”

<sup>4</sup> Miniwe effoat noan pwapwior we aaen profeta Isaiah pwe:

“Erhai aeremas e iyaekkepwas me noan *desert* we nge eiura pwe:

‘Oawpwe oamoannatae ennepaen Soamwoon; oawpwe awenecchera eew aan pwe epwe faeraeg woan!

<sup>5</sup> Oanongaen mwoattotiw nepetaen rhug nge sipwe oawutaeni tae, oanongaen taeiit me rhug nge epwe soan eew noa rhag.

Oanongaen aan pwoar nge epwe aewwen noa,

oanongaen aan toarumwrumw nge epwe arhan-  
 nenoa.

<sup>6</sup> Oanongeer aeremas nge repwe weri menaw na  
 Deus epwene fangetiw!”

<sup>7</sup> Aeremas towunap ra maeg wow reen  
 John pwe epwe noa paptismus aeginiir. Nge  
 a aengaeniir pwe, “Aaemi sowufaeng! Iyo  
 e aengaenigaemi pwe oawpwe mmwenen  
 kkewaeg saengi aalen Deus aegaeregaer iga epwe  
 aefengato?

<sup>8</sup> Oaw ssiuweniy wegitaegimi pwe epwe pwaeri  
 noa pwe oawwa toagun saengi monofitimi. Oaw-  
 soapw niunniuwaennei pwe oawwa taaw saengi  
 aalen Deus aegaeregaer reen aaemi aepesa pwe  
 Abraham minne rhaepetomi. Ngaang ipwe aen-  
 gaenigaemi, pwe Deus emmwenen feori faai  
 kaan pwe tettaenin Abraham!

<sup>9</sup> Eew soapaen a oamoannatae pwe epwe gopiy  
 tiw waniwan saengi waeran. Oanongaen wani-  
 wan kka ese gacch uwaan nge epwe gopogop tiw  
 nge e aekkaerh nong noan aengaet.”

<sup>10</sup> Aeremas ra aeiineow pwe, “Meeta minne  
 aeipwe feori?”

<sup>11</sup> A paniuwaeniir pwe, “Iyo na riiuwapeo  
 mengaagiun nge epwe fangenoa epeo pwe men-  
 gaagiun manna esooar mengaagiun, iwe nge iyo  
 na eyor mwongo reen nge epwe fang ngaeniir  
 aaemweoi.”

<sup>12</sup> Aaemweoi rhoaan iyoiyon *tax* reitto pwe  
 repwe paptismus, iwe nge ra aeiineow pwe, “Sin-  
 sei, meeta aemaem aeipwe feori?”



<sup>13</sup> Nge iiy a aengaeniir pwe, “Oawsoapw iy-oiy *tax* temoag saengi minna eno noan oasoap-wosoapw.”

<sup>14</sup> Aaemweoi sonotaw ra pwan aeiineow pwe, “Iwe nge aemaem? Meeta aemaem aeipwe fee-ori?”

Nge a aengaeniir pwe, “Oawsoapw pweipwog senaapiy saengiir aeremas noan amamaaw ngaere oatupwutupw tae kkepas woan erhai. Oawsoapw tipinap saengi minikkena paniuwaemi noan engaang.”

<sup>15</sup> Aar aepiniugiuniug aeremas a tettemoag noa reen miniwe mwaenian, iwe nge a rhaepetae aar niunniywaennei ngaere teorh maeni pwe John minne Kristus.

<sup>16</sup> John a aengaeniir oanongeer noa pwe, “Ngaang iya paptismusaegaemi reen rhaan, iwe nge erhai ina epwe itto nge e taegias me mmwaei. Ngaang mwo nge ese fin ipwe pwaeisi geeogeeon nokkaan. Iiy epwe paptismusaegaemi ngaeni Espritu Santus me aengaet.

<sup>17</sup> A kkemwarh aan sepwin pwe epwe aey-imweoiuw fesaengiy faiun saengi peeon. Iwe, epwe ioni fengaenniy faiun nge a iseni nong noan aan imwaen iseis, nge peeon epwe oatoranong noan aengaet we ese mmwenen gunnoa.”

<sup>18</sup> Etowunap mesemesaen aaen John fenaiuw Kkepas Mwanwaa iwe ngaeniir aeremas nge eaemaemaewa ngaeniir pwe repwe ssiuweniy meneweer.

<sup>19</sup> Iwe nge John a soong ngaeni *Governor* Eroles, pwe igiwe e rhoan ngaenne aeni Herodias, iwe

rhooan ngaenneyaen mwaaen we pwiin, iwe me igiwe e towunap min aenneew kkewe efeeri.

<sup>20</sup> Iwe egius mwo nge Erotas a faer gin feeori aenneewa noa pwe a iseni nong John noan kanepwus.

*Aaen Jesus Paptismus*  
(*Mat 3.13-17; Mark 1.9-11*)

<sup>21</sup> Mwirin aar oanongeer aeremas paptismus, Jesus a pwan paptismus. Nugunupaen aan maeipin nge a susu noa naaeng,

<sup>22</sup> iwe nge Espritu Santus a ittiw wooan eweei rhag erhai *dove*. Iwe nge eew mangiungiu a ittiw me noan naaeng nge a aepesa pwe, “Een naeyi mwaaen aerhaengerhaeng. Iye efin tipaei reen.”

*Rhaepeto Kkewe Aaen Jesus*  
(*Mat 1.1-17*)

<sup>23</sup> Oatowe Jesus a rhaepetae aan engaang, nge a eniig raegin. Aeremas reniuwaennei pwe iiy naiun Joseph, iwe naiun Heli,

<sup>24</sup> iwe naiun Matthat, iwe naiun Levi, iwe naiun Melchi, iwe naiun Jannai, iwe naiun Joseph,

<sup>25</sup> Iwe naiun Mattathias, iwe naiun Amos, iwe naiun Nahum, iwe naiun Esli, iwe naiun Naggai,

<sup>26</sup> iwe naiun Maath, iwe naiun Mattathias, iwe naiun Semein, iwe naiun Josech, iwe naiun Joda,

<sup>27</sup> iwe naiun Joanan, iwe naiun Rhesa, iwe naiun Zerubbabel, iwe naiun Shealtiel, iwe naiun Neri,

<sup>28</sup> iwe naiun Melchi, iwe naiun Addi, iwe naiun Cosam, iwe naiun Elmadam, iwe naiun Er,

<sup>29</sup> iwe naiun Joshua, iwe naiun Eliezer, iwe naiun Jorim, iwe naiun Matthat, iwe naiun Levi,

<sup>30</sup> iwe naiun Simeon, iwe naiun Judah, iwe naiun Joseph, iwe naiun Jonam, iwe naiun Eliakim,

<sup>31</sup> iwe naiun Melea, iwe naiun Menna, iwe naiun Mattatha, iwe naiun Nathan, iwe naiun David,

<sup>32</sup> iwe naiun Jesse, iwe naiun Obed, iwe naiun Boaz, iwe naiun Salmon, iwe naiun Nahshon,

<sup>33</sup> iwe naiun Amminadab, iwe naiun Admin, iwe naiun Arni, iwe naiun Hezron, iwe naiun Perez, iwe naiun Judah,

<sup>34</sup> iwe naiun Jacob, iwe naiun Isaac, iwe naiun Abraham, iwe naiun Terah, iwe naiun Nahor,

<sup>35</sup> iwe naiun Serug, iwe naiun Reu, iwe naiun Peleg, iwe naiun Eber, iwe naiun Shelah,

<sup>36</sup> iwe naiun Cainan, iwe naiun Arphaxad, iwe naiun Shem, iwe naiun Noah, iwe naiun Lamech,

<sup>37</sup> iwe naiun Methuselah, iwe naiun Enoch, iwe naiun Jared, iwe naiun Mahalaleel, iwe naiun Kenan,

<sup>38</sup> iwe naiun Enosh, iwe naiun Seth, iwe naiun Adam, iwe naiun Deus.

## 4

### *Sessoaton Jesus*

*(Mat 4.1-11; Mark 1.12-13)*

<sup>1</sup> Enoa sefaaeneto Jesus me reen pwupwu we Jordan nge a sseog noa reen Espritu Santus iwe nge Espritu Santus a paeninoa noan *desert*,

<sup>2</sup> nge Saetan a noa soatoni me ee noan faaeig raaen. Noan oanongaen raaenin kkewe nge ese mwongo, ina miniwe a meyaefi pecchai reen.

3 Saetan a aengaeni pwe, “Ngaere een Naiun Deus, wopwe aengaeniir faai kaan pwe repwe ssiuwen ngaeni fenoawa.”

4 Jesus a paniuwaeni pwe, “Pwapwior we eSantus eaepesa pwe, ‘Saapw fenoawa rhag minne aeremas repwe menaw reen.’”

5 Iwe Saetan a pwigitae weeinaaeng nge a noa pwaeri ngaeni reen rhag eew oat oanongaen mweoi me noan faeinaengiy.

6 Saetan a aengaeni pwe, “Ipwe ngaenneog oanongaen mamaaw kkeei me oanongaen mmwen kkeei. Oanongaen nge nemaeniaei, nge ipwe fang ngaeni iyo iye tipaei ipwe ngaenneei.

7 Oanongaen minikkeei nge epwe no pwe oamw igine wopwe oassotupw ngaeniaei.”

8 Jesus a paniuwaeni pwe, “Pwapwior we eSantus e aepesa pwe, ‘Wopwe oassotupw ngaeni Deus na oamw Soamwoon nge iiy rhag wopwe engaang ngaeni.’ ”

9 Iwe Saetan a pwigi noa Jerusalem nge a noa iseni tae pwiuneoi we oarosaen taegias me reen *Temple* we, nge a aengaeni pwe, “Ngaere een Naiun Deus nge wa oatoroagotiw me igei.

10 Pwe iwe Pwapwior we eSantus e aepesa pwe, ‘Deus epwe akkiuneeor naiun angkenus repwe aemmwenog.’

11 Nge epwan aepesa pwe, ‘Repwe ammwariug tae noan paiiur pwe pirhemw mwo nge ete woas ngaeni faai.’”

12 Iwe nge Jesus a paniuwaeni pwe, “Pwapwior we eSantus e aepesa pwe, ‘Wosoapw soatoni Deus na oamw Soamwoon.’ ”

<sup>13</sup> Weni mwirin aaen Saetan soatoni Jesus, iwe nge a nigiti noa mwo.

*Jesus a Rhaepeta Aan Engaang me Noan Galilee  
(Mat 4.12-17; Mark 1.14-15)*

<sup>14</sup> Iwe Jesus a sefaaen ngaeni Galilee, iwe nge miniwe maemaewaen Espritu Santus eno reen. Miniwe fioangon a rheeoï fetaen wooan oanongan noa faniuw we.

<sup>15</sup> A fenai fetaen noan wutteer Jews nge oanongaen aeremas ra mwaar reen.

*Rhooan Nazareth Rese Aetiwa Jesus  
(Mat 13.53-58; Mark 6.1-6)*

<sup>16</sup> Jesus a noa Nazareth, igiwe effooan me ee, nge wooan Sabbath a noa noan wutteer Jews we taeppen rhag miniwe egaen feori. A iutae pwe epwene aeraegi Pwapwior we e Santus,

<sup>17</sup> nge ra ngaenneei pwapwior we aaen profeta Isaiah. A suginoa pwapwior we nge a weri pwiuneoi we effoat me ee,

<sup>18</sup> “Kkemenaaen Soamwoon a no woai pwe iya ffin tae ipwe pwigito Kkepas Mwamwaai eei reer rhooa affayeo.

Iya fangenoa ngaang ipwe oaronga ngaeniir rhoon kanepwus pwe iir ra saenetaeg nge i aecchipwaar rhooa parh pwe repwe ffat noa, me pwan aengesaar noa rhooa waeirae

<sup>19</sup> iwe me ipwe oaronga ngaeniir aeremas pwe a toori oatowe Soamwoon epwe aemewaar naiun aeremas.”

<sup>20</sup> Jesus a oawunnu noa pwapwior we, a ateeow sefaaeniy ngaeni aeremas we etipaengi, iwe nge

a mooat tiw. Oanongeer aeremas kkewe noan wutteer Jews we nge a meseer ngaeni rhag,

<sup>21</sup> Iwe nge a aengaeniir pwe, “Soapwon kkepas e noan Pwapwior we e Santus iye igina nge a pwae noa pwe ennet, iye oawwa rongorong ngaeni.”

<sup>22</sup> Ra piungiun mwaar reen nge ra maengi noan-nei nong mwamwaaiun ititin aan kkepas. Ra iura pwe, “Saapw iiy mwaaen we naiun Joseph?”

<sup>23</sup> A aengaeniir pwe, “Igiuneei firhiy pwe oawpwe aengaeni sefaeniaei kkepas een, ‘Toagota, aecchipwa oanongoamw.’ Oawpwe akkiuneowaei pwe ipwe feeori me nee pwugusaei minikkewe oawrongorong pwe ifasiun gaen feeori me noan Capernaum.”

<sup>24</sup> Jesus a iura pwe, “Ennetaen, ipwe aengaeni-gaemi, pwe profeta nge ese gacch aar aewen-immwaar me noan pwuguseer.

<sup>25</sup> Aiussaening ngaeniaei: regin towunap rhooapwut kka ra mae rhooan ngaenneyeer me wooan Israel noan oatowe oaton Elijah, oatowe esooar worhow noan enuuw me esoapw raeg iwe a itto eew naengeta gin oarosaen temoag wooan oanongaen faniuw we.

<sup>26</sup> Inamwo nge esooar erhai ne re fangenoa Elijah reen me wooan Israel, pwe aeggaen erhai rhag rhooapwut a mae rhooan ngaenneyan eno wooan Zarephath me wooan faniuw na Sidon.

<sup>27</sup> Iwe nge ra gin ssow rhooa affayeo reen kaenepaai kka reno wooan Israel reen oatowe oaton Elisha; nge inamwo nge erhai mwo me neeiir nge ese cchipw, pwe aeggaen Naaman we erhai re Syria.”

<sup>28</sup> Igiwe aeremas kkewe reno noan wutteer Jews we ra rongorong miniwe nge a gin teeo ngaeniir aar soong.

<sup>29</sup> Ra iutae rhag, iuriutepa wow Jesus me noan aepinoamw we, nge ra pwigitae wooan wungaen rhug we eno miniwe aepinoamwoor wooan. Re menaen pwe repwe aerheei noa me wooan rhug we,

<sup>30</sup> iwe nge iiy etowow rhag me nugunupaen ppuwa we nge a faaeraeg noa.

*Mwaaen we Eyor Aniu Aenneew Wooan  
(Mark 1.21-28)*

<sup>31</sup> Iwe Jesus a noa wooan Capernaum, eew aepinoamwon Galilee, a noa fenai ngaeniir aeremas wooan Sabbath.

<sup>32</sup> Ra mwaar reen aan fenai, pwe igiwe eyor kkemenaen aan fenai.

<sup>33</sup> Noan wutteer Jews we nge eyor erhai mwaaen eyor aniu aenneew wooan; a gin aekkepwas temoag tae,

<sup>34</sup> “Ah! Meeta oamw mwerhaen ngaenigemaem, Jesus re Nazareth? Wa itto igeei pwe wopwe oatoaropagemaem? Ngaang igiuneei een iyo: een mwaaenessoar we rhoan pweipwogin kkepas we aen Deus!”

<sup>35</sup> Jesus a anniugiu ngaeni aniuwe pwe, “Wopwe anniug noa nge wa siunoa me wooan mwaaen na!” Iwe nge aniu aenneew we a aerheei tiw mwaaen we wenimmweer rhoawe nge a teeowow me wooan, nge esooar minne eoawoasu ngaeni.

<sup>36</sup> Aeremas ra piungiun mwaar nge ra kkepas fengaen woar pwe, “Meeta taeppen kkepas

kkeei? Eyor kkemenaen me maemaewaen aeen mwaanen een kkepas ngaeniir aniu aenneew nge ra siu!”

<sup>37</sup> Iwe miniwe fioangon Jesus a rheoi fetaen wooan faniuw we.

*Jesus a Aecchipwa Towunepaen Aeremas  
(Mat 8.14-17; Mark 1.29-34)*

<sup>38</sup> Jesus a siusaengi wutteer Jews we iwe a noa reen miniwe pwugusaen Simon. Niewe inaan pwiuniuwaen Simon esemwaai pwe egin pwerhikkar ginin, iwe ra kkepas ngaeni Jesus reen mmwenen.

<sup>39</sup> A noa iwe a noa iu oaron niewe iwe nge a aengaeni pwerhikkar we pwe epwe siusaengi niewe. Iwe rhag nge esaer noa miniwe pwerhin niewe, iwe niewe a rhimwitae pwe a ittae feor fetaen minne epwe tipaengi ngaeniir.

<sup>40</sup> Enoa mwirin tupwunoan aenet nge oanongeer rhoawe eyor rhoa semwaai reer nge ra pwigiir to reen Jesus. Eiseni tae paiun woar oanongeer nge a aecchipwaar tae.

<sup>41</sup> Mwuniaan mwo nge re piungiun teeowow me woar rhoa towunap we nge ra itiwow aekkepwas pwe, “Een mwaanen we Naiun Deus!”

Jesus a kkepas sseor ngaeniir aniu aenneew kkewe pwe resoapw kkepas, pwe igiwe re giuneei pwe iiy miniwe Kristus.

*Jesus e Fenai Noan Wutteer Jews Kkewe  
(Mark 1.35-39)*

<sup>42</sup> Weni mmwaei raaen Jesus a nigiti aepinoamw we iwe a noa eew pwiuneoi ne iiy noa rhag. Aeremas a rhaepetae aar giutta



fetaeneei, iwe nge renoa weri, nge ra aegina aar ammwarhiu tiw pwe ete rhiuwen siunoa.

<sup>43</sup> Iwe nge iya aengaeniir pwe, “Ngaang ipwan noa fenaiuw Kkepas Mwamwaai we reen Mweoiun Deus me noan aepinoamw kena aekkaew, pwe ina minne Deus efang ngaang pwe ipwe noa feeri.”

<sup>44</sup> Iwe a noa fenaiuw noan oanongan noa wut-ter Jews me wooan faniuw we.

## 5

*Jesus a Faingiir Rhoawe Mesaemmwaen Rhoan Kkayeo*

*(Mat 4.18-22; Mark 1.16-20)*

<sup>1</sup> Eraaen nge Jesus eiu reen meoneoiniun we Gennesaret nipwaen aar aeremas aekkaetemaegin to pwe repwe itto rongorong miniwe kkepe-saen Deus.

<sup>2</sup> A weri riiufoarh pwoot pwe ra iuriiur tae weni ppiy: nge rhoan fita kkewe ra nigiti pwe ra noa wupwuuw noa wuug kkewe naiur. <sup>3</sup> Jesus a toonong noan efoarh pwoot kkewe –pwoot we waen Simon –nge a tingoareei ngaere epwe mmwenen amman saengi egius mwoarhoisaet. Jesus a mooat noan pwoot we nge a fenai ngaeniir rhoa towunap we.

<sup>4</sup> Enoa moann aan mwaenieniy, nge a aen-gaeni Simon pwe, “Ammaan ffoarh wow igina enennoan ee, nge een me rhoa kkomwu rhi-noamw oawwa aerheei tiw wuug mwu naimi pwe oawpwe fita.”

<sup>5</sup> Simon a paniuwaeni pwe, “Soamwoon, efoarh ngaeni nee pwoong we aemaem fita nge esooar iig

e aei nipaeni. Iwe ngaere ina minimwu wo iura, ina nge iya iseni tiw wuug kka naimaem.”

<sup>6</sup> Ra iseni tiw wuug kkewe nge ra igin niyap iig nge aetae epwene ffeir wuug kkewe.

<sup>7</sup> Iwe nge ra taenepom ngaeniir rhooa kkewe rhoaniuwaar woan pwoot we efoarh pwe repwe itto tipaengiir. Re itto iwe ra itto oawuta pwoot kkewe waar e sseogtae reen iig aetae pwoot kkewe repwene mweoius.

<sup>8</sup> Oatowe Simon Peter a weri miniwe a wen, a foatotiwi weni mmwaen Jesus nge a iura pwe, “Siu saengiaei Soamwoon! Ngaang erhai mwaaen monofit!”

<sup>9</sup> Iiy me rhooa kkewe ra riutae reen towunepaen iig kkewe ra nipaeni.

<sup>10</sup> Pwan ina rhag miniwe ewen ngaeniir James me John, mwaaen kkewe naiun Zebedee. Jesus a aengaeni Simon pwe, “Wosoapw mesag: saengi igina a noa een wopwene niyap aeremas.”

<sup>11</sup> Ra iuriutae pwoot kkewe waar wenippiy, nigititiwi oanongaen aegiaeg, nge ra tapweei noa Jesus.

*Jesus a Aecchipwa Erhai Mwaaen  
(Mat 8.1-4; Mark 1.40-45)*

<sup>12</sup> Eew oat nge Jesus eno noan eew aepinoamw igiwe erhai mwaaen eweri eew kaenepaai eno ee. Igiwe eweri Jesus, a foatotiwi woan ppweon nge a aeffaenipirhe ngaeni pwe, “Menap, aere womwerhaen, wa aecchipwanoa aaei semwaa!”

<sup>13</sup> Jesus eangenoa nge a geotteopa mwaaen we, nge a paniuwaeni pwe, “Ngaang imwerhaen,

wone cchipw noa!” Reen rhag oatowe nge kaenepaai we a rhiuw saengi mwaaen we.

<sup>14</sup> Jesus a ammwir ngaeni pwe, “Esooar ne wopwe aengaeni minneei, nge faaeraeg uwen noa reen patere pwe epwe weriug. Iwe nge a feeori oasoar we Moses e akkiuneo, pwe epwe pwaeri ngaeniir aeremas pwe wa nimegacch noa.”

<sup>15</sup> Miniwe kkepesaen Jesus a rheoi fetaen, iwe pwuwaen aeremas ra maegeto repwe itto aius-saening ngaeni nge e aecchipwa aar semwaai.

<sup>16</sup> Iwe nge egaen noa pwiuneoi e esooar aere-mas ee, nge a noa maeipin ee.

*Jesus a Aecchipwa Erhai Mwaaen Maemerhoar  
(Mat 9.1-8; Mark 2.1-12)*

<sup>17</sup> Eraaen nge Jesus e fenai, nge aaemweoi Pharisees me sinsein anniug remooat igiwe, nge re itto me wooan aepinoamwon Galilee me Judea me Jerusalem. Kkeman we aaen Soamwoon eno wooan Jesus pwe epwe mmwenen aecchipwaar rhooa semwaai.

<sup>18</sup> Aaemweoi mwaaen re pwigito erhai mwaaen e maemerhoar wooan eew giegiy, re aegina pwe repwe pwigi nong noan iimw we nge ra oawnatiw weni mmwaen Jesus.

<sup>19</sup> Pwonno reen pwuwaen aeremas we, iwe rese mmwenen repwe toori Jesus. Iwe ra teotae wooan iimw we, ra feingi noa aekkaew oason iimw we, nge reatairaetiw mwaaen we noan giegiy we nugunupaen pwuwa we me weni mmwaen Jesus.

<sup>20</sup> Igiwe Jesus a weri nepaen aar niugiuniug rhooawe, a aengaeni mwaaen we pwe, “Naeyi, monofitimw a mwusunoa.”

<sup>21</sup> Sinsein anniug kkewe me Pharisees kkewe a rhaepetae aar niuwaennei fengaen wooar pwe, “Iyo mwaaen e aepesa aenneewa Deus! Deus rhag minne emmwen epwe oamwusa noa monofit!”

<sup>22</sup> Jesus egiuneei niunniuwaen kkewe aar nge a aengaeniir pwe, “Meeta oawniuwaennei minikken a aenneew reen?”

<sup>23</sup> Emererhaeg pwe sipwe aepesa pwe, ‘Monofitimw a mwusunoa,’ aere sipwe aepesa pwe, ‘Iutae wa faaeraeg noa?’

<sup>24</sup> Ipwe pwaeri ngaenigaemi pwe mwaaen we Naiun Aeremas eyor maemaewan wooan soanop pwe epwe oamwusa noa monofit.” Iwe a aengaeni mwaaen maemerhoar we pwe, “Ipwe aengaeniug, iutae, pwigi giemw wa noa noan imwoamw!”

<sup>25</sup> Iwe rhag mwaaen we a iutae me wenimmweer rhooawe, a pwigi miniwe gien iwe ewon wooan, a noa neepwugusan, a noa aepingepinga Deus.

<sup>26</sup> Oanongeer rhooawe ra gin riutae reen aar mesag, nge ra aepingepinga Deus nge ra iura pwe, “A inamwo aemwaeraeran minikka sa weri noan raaneei!”

*Jesus a Faingi Levi  
(Mat 9.9-13; Mark 2.13-17)*

<sup>27</sup> Mwirin minneei, Jesus a noa weri erhai rhoaan iyoiyon *tax* itan Levi, emooat noan aan *office*. Jesus a aengaeni pwe, “Itto tapweaei.”

28 Iwe Levi a iutae nigiti oanongaen aegiaeg nge a tapweei noa mwirin.

29 Oatona nge Levi a feeori eew gupwun gin temoag me reen iimw na imwan pwe aaen Jesus, iwe nge neeiir rhooan itto tapweei gupwun we nge regin ssow rhooan iyoiyon *tax* me pwan aaemweoi aeremas.

30 Aaemweoi Pharisees me sinsein anniug reappaniywaen ngaeniir rhooan kkayeo kkewe naiun Jesus reiura pwe, “Meeta oawiun nge oawmwongo ngaeniir rhooan iyoiyon *tax* me rhooa aenneew wegitaegiir kkomwun reen?”

31 Jesus a paniywaeniir a iura pwe, “Rhoakka rese semwaai rese noa reer toagota, pwe rhoakka refaer semwaai.

32 Ngaang ise itto pwe ipwe faingiir rhooa mwamwaai, pwe faer rhooa monofit pwe repwe toagun saengi monofitiir.”

*Kkepas Aeiineon Aecchigipin*  
(*Mat 9.14-17; Mark 2.18-22*)

33 Aekkaaemweoi aeremas reaengaeni Jesus pwe, “Rhoan kkayeo kkewe naiun John regaen aecchigipin ffoarh noa rhag nge remaeipin ffoarh, pwan ina rhag rhooan akkiuneo kka naiur Pharisees; nge rhooan kkayeo kkomwu noawumw remwongo noa rhag me reiun noa rhag.”

34 Jesus a paniywaeniir pwe, “Oaw niuwaennei pwe epwe mmwen oawsoapw oawwongoor aere-mas kkewe reitto reen gupwunon appwiuniupai igiwe *bridegroom* we e rhiuwen no reer? Aapw!

<sup>35</sup> Nge epwe itto raaenin na repwe pwigi saengiir *bridegroom* we, nge ina oatona repwene aecchigipin noa.”

<sup>36</sup> Jesus a pwan aengaeniir fioangon awewe een: “Oawsoapw taeringa eew mengaag ffeo pwe oawpwe pinisa ngaeni eew mengaag maerhiy. Esooar ipitan oawpwe feori. Iwe ngaere epwe ina, oawwa taeringa mwaenenei noa mengaag ffeo we pwe ikka mengaag ffeo we ese aeffitaeg ngaeni mengaag maerhiy we.

<sup>37</sup> Oawsoapw pwan aenianong *wine* ffeo noan nenien *wine* maerhiy, pwonno *wine* ffeo we epwe taeringatiw nenien *wine* maerhiy we, iwe a nipi noa *wine* we nge nenien *wine* we a ffeir noa.

<sup>38</sup> *Wine* ffeo ina oawpwan ngoannong rhag noan nenien *wine* ffeo!

<sup>39</sup> Nge esooar erhai ne epwe iun *wine* maerhiy nge epwe pwan rhiuwen iun *wine* ffeo. Pwe e iura pwe, ‘*Wine* kka e ssiunaei minne enneo.’”

## 6

### *Kkepas Aeiineon Sabbath*

*(Mat 12.1-8; Mark 2.23-28)*

<sup>1</sup> Jesus a feffaaeraeg noa neeiin maetaen *wheat* wooan raaenin Sabbath. Rhoan kkayeo kkewe naiun ra ginigin iuwoapwon *wheat* kkewe, ra mwunuti fetaeneei noan paiiur, nge reangi minikkewe faiun.

<sup>2</sup> Aekkaerhai Pharisee kkewe ra aeiineow pwe, “Meeta oawwa feori miniwe oasoapwosoapw we aarh e iura pwe oawsoapw feori wooan Sabbath reen?”

<sup>3</sup> Jesus a paniuwaeniir pwe, “Oawse aeraegi mwo miniwe David efeori noan oaton we iiy me rhooa kkewe naiun ra pecchai?”

<sup>4</sup> Iwe etonong noan imwaen Deus, nge a pwingi fenoawa kkewe re aeni oasoar ngaeni Deus, nge a angi nge a pwan ngaenneer mwaaen kkewe rhoaniuwan. Miniwe nge e aenneew ngaeni aarh oasoapwosoapw pwe aeremas repwe angi pwe aeggaen patere rhag.”

<sup>5</sup> Iwe nge Jesus a soapwei noa pwe, “Minna Naiun Aeremas minne Soamwoonin Sabbath.”

*Erhai Mwaaen Mae Paiun  
(Mat 12.9-14; Mark 3.1-6)*

<sup>6</sup> Wooan eew noa raaenin Sabbath nge Jesus a noa noan wutteer Jews a noa fenai. Erhai mwaaen eno ee nge e maemerhoar pai mwaaenen.

<sup>7</sup> Aaemweoi sinsein anniug me aaemweoi Pharisees re giutta aekkaew rhaepin minikka repwe oaturu Jesus wooan, iwe ina faan ra pipiiy gacchiuw Jesus aere epwe aecchipwaar aeremas wooan Sabbath.

<sup>8</sup> Nge Jesus egiuneei niunniuwaen kkewe aar nge a aengaeni mwaaen we pwe, “Iutae nge wa itto iu weni mmwan.” Mwaaen we a iutae nge a itto iu igiwe.

<sup>9</sup> Iwe nge Jesus a aengaeniir pwe, “Ipwe aei-ineogaemi: meeta aarh anniug eaengaenigirh sipwe mmwenen feori noan raaenin Sabbath? Meeta aarh anniug e aengaenigirh sipwe mmwenen feori noan raaenin Sabbath? Sipwe tipaengi aeremas ngaere sipwe oawoasuur? Sipwe aemewenaar, aere sipwe niir noa?”

<sup>10</sup> A fan fetaen neeiir oanongeer, iwe nge a aen-gaeni mwaaen we pwe, “Aeitiwow poawumw.” Iwe mwaaen we a aeitiwow paiun, iwe a mamaaw sefaaen.

<sup>11</sup> A gin teoteeo aar soong rhooa kkewe iwe ra pwiungiuwwoar meeta e repwene feeori ngaeni Jesus.

*Jesus a Finiir Seig me Riiurhai Oapostonus*  
(Mat 10.1-4; Mark 3.13-19)

<sup>12</sup> Oatonaan nge Jesus a ittae wooan eew taeiit epwe ittae maeipin, iwe a ittae no aegini noa epwoong reen aan ittae maeipin ngaeni Deus.

<sup>13</sup> Enoa raaen tae, a faingiir rhoaan kkayeo kkewe nge a finiir seig me riiurhai me neeiir, nge a aeita ngaeniir pwe oapostonus:

<sup>14</sup> Simon (iwe a aeita ngaeni pwe Peter) iwe nge Andrew we pwiin; James me John, Philip me Bartholomew,

<sup>15</sup> Matthew me Thomas, James we naiun Alphaeus, iwe me Simon (iwe regaen iura pwe man menat),\*

<sup>16</sup> Judas we naiun James, iwe me Judas Iscariot, iwe e fangenoa tinnimaen Jesus.

*Jesus e Fenai Nge e Aecchipwaar Aeremas*  
(Mat 4.23-25)

<sup>17</sup> Igiwe Jesus enoa ittiw me wooan taeiit we iiy me oapostonus kkewe, a ittiw iunoa nefenapi reen eew mweoiuyaen rhoaan kkayeo kkewe naiun. Eew pwuwaen aeremas temoag a no ee, nge remaeto me Judea me Jerusalem me

---

\* **6:15** *man menat*: erhai mwaaen efiow ngaeniir sonotawaen Rome faen itaen faniuwan.



aepinoamw kkewe wenepeigin faniuwaen Tyre me Sidon;

<sup>18</sup> re maegeto repwe itto aiussaening ngaeni me repwe itto aecchipwa aar semwaai. Oanongeer rhoakka eteotae mwuniaan woar nge re maegeto nge a aecchipwaar.

<sup>19</sup> Oanongeer aeremas nge reaetemaegin repwe geotteopa, pwe miniwe kkemenan eitiwow me woan nge a aecchipwaar noa oanongeer.

*Kker me Niemaam*  
(Mat 5.1-12)

<sup>20</sup> Jesus a toagun ngaeniir rhoan kkayeo kkewe naiun nge a iura pwe,

“Oaw wenepwu aaemi rhoa mwaenene;  
pwe minna Mweoiun Deus a no pwe aaemi!

<sup>21</sup> Oaw wenepwu aaemi rhoa pecchai igina;  
pwe aaemi oawpwene faeyemwaai!

Oaw wenepwu aaemi rhoa nee tip cchoaw;  
pwe aaemi oawpwene kekkaei!

<sup>22</sup> “Oaw wenepwu aaemi igine  
reaeserhoawuna gaemi, asiugaemi, aessaewa  
gaemi, aepesa gaemi pwe oawaenneew, pwe  
faaen ngaeni mwaaen we Naiun Aeremas!

<sup>23</sup> Oawkker igine a wen minna ngaenigaemi nge  
oawittae maan fetaen reen aaemi mesaeig, pwe  
a yor paniuwaemi ina eigin faeregite me naaeng.  
Pwe rhoa kkewe rhaepetoor repwan feeori taep-  
pen minneeige ngaeniir profeta kkewe.

<sup>24</sup> Nge ifa mwo aenneewan ngaenigaemi aaemi  
rhoamwu oawwiin igina;  
oawwa gaen aemmererhaeg rhag igina!

25 Ifa mwo aenneewan ngaenigaemi rhoamwu  
oawwa igin faeyemwaai igina;  
oawpwene pecchai!

Ifa mwo aenneewan ngaenigaemi rhoamwu  
oaw aemweireyiir fetaen igina;  
oawpwene nee tip choaw me saeng!

26 “Ifa mwo aenneewan ngaenigaemi igine  
oanongeer aeremas repwe aepesa gacchiumi;  
pwe rhoawe rhaepetoor ina rhag miniwe rep-  
wan aepesa reer profeta oatupwutupw kkewe.

*Aerhaengiir Rhooan Kkoapwut*  
(Mat 5.38-48; 7.12a)

27 “Nge ipwe aengaenigaemi aaemi rhoan aius-  
saening ngaeniaei: aerhaengiir rhooa oapwutae-  
gaemi, ffeeor mwamwaai ngaeniir rhooa aeser-  
hoawuna gaemi,

28 oawaewenepwuwaar rhoan soong ngaeni-  
gaemi, nge oaw maeipinaar rhooa feoffeoor aen-  
neew ngaenigaemi.

29 Ngaere erhai e pigiri epeig ne oawusupoamw,  
wa wegeti ngaeni peig na epeig pwe epwe pwan  
pigiri; ngaere erhai epwigi noa mengaagiumw,  
wa pwan ngaenneei pwan epeo.

30 Ngaenneer iyo kena rhoan tingoareog ae-  
giaeg, me ngaere erhai epwigi pisaegimw nge  
wosoapw rhiuwen tingoar sefaaen no.

31 Oawpwe feeori ngaeniir aeremas taeppen  
meeta na aaemi oaw mwerhaen pwe repwe feeori  
ngaenigaemi.

32 “Aere oawaerhaengiir rhag rhooa na  
reaerhaengigaemi, meeta faaen aaemi oawpwe  
pwigi eew wenepwu? Rhooa kkewe mwo rhooa

monofit nge repwan aerhaengiir rhooa kkewe re aerhaengiir!

<sup>33</sup> Ngaere igine oawffeeor mwamwaai ngaeniir rhag rhoakkena reffeeor mwamwaai ngaeni-gaemi, meeta faaen aaemi oawpwe pwigi eew wenepwu? Rhooa monofit kkewe mwo nge repwan feeori taepfen rhag!

<sup>34</sup> Ngaere oawfang pisaegimi ngaeniir rhag rhoakkena oawniunniwaennei pwe repwe aese-faaeni niuwenin, meeta faaen aaemi oawpwe pwigi eew wenepwu? Rhooa monofit mwo nge repwan mmwoon ngaeniir rhag rhooa monofit, pwe repwe pwan pwigi rhag nepaen miniwe re-fang!

<sup>35</sup> Aapw! Aerhaengiir rhoaan oapwutaegaemi me ffeor mwamwaai ngaeniir; oawfang ngaeniir pisaegimi nge oawsoapw niunniwaennen repwe aese-faaenin. Ina nge minna wenepwuwaemi epwe temoag noa, nge oawpwe no pwe aaemi naiun Deus na oarosaen taegias. Pwe iiy nge emwamwaai ngaeniir rhooa kkewe resonap me aeremas aenneew.

<sup>36</sup> Oawpwe faayeow taepfen rhag aaen Se-maemi faayeow ngaenigaemi.

*Kapwiungiur Aemweoi*  
(Mat 7.1-5)

<sup>37</sup> “Oawsoapw apwiungiu aeremas, nge ina nge Deus esoapw pwan apwiungiugaemi; oawsoapw oamonofitiir aemweoi, nge ina nge Deus esoapw pwan oamonofitigaemi; oaw oamwusaar noa aemweoi, nge ina nge Deus epwe pwan oamwusagaemi.

<sup>38</sup> Oawpwe fang ngaeniir aaemweoi, pwe ina nge Deus epwe pwan fang ngaenigaemi. Ewaer, pwe ammweweni ina epwene igin towunap, ina esoapw faer noan paimi iga oawpwe ammwarhiu fengaenny. Nepaen minna oawaeyae ngaeniir aaemweoi, nge ina nepaen minne Deus epwe pwan aeyae ngaenigaemi.”

<sup>39</sup> Iwe Jesus a aengaeniir eew fioangon awewe: “Erhai mwaaen parh mesan esoapw mmwewen wummwuw erhai ne epwan parh. Ngaere e wummwuw, nge repwe ppiung nong ne niipw iir me riiurhai.

<sup>40</sup> Esooar erhai aeteei suguun epwe taegias saengi aan sinsei; pwe oanongeer aeteei suguun nge epwe noa moann ngaeniir aar suguun nge repwe naaen aeffitaeg ngaeniir aar sinsei.

<sup>41</sup> “Meeta wa weri pepei na noan mesaen pwiimw, nge wose weri soapwon irae mwu noan mesoamw?

<sup>42</sup> Epwe ifa wusun oamw aengaeni pwiimw, ‘Moawwerh pwiij, itto ipwe tipwei wow pepei mwu noan mesoamw,’ nge wose weri soapwon irae mwu noan mesoamw een? Een erhai man oatupwutupw! Mmwaen tipwei wow soapwon irae mwu noan mesoamw, nge wopwe naaen weri gacchiuw oamw tipwei wow pepei na noan mesaen ina pwiimw.

*Efoarh Waniwan me Uwaan  
(Mat 7.16-20; 12.33-35)*

<sup>43</sup> “Efoarh waniwan mwamwaai esoapw uwa aenneew, nge efoarh waniwan aenneew esoapw uwa mwamwaai.

<sup>44</sup> Oanongaen mesemesaen waniwan nge sigiuneei reen minikkena uwaan; wosoapw mmwenen gin *fig* me reen irae towfanfan ngaere gin *grape* saengi fetin towfanfan.

<sup>45</sup> Erhai aeremas gacch epwe oatowowuw mini gacch saengi gacchiun noan tipan, nge erhai aere-mas aenneew epwe oatowowuw mini aenneew saengi aenneewaen noan tipan. Pwe iga aaw aepesa meeta kena esseog noan pwunn.

*Riurhai Rhooan Kaiu Iimw*  
(*Mat 7.24-27*)

<sup>46</sup> “Meeta faan oawfaingi ngaeniaei pwe, ‘Soamwoon, Soamwoon,’ nge oawse feori minne iaengaenigaemi reen?

<sup>47</sup> Erhai ne e itto reei nge e aiussaening minikka mwaeniaei nge etapweei—ngaang ipwe pwaeri ngaenigaemi meeta na iiy eweei.

<sup>48</sup> Iiy eweei erhai mwaaen eaiuwtae imwan, egenengitiw nipwan taeyifan iimw we imwan nge enoa ssaenitae me wooan porow. Iwe enoa itto pwur we itto parengi iimw we nge ese ffeir iimw we, pwe igiwe egin mamaaw kaiun.

<sup>49</sup> Nge erhai ne e rongorong mwaeniaei nge ese tapweei, ina nge iiy epwe weei rhag mwaaen we e aiuwtae imwan nge ese ffeeor taeyifan; iwe enoa itto pwur we itto parengi iimw we iwe toarop noa, ifa mwo nepaen aan ffeir noa!”

## 7

*Jesus a Aecchipwa Rhooan Engaang we Naiun*  
*Soamwoonin Sonotawaen Rome*  
(*Mat 8.5-13*)

<sup>1</sup> Oatowe Jesus a moannon aepesa oanongaen minikkeei ngaeniir aeremas kkewe, nge a noa Capernaum.

<sup>2</sup> Erhai soamwoonin sonotawaen Rome eno erhai naiun rhoan engaang ne egin aerhaengi; nge rhoan engaang we naiun a gin semwaai nge epwene oaropaen mae.

<sup>3</sup> Oatowe soamwoonin sonotaw we a rongorong wunuunun Jesus, a aefengaar noa mwaaen kkewe aar re Jews repwe noa faingito Jesus pwe epwe itto aecchipwa tae rhoan engaang we naiun.

<sup>4</sup> Ra noa reen Jesus nge ra noa aeffaenipirhe ngaeni, “Mwaaen een nge yor ipitan wopwe tipaengi.

<sup>5</sup> Egin ffayeo ngaeniir aeremesarh nge iiy woan oanongan a aiuwtae eew wutteer Jews pwe aarh.”

<sup>6</sup> Iwe Jesus a tapweer noa rhooawe. Ese taaw saengi iimw we igiwe soamwoonin sonotaw we a aefengaar noa rhooawe maereyaeren pwe repwe noa aengaeni pwe, “Soamwoon, wosoapw aewwaeiraesiug. Pwe saapw ngaang erhai aeremas yor ipitan reen oamw wopwe itto toonong reei noan imwaei,

<sup>7</sup> nge saapw ngaang erhai aeremas yor ipitan reen aaei ipwe itto ngaeniug. Wopwe aepesa rhag epat kkepas nge rhoan engaang enaeyi epwe mamaaw tae.

<sup>8</sup> Ngaang mwo nge pwan ngaang erhai mwaaen ino faaen nemaeniaen erhai e soamwoon saengiaei, nge epwan yor sonotaw kka reno faaen nemaeniaei. Ipwe aengaeni inaan pwe, ‘Wopwe noa!’ iwe a noa; iya aengaeni inaan pwe, ‘Wopwe

itto!' iwe a itto; iwe iya aengaeni rhooran akkiu-neo, 'Feeori minneen!' iwe a feeori."

<sup>9</sup> Jesus a mwaar oatowe erongorong minneen; a saep sefaaen ngaeniir mwirhaen aeremas we rettapw to mwirin nge a aengaeniir pwe, "Ipwe aengaenigaemi pwe, noan mwo Israel nge isaaen weri mwo taeppen niugiuniug een me ee!"

<sup>10</sup> Iwe rhooawe maereyaeren soamwoonin sonotaw we ra sefaaen noa reen miniwe imwan nge ra noa weri pwe rhooran engaang we naiun a mamaaw noa.

*Jesus a Aemenewa Sefaaen Tae Mwaaen we Naiun Rhoopwut we a Mae Pwiuniuwan*

<sup>11</sup> Wenimwirin rhag oatowe nge Jesus a noa reen eew aepinoamw itan Nain, nge rhooran kkayeo kkewe naiun me eew pwuwaen aeremas re tapweto mwirin.

<sup>12</sup> Iwe oatowe a tooto reen wororaen aepinoamw we, nge ra pwigiwow erhai manimae. Mwaaen we emae i rhag naiun erhai rhoopwut iwe a mae pwiuniuwan, towunepaen aeremesaen aepinoamw we re tapweei niewe.

<sup>13</sup> Igiwe Soamwoon Jesus a weri niewe, iwe a gin faayeow, nge a aengaeni pwe, "Wosoapw saeng."

<sup>14</sup> Iwe a faaeraeg noa a noa geotteopa kakoon-aen manimae we, iwe mwaaen kkewe repwigi ra iug noa. Jesus a iura pwe, "Anian een! Rhimwitae!"

<sup>15</sup> Iwe manimae we a mooat tae iwe a ittae kkepas fetaen, iwe Jesus a fang sefaaen ngaeni niewe inan.

<sup>16</sup> Iwe oanongeer noa ra igin mesag nge ra aepingepinga Deus. Iwe ra iura pwe, “Erhai profeta taegias iye a pwae me neeirh igma! Deus a itto epwe aemenewa naiun aeremas!”

<sup>17</sup> Iwe miniwe kkepesaen Jesus a rheei fe-taen noan oanongaen Judea me pwiuneoi kkewe oaron.

*Rhooa Kkewe John Baptist Efang Noa  
(Mat 11.2-19)*

<sup>18</sup> Iwe rhoan kkayeo kkewe naiun John Baptist ra itto reen John nge ra aengaeni oanongaen minikkewe, iwe e faingiir riiurhai me neeir

<sup>19</sup> nge a aefengaar noa reen Soamwoon pwe repwe noa aeyegiy pwe, “Een miniwe re iura pwe epwe itto, aere aeipwe wewweti erhai?”

<sup>20</sup> Oatowe ra itto reen Jesus, nge ra iura pwe, “John Baptist e aefengagemaem to reemw pwe aeipwe itto aeyegiug aere een miniwe reiura epwe itto, aere aeipwe wewweti erhai?”

<sup>21</sup> Faer oatowe rhag Jesus a aecchipwaar towunepaen aeremas saengi mesemesaen aar semwaai, nge epwan oatowowuur aniu aenneew me woar, nge e aeffetaar noa rhoa masparh.

<sup>22</sup> A paniuwaeniir pwe, “Oawsefaen noa oawwa aengaeni John meeta kka oawwa weri me rongorong: rhoa masparh ra ffatenoa, rhoa pirhemae ra faaeraeg, rhoa kaenepaai ra gacch noa, rhoa saeningapiung ra rongorong, rhoa mae ra menawtae, nge Kkepas Mwamwaai we a fenai ngaeniir rhoa affayeo.

<sup>23</sup> Ifa mwo wenepwuweer rhoa se tip mwaramwar reei!”



<sup>24</sup> Weni mwirin aar rhoan pweipwogin kkepas kkewe naiun John ra noa, Jesus a kkepas ngaeniir aeremas kkewe reen wunuunun John: “Igine oawwa noa reen John noan *desert* we, meeta minne oawniuwaennei pwe oawpwe noa weri? Efoarh fetin e mwoaroro reen aaeng?

<sup>25</sup> Meeta minne oawnoa pwe oawpwe weri? Erhai mwaaen kka e memmengaag tae mengaag nning? Rhooa kkomwu re memmengaag tae taepen minikken a imwu reno rhag noan imwaen *king!*

<sup>26</sup> Aengaeniaei, meeta oawnoa pwe oawpwe weri? Erhai profeta? Ooa, ennetaen, oawwa weri erhai e taegias saengi erhai profeta.

<sup>27</sup> Pwe John miniwe Pwapwior we e Santus eiura pwe, ‘Deus a kkepas, ngaang ipwene fangetiw naeyi rhoan pweipwogin kkepas me wenimmwoamw pwe epwe noa maeneti ennepoamw.’

<sup>28</sup> Ipwe aengaenigaemi pwe John ina e taegias saengiir aeremas towunap kka reno woan soanop. Iwe nge manna oarosaen git me noan minna Mweoiun Deus ina e taegias saengi John.”

<sup>29</sup> Oanongeer aeremas nge rerongorong miniwe; iir me rhoan iyoiyon *tax* kkewe rerongorong minikka mwaeniaen Deus nge ewenewen, iwe oanongeer noa ra noa paptismus reen John.

<sup>30</sup> Iwe nge Pharisees me sinsein anniug kkewe rese tipaeni aaen Deus oatoat ngaeniir, iwe ina minne rese tipaeni no repwe paptismus reen John reen.

<sup>31</sup> Jesus a pwan iura pwe, “Iwe, meeta ipwe awe-

weei ngaeniir aeremesaen mweoi e igina? Eifa wunuunuur?

<sup>32</sup> Ra aeffitaeg ngaeniir rhag wonigaet kkewe remooat noan nenien chuwaai. Eew mwiirh nge reiyaekkepwas ngaeniir aaemweoi, 'Aemaem aeiya pwai kker ngaenigaemi nge aaemi oawse maan! Aemaem aeiya arhiuwerhiuw, nge aaemi oawse saeng!'

<sup>33</sup> John Baptist a itto, e aecchigipin nge ese pwan iun *wine*, nge aaemi oawiura pwe, 'Iiy eyor aniu aenneew wooan!'

<sup>34</sup> A itto Naiun Aeremas, emwommwongo nge eiun nge oawiura pwe, 'Oaw pipiiy mwaaen een! Iiy erhai mwaaen mwongonap me iun *wine*, nge maereyaereer rhoan iyoiyon *tax* me rhooa monofit!'

<sup>35</sup> Iwe nge minna repiaen Deus a pwae noa pwe ennet reer aeremas kka re tapweei."

### *Jesus me Reen Imwaen Pharisee we Simon*

<sup>36</sup> Erhai Pharisee etengaeg Jesus epwe noa mwongoon faaef reen, iwe Jesus a noa reen iimw we imwan a noa mooat tiw pwe repwene mwongo.

<sup>37</sup> Noan aepinoamw we eno erhai rhoapwut monofit ee. Niewe erongorong pwe Jesus emwongo reen iimw we imwaen Pharisee we, iwe a pwigito eew neoningas,

<sup>38</sup> iwe a noa iu mwirin Jesus oaron pirheen nge a saeng nge eoasopwutiw rhaniun mesan wooan pirheen Jesus. Iwe a aepaena ngaeni aennirhimwen nge a faeisongei miniwe pirheen Jesus, iwe a aepiti ngaeni neoningas.

39 Igiwe Pharisee we a weri miniwe nge a kkepasiw rhag woan nge a iura pwe, “Ngaere igine ennet pwe erhai profeta, mwaaeneei nge epwe pwae ngaeni iyo rhoopwut een me meeta taepfen aeremas iye e itto geotteopa; pwe rhoopwut een iye erhai maan monofit!”

40 Jesus a kkepas nge a iura pwe, “Simon, eyor minne ipwe aengaeniug mwo.”

Simon a iura pwe, “Ooa wo sinsei, aengaeni-aei?”

41 Jesus a rhaepetae aan fioang, “Riurhai mwaaen remonofit senaapiy me reen erhai rhoan fang senaapiy. Erhai emonofiti nimapwiugiww faifayiun senaapiy *silver*, nge iwe erhai nimeig.

42 Esooar erhai rhoawe e e rhiuwen mmwenen aera minikkiwe monofitiir, iwe mwaaen we a oamoaw noa minikkewe monofitiir. Iwe ifa erhai neeiir ne epwe temoag aan aerhaengi mwaaen we?”

43 Simon a paniuwaeni pwe, “Imaengi nge epwe mwaaen na e temoag minna e aar me reen monofitin.”

Jesus a iura pwe, “Ennet reemw.”

44 Iwe a toagun ngaeni rhoopwut we nge a mwaaenieng ngaeni Simon, “Woweri rhoopwut een? Ngaang itto noan minne imwoamw, nge esooar rhaan e wongatto pwe toatoan pirheei, nge iya faer toafi pirheei reen rhaniun mesan nge e aepaena ngaeni aennirhimwen.

45 Wose faeisongei aei reen oamw aewen-immwaeiaei, nge iyy iye esaan iug noa mwo reen aan faeisongei pirheei saengi rhag oatowe i tooto.

<sup>46</sup> Esooar tiikka e wofang pwe aepitaen rhimwei, nge iiy a faer aepiti ngaeni pirheei neoningas.

<sup>47</sup> Iwe ina minne ipwe aengaeniug pwe, aerhaengerhaeng temoag e a pwaeri noa, ina a tiwegin pwe oanongaen minikkiwe monofitin nge a saenetaeg noa. Iwe nge iyo na eegius rhag monofit na e aessaenetaegiy nge ina e egius rhag aan aerhaengerhaeng.”

<sup>48</sup> Iwe Jesus a aengaeni rhoopwut pwe, “A saenetaeg noa monofitimw.”

<sup>49</sup> Rhooa kkewe aaemweoi iwe remooat reen *table* we ra iura fengaenni pwe, “Iyo minne epwan gaen aessaenetaegiy aar aeremas monofit?”

<sup>50</sup> Nge Jesus a aengaeni rhoopwut we pwe, “Wa menaw reen oamw niugiuniug; wone noa noan oapoas.”

## 8

### *Rhoopwut Kkewe re Tapweei Jesus*

<sup>1</sup> Enoa faeiyegeius noa Jesus a noa fetaen noan aepinoamw me pwugos kkewe, reen aan fenaiuw fetaeneei Kkepas Mwamwaai we reen Mweoiun Deus. Rhoaan kkayeo kkewe seig me riiurhai retapweei,

<sup>2</sup> iwe me pwan aekkaerhai rhoopwut kkewe ra cchipw saengi aniu aenneew me mesemesaen semwaai: Maria (we pwan itan Magdalene), niewe Jesus e oatowowuw fusiومان aniu aenneew me wooan;

<sup>3</sup> Joanna we rhoaan ngaenneyaen Chuza we enemaeni minikkiwe pisaegin Erotos; me Susanna, me pwan towuneppeer rhoopwut kkewe

regaen pwan tipaengi fetaeneei Jesus me rhooan kkayeo kkewe naiun.

*Fioangon Awewe Erhai Rhoan Aeperes Faiun Foat*

*(Mat 13.1-9; Mark 4.1-9)*

<sup>4</sup> Aeremas ra maegeto reen Jesus saengi eew me eew aepinoamw; iwe enoa mweoiuto eew pwuwa temoag nge Jesus a fioangei ngaeniir eew fioangon awewe:

<sup>5</sup> “Eno erhai mwaaen a noa pwe epwe noa aeperes faiun foat. Igiwe eaeperes fetaen foat kkewe, aekkaefai faiun ra ppiungiutiw wenepigin aan we, nge repwuriir noa, nge man aeniaen epwan anginoa.

<sup>6</sup> Aekkaefai ra ppiungtiw wooan kaenefai, renoa pwaech tae nge reppwass noa pwe ese patapat ppweoniun.

<sup>7</sup> Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae wooar iwe ra maenoa.

<sup>8</sup> Nge aekkaefai ra ppiungiutiw wooan ppweon mwamwaa, iwe ra menaw tae nge ra uwa, nge efoarh nge epwe epwiugiuw uwaan.”

Iwe Jesus a soapwei noa, “Iyo eyor saeningan, epwe rongorong!”

*Faaen Aaen Jesus Kkepesaen Fioangon Awewe*  
*(Mat 13.10-17; Mark 4.10-12)*

<sup>9</sup> Rhoan kkayeo kkewe ra aeiineow Jesus meeta faaen fioang we.

<sup>10</sup> Iwe a panuwaeniir pwe, “Deus a fang ngaeni-gaemi pwe oawpwe giuneei kkepas mwoanomwoanon minna Mweoiun Deus, nge iga aaemweoi

ina epwe toowow noan fioangon awewe, pwe ina repwene pipiiy nge resoapw weri, nge ina repwene aiussaening nge resoapw metaf reen.

*Jesus eAemmetefa Fioangon Awewen Rhooran Foat we*

*(Mat 13.18-23; Mark 4.13-20)*

<sup>11</sup> “Teen faaen fioang we: faiun foat we ina kkepessaen Deus.

<sup>12</sup> Faiun kkewe reppiungiutiw wenepeigin aan, ra aeffitaeg ngaeni rhooawe rerongorong kkepessaen Deus, nge eitto rhag Saetan nge eitto pwigi noa miniwe kkepessaen Deus me reer, pwe rese niugiuniug iwe ra menaw.

<sup>13</sup> Nge faiun kkewe reppiungiutiw woan kaenefai, ra aeffitaeg ngaeni rhooawe rerongorong kkepas we nge ra kker aegini. Nge ina rhag ese itinong nee tipeer; pwe egiufet rhag aar niugiuniug, pwe eitto rhag oaton sessoat nge ra mwetekkaein fangetae.

<sup>14</sup> Nge faiun kkewe reppiungiutiw neeiin irae towfanfan, ra aeffitaeg ngaeni rhooawe rerongorong; nge aiunaeng me naiwiis me aemmesaeigaen woan feoniufan a fittiir noa iwe ese mmarh minikkewe uwaan.

<sup>15</sup> Nge faiun kkewe reppiungiutiw noan ppweon mwamwaa, ra aeffitaeg ngaeni rhooa kkewe rerongorong minna kkepessaen Deus; nge ra aaiseisa nong noan ennetin me mwamwaaun pwunnoor, nge ra aetemaegin rhag toori aar uwa.

*Eew Oappwun Eno Faaen Saepiy*

*(Mark 4.21-25)*

16 “Esooar ne egaen fifi oappwun nge a iseni nong faaen saepiy ngaere ngoanoa faaen pooa. Pwe refaer pwiigi ngaettae wooan nenien oappwun pwe aeremas repwe seram igine ra toonong.

17 “Oanongaen meeta ewop noa epwene pwae noa, nge oanongaen meeta epwanipwan nge epwe pwae noa noan seram.

18 “Oawpwe aefaennigaemi reen wunuunun aaemi aiussaening; pwe iyo a yor meeta aan nge repwe pwan fang ngaeni, nge iyo kena esooar nge refaer pwiigi saengiir mwo nge giufetin minikkenena re maengiy pwe eno reer.”

*Rhooapwut we Inaen Jesus me Mwaaen Kkewe Pwiin*

*(Mat 12.46-50; Mark 3.31-35)*

19 Rhooapwut we inaen Jesus me mwaaen kkewe pwiin reitto reen, nge rese mmwenen rhungaeni pwonno rhoanap we.

20 Nge erhai a aengaeni Jesus pwe, “Niewe inoamw me mwaaen kkewe pwiimw ikka reno niugiun, nge re mwerhaen repwe rhuungiug.”

21 Jesus a aengaeniir oanongeer pwe, “Maan na inaei me mwaaen kena pwiiny ina rhoakka re rongorong kkepessaen Deus nge re tapweei.”

*Jesus a Oapoassaetiw Eew Aaeng Cchoaw*

*(Mat 8.23-27; Mark 4.35-41)*

22 Eraaen Jesus a teeotae wooan efoarh pwoot Iiy me rhoan kkayeo kkewe naiun nge a aengaeniir pwe, “Oaw sipwe noa epeig meoneoiniun eei.” Iwe ra noa.

23 Igiwe ra sesseraeg noa nge Jesus a maiur noa. Ese mmwaei mwo nge a noa itto eew aaeng

cchoaw noan meoneoiniun we, iwe pwoot we a mweomweoyius nge rhooa kkewe ra no noan oawoas.

<sup>24</sup> Rhooan kkayeo kkewe ra noa reen Jesus ra noa faingitae, ra iura pwe, “Soamwoon, Soamwoon! Sipwene mae!”

Jesus a mmasetae a kkepas sseor ngaeni aaeng we me noa we pwe repwe poas noa; iwe ra iug noa, nge a igin rhoaraeg noa.

<sup>25</sup> Iwe a aengaeniir rhoan kkayeo kkewe pwe, “Eno iya aaemi niugiuniug?”

Rhooawe ra riutae nge ra mesag, nge ra iura fengaenni wooar pwe, “Iyo mwaaeneei? Emwaenieniy ngaeni aaeng me noa, nge retapweei mwaaenian!”

*Jesus a Aecchipwa Erhai Mwaaen Eyor Aniu Aenneew Wooan*

*(Mat 8.28-34; Mark 5.1-20)*

<sup>26</sup> Jesus me rhoan kkayeo kkewe naiun ra saei saengi Galilee nge ra noa Gerasa, iwe eno peigin meoneoiniun we me eotiw.

<sup>27</sup> Igiwe Jesus a tiwegitae ppiy, nge a noa rhuungi erhai mwaaenin aepinoamw we nge eyor aniu aenneew wooan. A ssiunaei aaen mwaaen een se memmengaag nge ese pwan nonotiw no noan imwan, pwe a noa no fetaen rhag noan paeyi kkewe.

<sup>28</sup> Iwe oatowe eweri Jesus, nge a igin eor noa, nge a foatotiw me weni mmwaen Jesus nge a aepwesaegini pwe, “Jesus, mwaaen na Naiun Deus na oarosaen taegias! Meeta minne wotipaeni me reei? Iya aeffaenipirheog pwe wosoapw aewwaeiraesiaei!”



<sup>29</sup> Eiura minneei pwe iga Jesus a oatowowuw mwuniaan aenneew we me wooan. Towunepaen oatokka epwe kkaein ngaeni, nge inamwo iga egeegee paiun me pirheen ngaeni *ccheen* nge egaen mweoiti, iwe mwuniaan we a pwigi noa noan *desert*.

<sup>30</sup> Jesus a aeineow pwe, “Meeta itoamw?”

Mwaaen we a paniuwaeni pwe, “Itaei nge Cchon,” pwonno iga a towunap mwuniaan wartae wooan.

<sup>31</sup> Mwuniaan kkewe ra aeffaenipirheei Jesus pwe esoapw fangenoa iir noan niipw we eigin nennoan.

<sup>32</sup> Eew cchon sino re mwongo fetaen wooan eew taeiit. Iwe mwuniaan kkewe ra aeffaenipirhe ngaeni Jesus pwe epwe aeweraar tae woar sino kkewe, iwe a aeweraar tae woar.

<sup>33</sup> Iwe aniu kkewe ra toowow me wooan mwaaen we nge ra wartae woar sino kkewe. Cchon sino we ra fattapw tiw rhag me wenepeigin rhug we ittiw noan meoneoiniun we itinong moapw noa.

<sup>34</sup> Mwaaen kkewe rhoan ffoanon sino reweri meeta we a wen, iwe ra fattapw noa arheoiuwa fetaeneei noan aepinoamw we me menaai kkewe.

<sup>35</sup> Aeremas ra maeg wow pipiiy miniwe a wen, nge renoa itto reen Jesus ra itto rhuungi mwaaen we retowow mwuniaan me wooan, pwe emooat wenepeigin pirheen Jesus, nge ememmengaag nge iiy man reepiy; iwe rhoa kkewe ra igin mesag.

<sup>36</sup> Rhoawe reweri miniwe ra fioangei ngaeniir aeremas wunuunun aar aniu aenneew kkewe toowow me wooan mwaaen we.

<sup>37</sup> Iwe rhag nge oanongeer aeremesaen pwiu-neoi we ra tingoareei Jesus epwe nigitiiir, pwe igiwe ra igin mesag. Iwe Jesus a teeotae woan pwoot we a noa.

<sup>38</sup> Mwaaen we etowow aniu kkewe me woan a aeffaenipirhe ngaeni Jesus epwe tapweei.

Nge Jesus a aefenganoa, nge a aengaeni pwe,

<sup>39</sup> “Sefaaen noa neepwugusoamw nge wa noa fioangei meeta e Deus a feeori ngaeniug.” Iwe mwaaen we a noa fetaen noan aepinoamw we a noa fioangei fetaeneei meeta we Jesus a feeori ngaeni.

*Rhooapwut we Naiun Jairus me Rhooapwut we e Geotteopa Mengaagiun Jesus  
(Mat 9.18-26; Mark 5.21-43)*

<sup>40</sup> Oatowe Jesus enoa sefaeniti peigin meo-neoiniun we epeig, aeremas ra itto aetiwa, pwe igiwe ra wetiwet noa rhag iiy.

<sup>41</sup> Erhai mwaaen itan Jairus a noa itto; iiy erhai soamwoonin wutteer Jews. A itto foatotiw weniimmwaen pirheen Jesus a aeffaenipirhe ngaeni epwe tapweei noa reen iimw na imwan,

<sup>42</sup> pwe igiwe rhooapwut we naiun iwe enaaen seig me ruwowu raegin a oaropaen mae.

Igiwe Jesus a tapweei noa nge aeremas ra igin itto aetietiy ngaeni.

<sup>43</sup> Eno erhai rhooapwut neeiir eseiug aan peitaeg noa noan seig me ruwowu raeg, nge esooar erhai ne emmwenen aecchipwa.

<sup>44</sup> Rhooapwut we a itto me niugiusagiuriun Jesus a itto geotteopa soapwon mengaagiun, iwe rhag nge eiug noa aan noa epeig faniuw.

<sup>45</sup> Nge Jesus a aeineo pwe, “Iyo we egeotteopayaei?”

Oanongeer rhooawe nge reiura pwe saapw iir, nge Peter a iura pwe, “Soamwoon, regin ssow rhoakka repwaeniaeniug noa me aetietiy ngae-niug.”

<sup>46</sup> Jesus a iura pwe, “Erhai imwu egeotteopayaei, pwe imeyaefi maemaewaei aan toowow me wooai.”

<sup>47</sup> Iwe rhoopwut we a giuneei pwe a pwae miniwe efeeori, iwe a noa faaeraeg ngongongoto a itto aerheeli tiw me weni mmwaen pirheen Jesus. Weni mmweer rhooanap we iwe niewe a aengaeni faaen minne egeotteopa reen me wunuu-nun aan iug noa aan noa epeig faniuw oatowe egeotteopa.

<sup>48</sup> Jesus a aengaeni niewe pwe, “Naeyi, oamw niugiuniug minne a aecchipwoag tae. Wonoa noan oapoas.”

<sup>49</sup> Nge igiwe Jesus erhiuwen kekkepas, nge erhai rhooan oarong a noa itto me reen imwaen Jairus nge a aengaeni Jairus pwe, “A mae noa rhoopwut we noawumw, wosoapw rhiuwen angiurhiu no Sinsei na.”

<sup>50</sup> Jesus erongorong miniwe nge a aengaeni Jairus pwe, “Wosoapw mesag; niugiuniug rhag ina nge epwe menaw tae.”

<sup>51</sup> Oatowe enoa toorito iimw we, ese tipan pwe aeremas repwe tapweei nong nee iimw pwe aeggaen Peter rhag me John me James iwe me mwaaen we seman me inaen aet we.

<sup>52</sup> Oanongeer aeremas kkewe noan iimw we ra saeng wooan aet we. Jesus a iura pwe, “Oawsoapw saeng; aeteen iye ese mae, pwe aan rhag maiur!”

<sup>53</sup> Rhooa kkewe ra kekkaei aegini pwe igiwe re giuneei pwe aet we a mae.

<sup>54</sup> Jesus a ammwarihu tae paiun nge a iura pwe, “Rhimwitae, moawwerh!”

<sup>55</sup> Iwe a menaw tae nge a rhiuwei rhimwitae rhag. Iwe Jesus a aengaeniir repwe ngaenneei anan mwongo.

<sup>56</sup> Mwaaen we seman me inaen aet we ra riutae, nge Jesus a ammwir ngaeniir pwe resoapw aengaeni mwo nge erhai meeta e a wen.

## 9

*Jesus a Aefengaar Noa Rhoowe Seig me Riurhai*

*(Mat 10.5-15; Mark 6.7-13)*

<sup>1</sup> Jesus a faingi fengaenniir rhoowe seig me riurhai a fang ngaeniir nemaenieer me aar manaman pwe repwe asiur aniu aenneew me aecchipwaar rhooa semwaai.

<sup>2</sup> Iwe a aefengaar noa pwe repwe noa fenaiuw minna Mweoiun Deus nge re aecchipwaar rhooa semwaai.

<sup>3</sup> A aengaeniir pwe, “Esooar minne oawpwe pwigi wooan aaemi saei: oawsoapw pwigi yomi, oawsoapw pweipwog aaemi pwetoaw, oawsoapw pweipwog mwongo, oawsoapw pweipwog senaapiy, oawsoapw pwan pweipwog ssiuwenin mengaagiumi.

<sup>4</sup> Ese tiwegin iya re aetiwaegaemi me ee, oawno noan iimw naan toori aaemi oawpwe siu me reen aepinoamw naan;

<sup>5</sup> iwe nge pwiuneoi na aeremas rese aetiwaegaemi me ee, nge oawwa siusaengi pwiuneoi we nge oawwa iurhiugi noa ppweoniun me woan pirhemi pwe eew atapeonneog ngaeniir.”

<sup>6</sup> Rhooan kkayeo kkewe ra noa fetaen noan aepinoamw kkewe, ra noa fenaiuw Kkepas Mwanwaa i we nge re aecchipwaar aeremesaen oanongaen pwiuneoi.

*Aaen Eroles Pwurhopwurh Fetaen  
(Mat 14.1-12; Mark 6.14-29)*

<sup>7</sup> Oatowe Eroles, we soamwoonin Galilee, erongorong minikkewe a wen a igin pwurhopwurh fetaen, pwe aaemweoi reiura pwe John Baptist a menaw sefaaen.

<sup>8</sup> Aaemweoi reiura pwe Elijah minne a pwaeto, iwe nge pwan aaemweoi reiura pwe erhai *profeta* kkewe mweoiwe minne a menaw sefaaen.

<sup>9</sup> Eroles a iura pwe, “John iwe iya gopiy noa iuuwaen, nge iyo mwaaneei irongorong kkepesan?” Iwe a aekkaetemaegini fetaeneei aan epwe noa weri Jesus.

*Jesus e Oamwongoor Nimingeras Aeremas  
(Mat 14.13-21; Mark 6.30-44; John 6.1-14)*

<sup>10</sup> Iwe ra sefaaeneto oapostonus kkewe ra itto aengaeni Jesus meeta kkewe ra feeori. A wummwuur, iwe iir rhag ra noa reen eew aepinoamw itan Bethsaida.

<sup>11</sup> Igiwe pwuwaen aeremas we ra rongorong ra pwan ttapw noa mwirin. Jesus a aewen-immwaar, a fenaiuw ngaeniir wunuunun minna Mweoiun Deus iwe nge e aecchipwaar rhooakka resemwaai.

<sup>12</sup> Noan faefin we nge rhooran kkayeo kkewe naiun ra itto reen nge ra aengaeni pwe, “Eigin anug noa igeei nge a pwan pwoong. Aefengaar noa aeremas kaan nee aepinoamw pwe repwene noa sipegin chuwaai aeneer mwongo.”

<sup>13</sup> Jesus a faer aengaeniir pwe, “Oawfang ngaeniir aeneer.”

Nge ra iura pwe, “Niffai rhag fenoawa me ri-iurhai iig minne eno remaem. Womwerhaen pwe aeipwe noa nge aeiya noa chuwaai to aeneer rhooranap een?”

<sup>14</sup> (Repwe nimingeras mwaaen reno igiwe.)

Jesus a aengaeniir rhooran kkayeo kkewe naiun pwe, “Oaw aengaeniir pwe repwe mooat tiw nge repwe aenimeig aeremas noan eew me eew pwoatu.”

<sup>15</sup> Weni mwirin aar rhooran kkayeo kkewe feeori miniwe,

<sup>16</sup> nge Jesus a pwiigi fenoawa kkewe niffai me iig kkewe riurhai, a fattae naaeng nge a fang ngaeni Deus aan aerhigerhig. Iwe a giniiy fenoawa kkewe nge a fang ngaeniir rhooran kkayeo kkewe pwe repwe inetiy woar aeremas kkewe.

<sup>17</sup> Oanongeer nge ra maegin mwongo iwe ra mat noa. Iwe rhooran kkayeo kkewe ra oawuta seig me ruwowu rhiug reen nuseg kkewe.

*Peter e Iura pwe Jesus Iwe Kristus  
(Mat 16.13-19; Mark 8.27-29)*

<sup>18</sup> Igiwe Jesus noa rhag aan noa maeipin, rhooran kkayeo kkewe ra noa itto reen. Iwe a aeiyejiir, “Aeremas re iura pwe ngaang iyo?”

<sup>19</sup> Ra paniuwaeni, “Aaemweoi re iura pwe een John Baptist, nge aekkaaemweoi re iura pwe een Elijah, nge pwan aekkaaemweoi re iura pwe een erhai *profeta* kkewe mweoiwe nge wa menaw sefaaen.”

<sup>20</sup> A aeineeor pwe, “Nge aaemi, oawiura pwe ngaang iyo?”

Peter a paniuwaeni pwe, “Een Kristus we Naiun Deus.”

*Jesus a Aepesa Waeiraesin me Maenoan  
(Mat 16.20-28; Mark 8.30–9.1)*

<sup>21</sup> Jesus a aetiwenigiy ngaeniir pwe resoapw aengaeni mwo nge erhai minnee.

<sup>22</sup> Nge a pwan aengaeniir pwe, “Mwaaen na Naiun Aeremas ina epwe gin affayeo nge eserhoawun me neeiir mwaaen kkewe aar me soamwoonin patere me sinsein anniug. Repwene niy noa nge eoniuraen mwirin nge a menaw sefaaen.”

<sup>23</sup> Nge a aengaeniir oanongeer pwe, “Erhai ne e mwerhaen tapweaei, epwe aerheei noa niunni-uwaennen wooan oanongan, a aiufera aan kurus oanongaen raaenin, nge a tapweeito mwiri.

<sup>24</sup> Pwe iyo e mwerhaen ammwarhiu menewan, epwe ppiung saengi. Nge iyo eppiung saengi menewan pwonno ngaang, epwe giuneei menaw.

<sup>25</sup> Epwe yor ipitan igine eyo ngaeniug oanongan noa faeinaengiy nge a soano saengiug menewoamw? Esooar ipitan!

<sup>26</sup> Aere wosaew aeginiaei me fenai kka aaei, ina nge mwaaen we Naiun Aeremas epwe pwan saew aeginiug igine a noa itto noan nningen me nningen mwaaen na Seman me nningeer angkenus kena re santus.

<sup>27</sup> Ipwe aniugiuniugiuw ngaenigaemi pwe eyor aaemweoi aeremas igeei resoapw mae toori oatona repwe weri minna Mweoiun Deus.”

### *Nniuwen Noan Wunuunun Jesus*

*(Mat 17.1-8; Mark 9.2-8)*

<sup>28</sup> Epwe eew noa *week* mwirin aan Jesus aepesa minikkeei, nge a pwigiir Peter, John, me James ra ittae maeipin wooan eew rhug.

<sup>29</sup> Oatowe e maeipin, a nniuwen noa wunuunun wooan mesan, nge miniwe mengaagiun a maretin pwerhepwerh noa.

<sup>30</sup> Ese mmwaei mwo nge riiurhai mwaaen ra itto mwaenieniy ngaeni. Iir Moses me Elijah,

<sup>31</sup> repwaeto noan nning seramram nge ra itto mwaenieniy ngaeni Jesus reen wunuunun aan epwene pwaeritae aaen Deus koat reen aan epwe mae noa me noan Jerusalem.

<sup>32</sup> Peter me rhooawe rhoaniuwana ra igin maiur, nge renoa mmasetae ra weri miniwe seramramaen nningen Jesus me mwaaen kkewe riiurhai iwe reiu oaron.

<sup>33</sup> Igiwe mwaaen kkewe riiurhai ra siunoa, nge Peter a aengaeni Jesus pwe, “Sinsei, a igin gacch pwe sino igeei. Aeipwe aiuwtae enuuw iimw tampwoning, eew imwoamw, eew imwaen Moses,



me eew imwaen Elijah.” (Ese metefaaegini faaen minikkiwe e aepesa.)

<sup>34</sup> Igiwe erhiuwen kkepas, a itto eew toapw pwaniur noa faaen niuriun; rhoan kkayeo kkewe ra mesag reen toapw we a itto pwaniur noa.

<sup>35</sup> Eew mangiungiu a noa ittiw me noan toapw we, “Teen mwaaen enaeyi, iye iya finitae – oaw aiussaening ngaeni!”

<sup>36</sup> Iwe mangiungiu we a iug noa, iwe a Jesus noa rhag. Rhoan kkayeo kkewe ra anniug aegini noa rhag miniwe, nge esooar mwo erhai ne re aengaeni meeta we ra weri reen oatowe.

*Jesus e Aecchipwa Erhai Aetemwaaen Eyor Aniu Aenneew Wooan*

*(Mat 17.14-18; Mark 9.14-27)*

<sup>37</sup> Mmasetaen raaen we eraaen nge Jesus me rhoan kkayeo kkewe eoniurhai ra ittiw me wooan rhug we, nge eew pwuwa temoag ra itto reen Jesus.

<sup>38</sup> Erhai mwaaen a aekkepwas me noan pwuwa we, “Sinsei! Faaen pirhemw, itto pipiiy aet e naeyi – ieen rhag naeyi mwaaen!

<sup>39</sup> Oate aniu aenneew een epwe kkaein tiw wooan, nge erhiuwen apwas rhag nge a ittiw cchech fetaen, pwuropwur wow noan ewan; e aewwaeiraesi fetaeneei rhag nge esa siusaengi no!

<sup>40</sup> Iya aeffaenipirhe ngaeniir rhoan kkayeo kkewe noawumw pwe repwe oatowowuw, nge ese mmwen ngaeniir.”

<sup>41</sup> Jesus a paniuwaeni pwe, “Ifa mwo aaemi se niugiuniug me ruguppin faaen oateei! Epwe ifa

ssiunaein aaei ipwe no reemi? Epwe ifa wusun aaei noaneenaai reemi?” Iwe nge a aengaeni mwaaen we pwe, “Pwigito aetemwu noawumw iga.”

<sup>42</sup> Igiwe aetewe a itto reen nge aniu aenneew we a aerheitiw wooan ppweon a ittiw cchech fetaen. Jesus a aerh ngaeni aniu aenneew we pwe epwe toowow, iwe a aecchipwa aet we, iwe a iseni sefaaeny ngaeni mwaaen we seman.

<sup>43</sup> Oanongeer rhoawe ra mwaar reen maemaewaen kkemenaen Deus.

*Jesus a Pwan Aepesa Wunuunun Aan Maenoa  
(Mat 17.22-23; Mark 9.30-32)*

Oanongeer aeremas kkewe nge ra riutae reen meeta kkewe Jesus a feori nge a aengaeniir rhoan kkayeo kkewe naiun pwe,

<sup>44</sup> “Oawteorh maniuwegini minne ipwe aengaenigaemi! Mwaaen we Naiun Aeremas epwene yonong nee paiiur aeremas.”

<sup>45</sup> Iwe nge iir rhoan kkayeo kkewe naiun rese metefaaegini faaen miniwe mwaenian. Miniwe ekooap saengiir pwonno rete metefaaegini, iwe iir ra mesag pwe repwe aeyeg.

*Iyo e Oarosaen Taegias?  
(Mat 18.1-5; Mark 9.33-37)*

<sup>46</sup> Iwe rhoan kkayeo kkewe ra aengiingi fengaen neeiir ngaere iyo e oarosaen taegias.

<sup>47</sup> Jesus a giuneei niunniuwaen kkewe aar, iwe a pwigi erhai wonigaet a aiuw tiw oaron,

<sup>48</sup> a aengaeniir pwe, “Iyo e aetiwa aeten faaen itaei, ina e aetiwaeyaei; nge iyo erhai ne e aetiwaeyaei, ina e aetiwa aeremas na efangeto

ngaang. Pwe iyo na oarosaen sessoan neemi nge ina iiy minne oarosaen taegias.”

*Iyo na Ese Appaniuwaenigaemi Nge Ina Rhoani-uwaemi*

*(Mark 9.38-40)*

<sup>49</sup> John a iura pwe, “Sinsei, aeiweri erhai mwaaen eotowowuw aniu aenneew faaen itoamw, nge aeiya aengaeni pwe epwe iug noa pwe saapw iiy rhoaniuwarh.”

<sup>50</sup> Jesus a aengaeni pwe, “Oawsoapw aiugiu noa, pwe iyo na ese appaniuwaenigaemi ina rhoani-uwaemi.”

*Eew Aepinoamwon Samaria Ese Aetiwa Jesus*

<sup>51</sup> Igiwe a arapeto oaton aaen Jesus noa naaeng, a aettiweginiy nee tipan epwe noa Jerusalem.

<sup>52</sup> A fangenoa rhoan pweipwogin kkepas repwe noa wooan eew aepinoamw me Samaria repwe noa oamoannatae oanongaen meeta me wenimmwan.

<sup>53</sup> Iwe nge aeremesaen pwiuneoi we rese mwerhaen aetiwa pwe igiwe epwae ngaeniir pwe epwene noa Jerusalem.

<sup>54</sup> Igiwe James me John ra giuneei miniwe ra aengaeni pwe, “Soamwoon, womwerhaen pwe aeipwe tingoar noa aengaet naaeng pwe epwe ittiw figiir noa?”

<sup>55</sup> Jesus a toagun ngaeniir a soong ngaeniir.

<sup>56</sup> Iwe Jesus me rhoan kkayeo kkewe naiun ra noa wooan eew noa aepinoamw.

*Rhoan Mwerhaen Tapweei Mwirin Jesus*

*(Mat 8.19-22)*

<sup>57</sup> Igiwe ra noa erhai mwaaen a aengaeni Jesus, “Ese tiwegin iga wopwe noa ee nge ngaang ipwe tapweog.”

<sup>58</sup> Jesus a aengaeni pwe, “Fox eyor ngeteer, man aeniaen eyor feseer, iwe nge mwaaen we Naiun Aeremas esooar eew pwiuneoi ne epwe noa wonotiw aseoseo ee.”

<sup>59</sup> Jesus a pwan aengaeni erhai mwaaen, “Itto tapweaei.”

Iwe mwaaen we a panuwaeni pwe, “Soamwoon, mmwaen fang mwo ngaang ipwe sefaen noa nipwaeni noa mwaaen na semaei.”

<sup>60</sup> Jesus a panuwaeni pwe, “Nigitiir rhooa mae repwe sipegin nipwaeni aar mae. Nge een wa noa arheoiuwa fetaeneei kkepessaen minna Mweoiun Deus.”

<sup>61</sup> Pwan erhai mwaaen a iura, “Menap, ipwe tapweog; nge ipwe mmwaen noa mwo oapwongiir aaei famini.”

<sup>62</sup> Jesus a aengaeni pwe, “Erhai ne epwe rhaepetae aan engaengaen maat nge eeffan sefaen nge iiy esoapw firh ngaeni minna Mweoiun Deus.”

## 10

### *Jesus eAefenaar Noa Rhoowe Fisiig me Riiurhai*

<sup>1</sup> Mwirin minneen nge Soamwoon a finiir fisiig me riiurhai mwaaen, nge a aefenaar noa e repwe riiurhai me riiurhai, pwe repwe gommw noa noan eew me eew aepinoamw me taeninimw kkewe iiy epwe noa e.

<sup>2</sup> Iya aengaeniir pwe, “A towunap uwaen menaai, nge re fitiman rhag rhoan gin. Oaw maeipin ngaeni soamwoonin maat we pwe epwe fangenoa rhoan engaang pwe repwe giniiy oanongaen uwaen maat we aan.

<sup>3</sup> Oawnoa! Ipwene aefengaegaemi noa pwe oawpwene weei rhag *sheep* neeiir *wolves*.

<sup>4</sup> Oawsoapw pweipwog aaemi saiff ngaere pwe-toaw ngaere nokkaemi; nge oawsoapw iunoa pwe oawpwe koapwong ngaeniir aeremas me woan ennap.

<sup>5</sup> Ese tiwegin eew iimw ne wopwe toonong noan nge mesaemmwaen minna wopwe iura ina, ‘Oapoas epwe no reer rhoan imweei.’

<sup>6</sup> Ngaere eyor erhai aeremas ne epoas eno igi-naan, iwe nge oawwa nigititiw kkepesaen oapoas we aaemi reen; iwe ngaere esooar, ina nge oawwa pwigi sefaaeniy kkepesaen oapoas we aaemi.

<sup>7</sup> Oawpwe no rhag noan iimw we, nge oawmwongo nge oawiun ese tiwegin meeta refang ngaenigaemi, pwe rhoan engaang ina epwe toowow paniuweer. Oawsoapw siu me reen eew iimw nge oawnoa me reen eew.

<sup>8</sup> Ngaere igine oawtonong noan eew aepinoamw nge re aetiwagaemi, oawmwongo meeta refang ngaenigaemi,

<sup>9</sup> oawaecchipwaar rhooa semwaai noan aepinoamw naan, nge oawaengaeniir aeremas kena reno noan pwe, ‘Mweoiun Deus a arapeto reemi.’

<sup>10</sup> Ngaere oawitinong noan eew aepinoamw nge rese aetiwagaemi, nge oawwa itiwow woan ennap nge oawwa iura pwe,

<sup>11</sup> ‘Eew mwo ppweoniun noan aepinoamw e aepinoamwomi iye emmwarh tae wooan pirhe-maem nge iye aeipwene peonitiw reemi. Nge oawwa maengi rhag pwe minna Mweoiun Deus ina a arap ngaenigaemi!’

<sup>12</sup> Iya aengaenigaemi pwe noan Raaenin Apwiung nge Deus epwe faayeow re Sodom memmweer aeremesaen aepinoamw naan!

*Aepinoamw Kkewe Rese Niugiuniug  
(Mat 11.20-24)*

<sup>13</sup> “Ifa mwo aenneewan ngaenigaemi aaemi rhooan Chorazin! Pwan ifa mwo aenneewan ngaenigaemi aaemi rhooan Bethsaida! Aere kke-man kka refeeori me wooan igeei minne refeeori me wooan Tyre me Sidon, ina nge a ssiunaei rhag aar mooat tiw, nge ra memmengaag tutu nge reoamworomwor tae fenang wooar, pwe epwe pwae noa aar toagun saengi monofit!

<sup>14</sup> Noan Raaenin Apwiung nge Deus epwe faayeow re Tyre me re Sidon me mmwaemi.

<sup>15</sup> Nge een Capernaum! Wotipaeni wopwe tooritae naaeng? Een wopwe ppiungiutiw noan nifierno!”

<sup>16</sup> Jesus a aengaeniir rhooan kkayeo kkewe naiun pwe, “Iyo eaiussaening ngaeniug eaiussaening ngaeniaei; nge iyo eoapwutaegaemi eoapwutaeyaei, nge iyo eoapwutaeyaei eoapwuta iyo na efangeto ngaang.”

*Rhooawe Fisiig me Riiurhai ra Sefaaeneto*

<sup>17</sup> Mwaaen kkewe fisiig me riiurhai ra sefaaeneto noan aar igin kker. Ra iura, “Soamwoon,

mwuniaan mwo nge re aiussaening mwaeniaemaem reen kkemenaen minna itoamw!”

<sup>18</sup> Jesus a paniuwaeniir pwe, “Iweri Saetan aan ppiungiutiw pwe eweei rhag ffiutiwen weriwer me noan naaeng.

<sup>19</sup> Aiussaening! Iya ngaennegaemi kkaeinemi, pwe epwe mmwen pwe oawpwe faaeraeg wooar sowufaeng me maennipwong, nge oawniiy noa minikkenaa kkaeinen mwuniaan nge esooar minne oawpwe woas reen. <sup>20</sup> Iwe nge oawsoapw igin kker reen pwonno iga aniu aenneew reaiussaening ngaenigaemi; pwe oawfaer kker pwe iga itaemi a foatofaat me wooan naaeng.”

### *Jesus a Kker*

*(Mat 11.25-27; 13.16-17)*

<sup>21</sup> Reen oatowe nge Jesus a sseog noan kker me reen Espritu Santus nge a iura pwe, “Semaiei, Soamwoonin naaeng me soanop, iya ngaenneog oamw aerhigerhig, pwe wa oapanao minikkeei saengiir rhooa reepiy me metefaaegini, nge wa pwaeri ngaeniir rhooa kkewe reweer wonigaet. Ennet, Semaiei, pwe ina minna wotipaeni epwe wen.

<sup>22</sup> “Semaiei a ngaenneaei oanongaen meeta. Nge esooar erhai ne e giuneei minna Naiun pwe aeggaen minna Seman rhag, nge esooar ne e giuneei minna Seman pwe aeggaen minna Naiun rhag, iwe me iyo kena minna Naiun a finiir tae pwe epwe pwaeri ngaeniir.”

<sup>23</sup> Iwe Jesus a toagun ngaeniir rhoaan kkayeo kkewe naiun nge a iura pwe, “Wenepwu iir maskena ra weri meeta aaemi oawwa weri!

24 Iya aengaenigaemi pwe ressow *profeta me king* ra mwerhaen weri meeta kka aaemi oawwa weri, nge iir rese weri. Ra pwan mwerhaen rongorong meeta kka aaemi oawwa rongorong, nge iir rese rongorong.”

*Fioangon Re Samaria we e Mwamwaai*

25 Erhai sinsein anniug a itto epwe soatoni Jesus. Mwaaen we a iura pwe, “Sinsei, meeta minne ipwe feeori nge epwe yo ngaeniaei menaw na esooar iaenin?”

26 Jesus a paniuwaeni pwe, “Meeta miniwe Pwapwior we e Santus e iura? Meeta aemmetefan me reemw?”

27 Mwaaen we a iura pwe, “Wopwe aerhaengi Soamwoon na oamw Deus reen oanongaen nee tipoamw, reen oanongaen ngeoniumw, reen oanongaen oamw niunniwaen, pwan reen oanongaen maemaewoamw, iwe nge wa aerhaengiir rhooan wenioaromw taeppen rhag oamw sipegin aerhaengi oanongoamw.”

28 Jesus a iura pwe, “Ennet ngaeniug, wopwe feeori minikken nge wopwe menaw.”

29 Iwe nge iiy etipaeni epwe pwaeri noa pwe ennet meeta kkewe e iura, iwe a aeiineow Jesus pwe, “Iyo kena aeremesaen weni oaroi?”

30 Jesus a paniuwaeni pwe, “Eyor erhai mwaaen emwet saengi Jerusalem epwe noa Jericho nge rhooa mwoarho ra torofi, ra pwigi saengi mengaagiun, ra niyy, nge ra nigiti noa nge epwene oaropaen mae.

31 Enoa wen ngaeni pwe erhai patere epwan taeri rhag ennap we; igiwe eweri mwaaen we nge a toakonoa peigin aan we me epeig.



<sup>32</sup> Epwan ina wunuunun erhai re *Levite* epwan itto pwiuneoi we, a weri mwaaen we nge a pwan toakonoa me peigin ennap we.

<sup>33</sup> Iwe nge erhai re Samaria enoa faaeraegto, a pwan itto rhuungi mwaaen we, eweri rhag mwaaen we nge a gin ffaiyeow.

<sup>34</sup> A noa reen mwaaen we, a noa aepiti minikkewe ginisan ngaeni tiikka me *wine*, iwe a tiugiumi noa; a iseni tae mwaaen we woan manewe naiun nge a pwiigi noa noan imwaen waseona, iwe a noa aemmwena me ee.

<sup>35</sup> Mmasetaen raaen we eraaen a pwiigi riiufai faifayiun senaapiy a ngaenneei mwaaen we aan iimw we. Iwe a aengaeni pwe, ‘Wa aemmwena aeremas een, nge ese tiwegin meeta paerenoaan oamw ammwun, nge ngaang ipwe aese faaeni ngaeniug oate ipwe sefaaeneto.’”

<sup>36</sup> Jesus a soapwei noa, “Noan oamw niunni-uwaen nge ifa erhai me neeiir rhooa kkewe eoni-urhai ne e ffaiyeow mwaaen we rhooa mwoarho reniiy?”

<sup>37</sup> Sinsein anniug we a paniuwaeni pwe, “Aeremas we e aemmwena.”

Iwe Jesus a paniuwaeni pwe, “Wonoa nge wa noa feori taeppen rhag minnaan.”

### *Jesus a Noa Sengaeriir Martha me Maria*

<sup>38</sup> Igiwe Jesus me rhoaan kkayeo kkewe naiun ra noa, Jesus a itinong noan eew aepinoamw nge erhai rhoapwut itan Martha a aetiwa nong noan iimw we imwan.

<sup>39</sup> Eno erhai pwiin rhoapwut itan Maria, a itto mooat tiw reen pirheen Soamwoon nge a aiussaening ngaeni fenai kkewe aan.

<sup>40</sup> Martha a tip mworhomworh reen oanongaen engaang kkewe a feeri, iwe a itto reen Jesus a aengaeni pwe, “Soamwoon, wose aetenaegiy noa mwo pwe nie pwiiy a nigiti ngaeniaei rhag oanongaen engaang pwe ipwe feeri? Aengaeni pwe epwe itto tipaengiaei!”

<sup>41</sup> Soamwoon a iura pwe, “Martha, Martha! Etowunap minikken a wa aiunaengiy noa rhag nge esa poas no tipoamw reen,

<sup>42</sup> pwe aeggaen eew noa rhag minne eyor ipitan. Maria a fini minna egacch, nge esooar erhai ne epwe pwigi saengi.”

## 11

### *Jesus a Fenaiuw Wunuunun Maeipin (Mat 6.9-13; 7.7-11)*

<sup>1</sup> Eraaen nge Jesus a maeipin eew pwiuneoi. Oatowe enoa moann aan maeipin, erhai me neeiir rhoan kkayeo kkewe a aengaeni pwe, “Soamwoon, fenaiuw ngaenigemaem wunuunun maeipin, taeppen aen John fenaiuw ngaeniir rhoan kkayeo kkewe naiun.”

<sup>2</sup> Jesus a aengaeniir pwe, “Igin e oawpwe maeipin, ieen minne oawpwe iura: ‘Semmaem,

aemwo epwe ssoar minna itoamw ina e santus; aemwo Mweoiumw epwe war.

<sup>3</sup> Ngaennegemaem aenemaem mwongo eraaen me eraaen.

<sup>4</sup> Wopwe saeneti noa aemaem monofit, wunuunun pwan aemaem aeiya saenetiir noa rhooakkena re monofit ngaenigemaem.

Wosoapw oatonongegemaem noan sessoat.”

<sup>5</sup> Iwe Jesus a aenganiir rhooran kkayeo kkewe naiun pwe, “Ngaere igine a nugaenipwoong nge erhai me neeimi a noa reen imwaan erhai maereyaeren nge a iura pwe, ‘Maereyaerei, ipwe tingoareog mwo eoniufai fenoawa.

<sup>6</sup> Erhai maereyaerei enaaen wareto rhag me wooan aan saei, nge esooar minne ipwe fang pwe anan me reen imwaei!’

<sup>7</sup> Iwe nge ngaere mwaaen we maereyaeremw a noa kkepas wow me neeiimw nge eiura pwe, ‘Wosoapw itto aetipoapwutaeyaei! A fasiun amwarh noa asam nge ngaang me aetekka naeyi aeiya maiur. Isoapw mmwenen rhimwitae pwe ipwe iseis ngaeniug aegiaeg.’

<sup>8</sup> Ipwe aenganiigaemi pwe inamwo eiura esoapw rhimwitae pwe epwe ngaenneog fenoawa kena pwe iga oaw maereyaer, nge iiy ina epwe fasiun rhimwitae pwe epwe ngaenneog oanongaen minikken a wotingoar pwe iga een wose saew reen oamw tingoar noa rhag.

<sup>9</sup> Ina minne ngaang ipwe aenganiigaemi pwe: oawpwe tittingoar, ina nge epwe yo ngaeniigaemi; oawpwe giutta, ina nge oawpwe weri; oawpwe apiungiupiung wooan asam, ina nge epwe sugaeg ngaeniigaemi.

<sup>10</sup> Pwe iyo a tittingoar nge epwe yo ngaeni, nge iyo a giutta epwe weri, nge asam epwe sugaeg ngaeni iyo na eapiungiupiung.

<sup>11</sup> Emmwen pwe aaemi saam kena oawpwe ngaenneei naimi sowufaeng igine e tingoar iig?

<sup>12</sup> Me ngaere oawpwe ngaenneei erhai maen-nipwong aere e tingoar soagun?

<sup>13</sup> Inamwo aaemi aeremas aenneew, nge

oawwa giuneei aaemi oawpwe fang ngaeniir naimi minikka emwamwaa. Epwe ifa mwo nepaen faeregitiin aaen minna Semaemi wooai naaeng epwe fang Espritu Santus ngaeniir rhoakkena re tingoar ngaeni!”

*Jesus me Beelzebul*

*(Mat 12.22-30; Mark 3.20-27)*

<sup>14</sup> Jesus a oatowowuw erhai aniu aenneew me woan erhai mwaaen ese mmwennen kkepas; oatowe e oatowowuw aniu aenneew we me woan mwaaen we, iwe mwaaen we a rhaep aan mmwennen kkepas fetaen. Iwe pwuwaen aeremas we ra mwaar reen miniwe,

<sup>15</sup> nge aekkaemweoi ra iura pwe, “Beelzebul, manewe soamwoonin aniu aenneew, minne efang maemaewan pwe epwe asiur noa aniu aenneew.”

<sup>16</sup> Nge aaemweoi reniunniuwaennei repwe aegina Jesus, iwe ra aengaeni pwe epwe feeori eew kkeman pwe epwe pwaeri noa pwe efin tipaen Deus reen.

<sup>17</sup> Nge Jesus e giuneei niunniuwaen kkewe aar, iwe a aengaeniir pwe, “Aere eew faniuw a ginigin fesaeng nge ra fiow fengaen wooar, faniuw een esoapw ssiunaei; nge rhoan eew famini ne rese tip eew nge repwe toaroporop.

<sup>18</sup> Iwe ngaere minna mweoiun Saetan epwan ginigin kkit tiw nge refiffiow fengaen rhag wooar, epwe ifa wusun rhag nge epwe iutae aan nemenem? Oawiura pwe ioatowowuw mwuniaan pwe iga Beelzebul efang ngaeniaei maemaewaei.

19 Ngaere igine e ieei wunuunun aaei asiir noa, iwe nge eifa wusun aar rhooa kkomwu rhoaniuwaemi asiir noa aniu aenneew? Rhooa kkomwu rhoaniuwaemi ra pwaeritae pwe oawmwaerhei!

20 Aapw, ngaang ina ioatowowuw aniu aenneew noan minna kkemenaen Deus, nge ieen minne a pwaeri noa pwe minna Mweoiun Deus a faer toorigaemi.

21 “Iginerhai mwaaen mamaaw, a fasiun oamoannatae oanongaen niman, nge eposuw iimw na imwan, ina nge oanongan noa pisaegin nge epwe gofaeg rhag.

22 Iwe ngaere igine erhai mwaaen emamaaw saengi a itto fiow ngaeni nge a niyy, ina nge epwene pwigi noa oanongaen minikkewe niman ikkiwe mwaaen we a aeisetip wooan nge a noa inetiy fetaeneei meeta kkewe emwoarhow.

23 “Erhai ne ese tapweaei, nge iyy rhooa aenneew ngaeniaei, nge erhai ese tipaengiaei reen ioi, iyy erhai rhoaan oammwoatoar.

*Sefaaeneton Aniu Aenneew*  
(Mat 12.43-45)

24 “Iginerhai aniu aenneew epwe toowow me wooan erhai aeremas, nge ina epwene faaeraeg fetaen wooan faniuw paenekka pwe egiut nenien aan aseoseo. Ngaere esooar eew neniy erhuungi, nge ina epwene aengaeni oanongan pwe, ‘Ipwene sefaaen noa reen imwaei iwe i siusaengi.’

25 Iwe a sefaaen nge a noa rhuungi iimw we pwe a nimegacch noa noan pwe oanongaen aegiaeg nge a wonopaeg noa nenien.

<sup>26</sup> Iwe epwe noa nge a noa paeniir to fusiومان aniu aenneew kena reigin kkaein aar aenneew saengi, nge ra itto no pwiuneoi we. Iwe igiwe a moann oanongan noa, nge wunuunun aeremas we a faer igin aenneew saengi mmwaen miniwe rhaepetaen.”

### *Ennetaen Kker*

<sup>27</sup> Oatowe Jesus eaepesa minikkeei, erhai rhooapwut eno noan pwuwa we a kkepas tae nge a iura pwe, “Ifa mwo nepaen mwamwaaun tipan rhooapwut na etimenewaeginiug me e attiug!”

<sup>28</sup> Iwe Jesus a panuwaeni pwe, “Epwe faer ifa mwo mwamwaaun tipeer rhoakkena rerongorong minna oanoon Deus nge re aesirowu!”

### *Re Tittingoar Eew Kkeman*

*(Mat 12.38-42)*

<sup>29</sup> Oatowe aeremas kkewe ra itto roangei noa Jesus, a kkepas nge eiura pwe, “A ifa mwo aenneeweer aeremesaen mweoi e igina! Retittingoar eew kkeman, nge esooar eew kkeman ne epwe pwae ngaeniir pwe aeggaen kkeman we rhag Deus efeeri ngaeni Jonah.

<sup>30</sup> Epwe weei rhag wunuunun aen *profeta* Jonah eno pwe eew aeginn ngaeniir re Nineveh, nge mwaaen na Naiun Aeremas epwene no pwe eew aeginn ngaeniir aeremesaen mweoi e igina.

<sup>31</sup> Noan Raaenin Apwiung nge Queen reen Sheba epwe iutae nge a oamonofiti aeremesaen mweoi e igina, pwe iiy a itto saengi faniuwaen taaw noa pwe epwe itto aiussaening ngaeni aen

*king* Solomon kkepessaen reepiy; nge ipwe aengaenigaemi pwe erhai etaegias saengi Solomon eno igeei!

<sup>32</sup> Noan Raaenin Apwiung re Nineveh repwe iutae nge ra oamonofiti aeremesaen mweoi e igina, pwe iga iir re toagun saengi monofitiir oatowe rerongorong fenai kkewe aaen Jonah; nge ipwe aengaenigaemi pwe erhai etaegias saengi Jonah eno igeei!

*Minna Seremaen Oanong*  
(*Mat 5.15; 6.22-23*)

<sup>33</sup> “Esooar erhai epwe figi eew oappwun nge a oapanao ngaere iseni nong faaen saepiy; pwe ina epwe faer iseni tae woan nenien oappwun, pwe aeremas repwe weri sereman igine repwe toonong.

<sup>34</sup> Minikkenana mesoamw ikkina eweei pwe oappwunon oanongoamw. Iginne epwe ffat mesoamw, ina nge minna oanongoamw epwe seram; nge igine ese ffat mesoamw, ina nge minna oanongoamw epwe rorhappiung.

<sup>35</sup> Iseni tipoamw pwe seram na nee tipoamw ete no pwe rorhappiung.

<sup>36</sup> Ngaere igine oanongoamw eseram, nge esooar mwo egius me reen ne eno noan rorhappiung, ina nge oanongoamw epwe seram taeppen rhag aaen eew oappwun aesseremoag.”

*Jesus a Pwaeritae Tereer Pharisee me Sinsein Anniug Kkewe*  
(*Mat 23.1-36; Mark 12.38-40*)

37 Iwe oatowe Jesus enoa moannon kkepas, erhai Pharisee a aerigirig iiy pwe epwe noa mwongo reen; iwe a noa mooat tiw reen pwe ra mwongo.

38 Pharisee we eriutae oatowe eweri Jesus pwe ese nniuwa paiun weni mmwaen aan epwe mwongo.

39 Iwe Soamwoon a aengaeni pwe, “Iwe igina, aaemi Pharisee oawgaen nniuwa niugiun aaemi kkap me saepiy, nge neetipaemi esseogiun rhegoaw me feoffeoor aenneew.

40 Oawpwurh! Saapw Deus minne efeeri minna niugiun me pwan minna noan?

41 Oawfang ngaeniir rhooa affayeo oawton kkap me saepiy kena aaemi, ina nge oanongan aegiaeg epwe nim me reemi.

42 “Ifa mwo aenneewan ngaenigaemi aaemi Pharisee! Oawngaenneei Deus eew me reen giniginin seig me reen *mint* me *dill* me *cumin* me oanongaen waningas, iwe nge oaw oatoranoa ikkina efin me aaemi ffayeo ngaeni Deus. Ikkeei anniug kka oawpwe pomwoni, nge oawsoapw nigiti noa ikkina aekkaew.

43 “Ifa mwo aenneewan ngaenigaemi aaemi Pharisee! Oawaerhaengi rhag oawpwe mooat woan neniyy kkena nenieer rhooa taegias me noan wutteer Jews, nge re aerhaengi aar aeremas repwe aewenimmwaar me aesirowuur me noan imwaen chuwaai.

44 Ifa mwo aenneewan ngaenigaemi! Oawwa weei paeyi kkewe esooar aeginn woan ikkiwe aeremas refaeraeg fetaen woan nge rese giuneei.”



<sup>45</sup> Iwe nge erhai me neeiir sinsein anniug kkewe a aengaeni pwe, “Sinsei, wopwan igin aessaewaegemaem reen meeta kkomwu wo iura!”

<sup>46</sup> Jesus a paniuwaeni pwe, “Epwe pwan ifa mwo aenneewan ngaenigaemi aaemi sinsein anniug kena! Pwe oawwa iseis tae mini cchoaw woar aeremas, nge aaemi mwo nge oawse aetiwow egatt aiuttiumi pwe oawpwe tipaengiir.

<sup>47</sup> Ifa mwo aenneewan ngaenigaemi! Oawfeori paeyieer rhoowe *profeta* pwe epwe gacch, pwe ina iir rhooa kkewe rhaepeto kkewe aaemi reniiy maaer noa.

<sup>48</sup> Aaemi woan oanongaemi oawwa aepwaeri noa pwe oawtipieew ngaeni meeta kkewe rhaepeto kkewe aaemi refeeori; reniiy maaer noa *profeta* kkewe, nge aaemi oawwa feori paeyieer.

<sup>49</sup> Iwe reen minnee nge minna Repiaen Deus eiura pwe, ‘Ipwe fangetiw *profeta* me rhoaan akkiuneo reer; nge iir repwe niiy maaer noa aekkaaemweoi nge re aewwaeiraesiir aekkaaemweoi.’

<sup>50</sup> Iwe aeremesaen faaen mweoiu repwene aegaeregaer pwe faan ngaeniir *profeta* kkewe reniiy maaer noa saengi oatowe ffeor taen faeinaengiy,

<sup>51</sup> saengi oatowe reniiy maei noa Abel noa ngaeni oatowe reniiy maei noa Zechariah, iwe reniiy tiw me nepetaen antar me Pwiuneoi we epin. Ennetaen, ipwe aengaenigaemi, pwe aeremesaen faaen mweoiu nge repwe aegaeregaer pwe faan ngaeniir *profeta* kkewe reniiy maaer noa.

<sup>52</sup> “Ifa mwo aenneewan ngaenigaemi aaemi sinsein anniug! Oaw ammwarhiu *key* we epwe sugi

ngaeni asam we aesemaen reepiy; aaemi mwo nge oawsoapw pwan toonong, nge oawpwan aiugiiur iyo kena repwe mwerhaen toonong!”

<sup>53</sup> Oatowe Jesus a siusaengi pwiuneoi we, nge sinsein anniug kkewe me *Pharisee* kkewe ra rhaep aar aepesa aenneewa nge rekkepas aeiweg ngaeni reen mesemesaen aegiaeg,

<sup>54</sup> minni pwe repwe oatupwu pwe repwe pipiiy ngaere epwe rugunoa aan kkepas.

## 12

### *Eew Atapeonneog Reen Riugiuriug (Mat 10.26-27)*

<sup>1</sup> Iga sengeras aeremas repwe pwuwa fengaen, nge ra pwuu tae rhag wooan pirheen erhai, Jesus a aengaeniir rhooran kkayeo kkewe naiun pwe, “Oaw aefaennigaemi reen *yeast* kkewe aar *Pharisees*—wewen minneei nge aar riugiuriug.

<sup>2</sup> Oanongaen meeta na epwe mwoan nge epwe pwaetae, nge oanongaen meeta ewop nge epwene pwae noa.

<sup>3</sup> Iwe ina ese tiwegin minne oaw aepesa me ne roorh nge ina epwene rong noa noan seram, nge ese tiwegin minne oawpwe ngiuniungiuniuw me nee iimw nge ina aeremas repwene aekkepwas aegini fetaeneei me wooan wungaen iimw.

### *Iyo na Sipwe Mesagiu (Mat 10.28-31)*

<sup>4</sup> “Ipwe aengaenigaemi, weni maereyaerei, oawsoapw mesagiiur rhoamwu regaen niy noa oanongaemi, pwe epwe noa wenimwirin nge esooar no eew min aenneew ne repwe rhiuwen mmwenen feori.

<sup>5</sup> Ipwene pwaeri ngaenigaemi iyo na oawpwe mesagiu: oawpwe mesagiu Deus, pwe iiy minne eyor maemaewan pwe epwe oatoragaemi nong noan nifierno wenimwirin aan niy gaemi noa. Niugiuniug ngaeniaei, pwe iiy minne oawpwe mesagiu!

<sup>6</sup> “Pwe meeta, saapw riiufai checcha nge pani-uwaenin nimman nicchok? Iwe nge esooar mwo erhai neeiir ne Deus e maniuwegi noa.

<sup>7</sup> Oanongaen aennirhimwemi mwo nge Deus epaengi. Ina oawsoapw mesag, pwe aemi ina eyor ipitaemi memmweer towuneppeer nicchok!

*Pwuwafaai me Oasoarhoawuna Kristus  
(Mat 10.32-33; 12.32; 10.19-20)*

<sup>8</sup> “Ipwe aengaenigaemi pwe ese tiwegin iyo kkena re aepesa pwe iir naeyi me neeiir aeremas, nge epwe pwan ina wunuunun aen mwaaen we Naiun Aeremas epwe feori ngaeniir me weni mmweer angkenus kkena naiun Deus.

<sup>9</sup> Nge iyo kena resaep saengiaei me neeiir aeremas, nge epwe pwan ina wunuunun aen mwaaen we Naiun Aeremas feori ngaeniir me weni mmweer angkenus kkena naiun Deus.

<sup>10</sup> “Ese tiwegin iyo na ekkepas aenneewa mwaaen we Naiun Aeremas nge epwe mmwenen mwusunoa; nge iyo na ekkepas aenneewa Espritu Santus esoapw mmwenen saenetaeg.

<sup>11</sup> “Iginerepwe pwigiug noa pwe wopwe noa apwiung noan wutteer Jews aere weni mmweer *governor* ngaere soamwoonin faniuw, nge oawsoapw pireiir reen wunuunun meeta kena oawpwe feori me aepesa.

<sup>12</sup> Espritu Santus epwe kapwiungiu ngaeni-gaemi meeta kena oawpwe aepesa.”

*Fioangon Awewen Erhai Mwaaen Naiwiis we Epwurh*

<sup>13</sup> Erhai mwaaen me noan pwuwa we a aengaeni Jesus pwe, “Sinsei, aengaeni maan na pwiyy pwe epwe aemegena woamaem minikkena pisaegimaem ina mwaaen na semmaem enigiti ngaenigemaem.”

<sup>14</sup> Jesus a paniuwaeni pwe, “Maereyaerei, iyo efang ngaeniaei maemaewaei pwe ipwe aettiwegini ngaere ipwe aemegena pisaeg kena woami?”

<sup>15</sup> A aengaeniir pwe, “Oaw neogiuw tipaemi nge oawaefaennigaemi reen mesemesaen rhegoaw, pwe wenewenen oamw menaw ina ese ffeorto me reen minikkena oamw, inamwo ifa nepaen oamw naiwiis.”

<sup>16</sup> Iwe nge Jesus a aeni ngaeniir fioangon awewe een: “Eno erhai mwaaen ne e naiwiis nge e towunap uwaen mwongoon minikkena pwugusan.

<sup>17</sup> A niunniuwaennei nong rhag wooan oanongan; ‘Esooar no iga ipwe iseni noa euwaen minikka fetaen ee. Meeta ipwe feeori?’

<sup>18</sup> A aepesa pwe, ‘Teen minne ipwene feeori. Ipwene fereei tiw soko e aaai nge iya feeori sefaaeniy aekkaew min tettemoag, pwe ipwene iseni oanongaen uwaen minikka fetaen me minikka pisaegiy noan.

<sup>19</sup> Nge ina ipwene gaen iura pwe, mwaaen wenepwu! A yo ngaeniug oanongaen minikkewe emwamwaai pwe ammwenemw reen fitowu

mwo raeg. Wonoa amaniuwa noa, wopwe mwongo, iun, nge wo apwapwa fetaen.'

<sup>20</sup> Nge Deus a aengaeni pwe, 'Wopwurh! Noan pwongin eei rhag nge wopwene fangetae oamw nngas; iwe nge iyo na epwene pwiigi oanongaen minikka wa iseni rhag pwe ammwenemw?'"

<sup>21</sup> Jesus a soapwei noa, "Egaen ieei wusun minne egaen wen ngaeniir rhooakka regaen oac-chongatae rhag naiwiiseer, nge rese naiwiis faaen mesaen Deus."

*Niugiuniug Ngaeni Deus*  
(Mat 6.25-34)

<sup>22</sup> Iwe Jesus a aengaeniir rhoon kkayeo kkewe naiun pwe, "Iwe ipwe aengaenigaemi pwe oaw-soapw aiunaeng reen mwongo kkomwu oawpwe menaw reen, ngaere reen mengaagiun oanongaemi.

<sup>23</sup> Menaw ina eigin yor rhaengin mmwaen mwongo, nge oanong ina eyor rhaengin me mmwaen mengaag.

<sup>24</sup> Pipiir mwiiy kenaan: rese foat faiun waniwan ngaere gin uwaen waniwan; esooar aar soko; nge Deus e oamwongoor! Aaemi eigin yor ipi-taemi memmweer man aeniaen!

<sup>25</sup> Eyor neemi epwe mmwenen enaenaei noa egius menewan reen aan aiunaeng?\*

<sup>26</sup> Ngaere igine ese mmwen ngaenigaemi minikka epaerhigerhig, pwan minin meeta aaemi pireiir reen ikka aekkaew?

---

\* **12:25** aere: Eyor erhai me neemi ne epwe mmwen aenaeinaeinoa egius taegiasan oanongan reen aan aiunaeng?

27 Pipiiy wunuunun aaen peeon waniwan menawtae: rese engaang nge rese pwan ffeor mengaagiiur. Nge ngaang ipwe aengaenigaemi, pwe igiwe mwo *king* Solomon e menaw iwe erhai man ssow wiinan nge esooar mengaagiun ne enning noa me mmwaen peeon waniwan kaan.

28 Pwe Deus minne aememmengaagiur fetinen neeiin waniwan –fetin kka eyor igina, nge re-soapw nonoa naiu, pwe ra figaeg noa newumw. Pwe meeta, Deus esoapw mmwenen aememmen-gaagiugaemi? Me gaen mwittiginen aaemi ni-ugiuniug!

29 “Iwe oawsoapw igin aenneewa tipaemi, oaw-soapw tip mwaramwar reen meeta kena oawpwe mwongo me iun.

30 (Pwe re Gentiles me noan faeinaengiy nge retip mwaramwar reen oanongaen minikka.) Minna na Semaemi egiuneei pwe oawpwe ammweneni minikkeei.

31 Nge ina rhag, oawpwe pwan giutta minna Mweoiun Deus, nge ina nge iiy epwe fang ngaeni-gaemi meeta kenaan.

*Wenepwu Kena Wooai Naaeng*  
(Mat 6.19-21)

32 “Oawsoapw mesag, aaemi ikkina fitiman, pwe minna Semaemi ina emwamwaai tipan epwe ngaennegaemi minna Mweoiun.

33 Chuwaiuw noa oanongaen pisaegimi nge oawfang senaapian ngaeniir rhooa mwaenene. Oawpweipwog aaemi pwetoaw kkewe ese mmwenen ffeir, nge oawwa iseis nong wenepwuwaemi me woainaaeng noan,

ina esoapw mmwenen gitigit tiw pwe esooar maan mwoarho ne epwe mwoarhow, nge esooar manepwur ne epwe mmwenen fereei.

<sup>34</sup> Pwe pwunnomi epwe no rhag iga wenep-wuwaemi eno ee.

*Rhoan Akkiuneo Kkewe re Anneogiuneog*

<sup>35</sup> “Oawpwe neogiuw tipaemi reen minikka epwe ikkitto, oawwa pwiigi aaemi oappwun nge oawwa figi,

<sup>36</sup> pwe epwe weer rhag rhoan akkiuneo kkewe rewewweti maasta we aar aan epwe sefaaen to me reen gupwunon appwiuniupai we. Oatona epwe noa sefaaen nge epwe apiungiupiung rhag asam we, nge ra sugi.

<sup>37</sup> Ifa mwo aar kker rhoan akkiuneo kka maasta we aar epwe noa itto nge erhuungiir pwe re rhiuwen mmas pwe re wewweti noa rhag! Ennetaen, ipwe aengaenigaemi, pwe maasta we epwe noa itto nge a pwiniti mengaagiun, a amooattiweer, nge iiy minne epwene ffeeor ngaeniir aeneer.

<sup>38</sup> Ifa mwo aar kker igine maasta we eitto rhuungiir nge re oamoannatae, inamwo igine enoa itto nugaenipwoong ngaere weni mmwaei raaen!

<sup>39</sup> Nge oawpwe metaf pwe ngaere soaw iimw we egiuneei oaton aaen maan mwoarho we epwe itto, iwe nge iiy esoapw fang ngaeni rhooa mwoarho we epwe fereeinong iimw we imwan.

<sup>40</sup> Nge pwan aaemi nge oawpwan oamoannatae, pwe mwaaen we Naiun Aeremas epwe noa itto reen eew oat ina aaemi oawsoapw tapeoneog reen.”

*Rhooan Akkiuneo we e Wenewen me Iwe Ese Wenewen*  
(Mat 24.45-51)

<sup>41</sup> Peter a iura pwe, “Soamwoon, nge aemaem rhag minne woniuwaennei ngaenigemaem fioan-gon awewe een, ngaere oanongeer aeremas?”

<sup>42</sup> Soamwoon a iura pwe, “Ina nge iyo rhooan akkiuneo na e wenewen nge ereepiy? Iiy minne maasta we a fang ngaeni pwe epwe nemaeniir rhooan akkiuneo kkewe nge engaanneer mwongo noan oaton efin.

<sup>43</sup> Ifa mwo wenepwuwaen rhooan akkiuneo we, aere maasta we aan eitto giuneei aan feeori minikkeei igiwe ewar!

<sup>44</sup> Ennetaen, ipwe aengaenigaemi, pwe maasta we epwe ngaenneei rhooan akkiuneo we pwe epwe nemaeni oanongaen minikkewe pisaegin.

<sup>45</sup> Nge ngaere igine rhooan akkiuneo we eniuwaennei pwe maasta we aan epwe mmwaii aan sefaaeneto, nge a rhaepetae aan wirhiir rhooan akkiuneo kkewe rhinan, mwaaen fengaen me rhoopwut, nge emwongo nge eiun epwunaas noa,

<sup>46</sup> ina nge maasta we epwe sefaaeneto noan raaenin we rhooan akkiuneo we ese niuwaennei, me eew oaton esoapw giuneei. Iwe maasta we epwene fena kititiw nge efang noa neeiir rhooawe rhooa misimis.

<sup>47</sup> “Rhooan akkiuneo na e giuneei minna maasta we aan emwerhaen pwe epwe feeori, nge ese oamoannatae pwe epwe feeori, ina nge epwe igin temoag aegaeregaer na repwe feeori ngaeni.



<sup>48</sup> Iwe nge rhooran akkiuneo na ese giuneei minna maasta na aan etipaeni, nge efaer fee-ori minne epwe woawwoaw reen, ina nge epwe ppaen woawwoaw na repwe fang ngaeni. Aere Deus efang towunepaen aegiaeg ngaeni erhai aeremas, ina nge aeremas we a pwan igin towunap noa meeta epwe feeori, ina nge Deus a pwan igin towunap meeta epwe aeiineow.

*Jesus Minne e Pwigito Aengimaw*  
(Mat 10.34-36)

<sup>49</sup> “Iya itto ipwe ffooanaetae eew aengaet wooran faeinaengiy, nge e ifa mwo aaei aeniaen ngaere a fasiun giu!

<sup>50</sup> Eyor eew paptismus ipwe paptismus reen, nge e ifa mwo nepaen waeiraes noan tipaei igina toori aan epwe moanno noa!

<sup>51</sup> Oaw niuwaennei pwe iitto pwe ipwe pwigito oapoas noan faeinaengiy? Aapw, saapw oapoas, pwe aeyimweoi.

<sup>52</sup> Saengi igina a noa eew iimw ne renimman aeremesaen ina repwene aeyimweoi, eoniurhai repwene aengimaaw ngaeniir ikkina riurhai nge riurhai repwene aengimaaw ngaeniir ikkina eoniurhai.

<sup>53</sup> Semeer repwene aengimaaw ngaeniir mwaaen kkena naiur, nge mwaaen kkena naiur repwene aengimaaw ngaeniir mwaaen kkena semeer; iin repwene aengimaaw ngaeniir naiur rhoopwut nge naiur rhoopwut repwene aengimaaw ngaeniir ineer; inaen pwiuniuweer repwene aengimaaw ngaeniir pwiuniuwaen

naiiur nge pwiuniuwaen naiiur repwene aengimaaw ngaeniir inaen pwiuniuweer.”

*Metefaaeginin Faei Oat Kkeei*  
(Mat 16.2-3)

<sup>54</sup> Jesus a pwan aengaeniir aeremas kkewe pwe, “Oate oawweri eew toapw eittae me netow, oawwa iura rhag pwe epwe piung worhow – iwe a piung.

<sup>55</sup> Nge oawpwe meyaefi aaen aaeng peopeoto me eor, nge oawwa iura pwe epwene pwerhikkar – ina nge epwene pwerhikkar.

<sup>56</sup> Maan oatupwutupw! Oawmmwenen woo ngaeni faeinaeng me noan naaeng nge oawwa mmwenen iura wunuunun mesaei raaen; ina nge meeta faan oawse giuneei mmwenen minikka ewen oatokkeei reen?

*Oapoasson Nee Finarh me Rhoan Kkoapwutorh*  
(Mat 5.25-26)

<sup>57</sup> “Meeta ese mmwen ngaenigaemi pwe aaemi rhag oawpwe aettiwegini minne efin oawpwe feeri reen?

<sup>58</sup> Ngaere erhai epwigiug noa noan nenien apwiung pwe wopwe apwiung, een wopwe oarhorho wopwe oapoassa nepetaemi weni mmwaen wopwe gona nenien apwiung. Ngaere wose feeri ina nge een wopwene noa weni mmwaen soaw apwiung nge iiy a aefengoag noa nee paiiur *police*, nge iir ra noa kanepwusoag noa.

<sup>59</sup> Ipwe aengaeniug pwe iginaan iga wopwe noa no e toori oamw piungtiw oanongaen paniuwaen monofitimw.”

# 13

## *Toagun Saengi Monofitimi pwe Oawte Mae*

<sup>1</sup> Noan eew oat aekkaerhai aeremas re fioangei ngaeni Jesus mmweneer re Galilee kkewe Pilate eniir noa reen oatowe refang aar maenigaech ngaeni Deus.

<sup>2</sup> Jesus a paniuwaeniir pwe, “Reen iga e ina wusun aar mae noa iir re Galilee kkena, nge aaemi oaw niuwaennei pwe remae pwe ekkaein monofitiir memmweer oanongeer noa re Galilee kaan?”

<sup>3</sup> Aapw saapw ina! Ipwe aengaenigaemi pwe ngaere igine oawse toagun saengi monofitimi, nge aaemi oawpwe pwan maegin mae noa.

<sup>4</sup> Nge aeremas kkewe seig me waniman ikkiwe remae noa oatowe e ppiungiutiw iimw taegias we Siloam wooar? Oaw niuwaennei pwe remae pwe ekkaein monofitiir memmweer oanongeer aeremas kena reno noan Jerusalem?

<sup>5</sup> Aapw saapw ina! Ipwe aengaenigaemi pwe ngaere igine oawse toagun saengi monofitimi, nge aaemi oawpwe pwan maegin mae noa.”

## *Fioang Awewen Eew Fig Iwe Ese Uwa*

<sup>6</sup> Iwe Jesus a aengaeniir fioangon awewe een: “Eno erhai mwaaen ne emenaw tae eew *fig* me noan menaai na aan. Egiut uwaen *fig* we nge esooar minne e rhuungi.

<sup>7</sup> Iwe a aengaeni rhoan menaai we naiun pwe, ‘Een pipiiy, a enuuw raeg aaei itto giut uwaan *fig* eei, nge esooar minne irhuungi me wooan. Een gopiy tiw! Meeta ipitaen aan itto foat wooan ppweon eei?’

<sup>8</sup> Nge rhooran engaengaen menaai we a aengaeni pwe, ‘Soawumwaer, nigiti mwo reen eew raeg pwe ipwe genengi pwaeniaeniy fetaeneei mwo nge iya iseis nong koyasiun.

<sup>9</sup> Nge ngaere enoa raeg iiy nge a yor uwaan ina nge a mwamwaai; ngaere esooar, ina nge wonaaen gopiy tiw.’”

*Jesus a Aecchipwa Aaen Semwaai Erhai Rhoopwut Wooan Sabbath*

<sup>10</sup> Wooan Sabbath nge Jesus a fenai noan eew wutteer Jews.

<sup>11</sup> Erhai rhoopwuton pwiuneoi we a seig me wanuuw raeg aan semwaai pwe eno erhai aniu aenneew wooan; eppwoar sagiuriun nge ese mmwenen iutae.

<sup>12</sup> Oatowe Jesus enoa weri nge a faingiwow, “Rhoopwut mwuun, wopwene saenetaeg me reen oamw semwaai!”

<sup>13</sup> A iseni tae paiun wooan niewe, nge noan oaton we rhag nge a uwen tae nge a aepingepinga Deus.

<sup>14</sup> Soamwoonin wutteer Jews we a soong wooan Jesus pwe igiwe eaecchipwa rhoopwut we wooan Sabbath, a kkepas tae nge a aengaeniir pwe, “Wonowu raaen raaenin aarh sipwe engaang; iwe ina epwe noa itto raaen kenaan nge oawwa itto aecchipwaar rhooa semwaai, nge saapw wooan Sabbath!”

<sup>15</sup> Soamwoon a paniuwaeni pwe, “Maan oatupwutupw! Aaemi oawmmwenen pwaeisi naimi wakke ngaere *donkey* me noan gurur nge oawwa paeniir noa oawpwe noa aiuniur rhan wooan Sabbath.

<sup>16</sup> Igina ina eno erhai rhooran aeinang we aeen Abraham ina a seig me wanuuw raeg aeen Saetan geoni; sisoapw saeneti nieen wooan Sabbath?”

<sup>17</sup> Aessefaaenin kkepas we aan a aessaewaar noa rhoora kkewe rhooran kkoapwuton, nge aere-mas towunap ra faer igin pwapwa reen oanongaen min mwamwaai kkewe efeeri.

*Fioang Awewen Faiun Mustard we*

*(Mat 13.31-32; Mark 4.30-32)*

<sup>18</sup> Jesus a aeiyeg pwe, “Eifa wusun minna Mweoiun Deus? Meeta minne ipwe awewe ngaeni?”

<sup>19</sup> E ieen wusun. Erhai mwaaen a pwiigi efai faiun *mustard* nge a noa foatogi noan menaai we aan. A pwaech miniwe faiun nge a temoag noa pwe efoarh waniwan, nge man aeniaen ra itto ffeeor feseer wooan raaen.”

*Fioang Awewen Eew Yeast*

*(Mat 13.33)*

<sup>20</sup> Jesus a pwan aeiiineo, “Meeta minne ipwe awewe ngaeni minna Mweoiun Deus?”

<sup>21</sup> E ieen wusun. Erhai rhoopwut epwiigi egius *yeast* nge a nofiti fengaenniy me enuuw pwaecchin fenoawa emas toori aan pwo tae fenoawa we.”

*Asam we e Rheogit*

*(Mat 7.13-14, 21-23)*

<sup>22</sup> Jesus a toonong noan aepinoamw kkewe me pwugos kkewe, nge a fenai fetaen aeremas igiwe enennoa ngaeni Jerusalem.

<sup>23</sup> Erhai a aeiiineow pwe, “Soawumwaer mwuun, aekkaerhai rhag minne repwe menaw?”

Jesus a paniuwaeni pwe,

<sup>24</sup> “Oarhorho pwe wopwe faer nong noan asam na erheogit; pwe iga re towunap aeremas repwe aeginaar nong nge resoapw takkenong.

<sup>25</sup> Miniwe soamwoonin iimw we epwene iutae nge a ttiy noa asam we; iwe oawpwene iu nasam pwe oawpwene apiungiupiung nong wooan asam nge oawwa iura pwe, ‘Soawumwaer, sugi mwo asam!’ nge iiy epwe paniuwaeni gaemi pwe, ‘Ise giuneei igine aaemi oawitto me ee!’

<sup>26</sup> Nge aaemi oawpwene paniuwaeni pwe, ‘Aemaem aeimwongo me iun me reemw; een wofenaiuw noan miniwe aepinoamwomaem!’

<sup>27</sup> Nge iiy epwene pwan iura sefaaeny pwe, ‘Ngaang ise giuneei igine aaemi oawitto me ee. Oawsiu noa me oaroi, oanongaemi rhooa wegitaeg aenneew!’

<sup>28</sup> Ifa mwo aaemi pwe sessaeng me akkaarengi, igine oawpwene weriir Abraham, Isaac, Jacob, me oanongeer *profeta* kkewe me noan miniwe Mweoiun Deus, nge aaemi oawwa faer aekkaerh noa!

<sup>29</sup> Aeremas repwene maegeto me eotiw me netow, eor me efaeng, iwe ra itto mooat tiw noan gupwunnap na noan Mweoiun Deus.

<sup>30</sup> Iwe aaemweoi re amwirimwir repwene gommw, nge aaemweoi regommw repwene amwirimwir.”

*Aaen Jesus Aerhaengerhaeng Ngaeni Jerusalem (Mat 23.37-39)*

<sup>31</sup> Noan oatowe rhag nge aekkaaemweoi *Pharisee* ra itto reen Jesus ra aengaeni pwe, “Wopwene

siu me igeei wa noa eew pwiuneoi, pwe Eroles a mwerhaen epwene niug noa.”

<sup>32</sup> Jesus a paniuwaeniir pwe, “Oawnoa oawwa noa aengaeni maan oatupwutupw na pwe: ‘Ipwe oatowowuw mwuniaan nge iarhiuwa aar semwaai aeremas igina me naiu, nge woan ayeoniuraenin raaen nge a moann aaei engaang.’

<sup>33</sup> Inamwo nge ngaang ipwene noa raaeneei, naiu, me raaennenaan; pwe ese ffin pwe erhai *profeta* epwe noa mae me eew pwiuneoi pwe noan rhag Jerusalem.

<sup>34</sup> “Jerusalem, Jerusalem! Wa niir noa *profeta* kkewe, nge woteraar rhoan pweipwogin kkepas kkewe Deus efangeto reemw! A faaen fiteig aaei mwerhaen pwe ipwe ioni fengaenniy noawumw aeremas, taeppen maniug a ioni fengaenniy naiun faaen paiun, nge een wose mwerhaen pwe ipwe feeori!

<sup>35</sup> Iwe *Temple* we oamw ina aeremas repwe siusaengi iwe peonoa. Ipwe aengaenigaemi pwe aaemi oawsoapw weriaei no toori oatona oawpwe iura pwe, ‘Deus epwe aewenepwuwa aeremas na epwe itto faaen itaen Soamwoon.’”

## 14

*Jesus eAecchipwa Aaen Erhai Mwaaen Semwaai*

<sup>1</sup> Eew Sabbath Jesus enoa epwe noa mwongo reen imwaen erhai soamwoonin *Pharisee*; nge aeremas regaen igin pipiiy firhiy.

<sup>2</sup> Erhai mwaaen epwo pirheen me paiun a noa itto reen Jesus,

<sup>3</sup> iwe nge Jesus a kepastae nge a aengaeniir sinsein anniuug kkewe me *Pharisees* kkewe pwe, “Meeta Anniug we aarh eiura sipwe aecchipwaar aeremas wooan Sabbath ngaere aapw?”

<sup>4</sup> Nge iir rese paniuwaeni. Iwe Jesus a paeni mwaaen we, a aecchipwa, nge a aengaeni pwe epwene noa.

<sup>5</sup> Iwe a aengaeniir rhooawe pwe, “Ngaere igine erhai me neemi eyor naiun wonigaet ngaere wakke nge eppiung nong noan eew rhanniunim wooan Sabbath, oawsoapw taiuw mwetekkaeiwow inamwo raaenin Sabbath miniwe?”

<sup>6</sup> Nge erhai mwo me neeiir nge ese mmwen ngaeni epwe paniuwaeni.

### *Mesoanosoan me Ttiumwiun*

<sup>7</sup> Jesus eweriir aaemweoi me neeiir waseona kkewe re fini pwiuneoi kkewe eigin mwamwaai pwe repwe mooat ee, iwe a floangei ngaeniir floangon awewe een.

<sup>8</sup> “Iginerhai epwe aerigirig wopwe noa tapweei eew gupwunon appwiuniupai, wosoapw noa mooat pwiuneoi na e oarosaen mwamwaai. Pwe ina maeni epwe yor erhai ina eyor ipitan me mmwoamw ina epwe noa itto,

<sup>9</sup> nge iyo we efaingigaemi epwe noa itto nge epwene aengaeniug pwe, ‘Merenoa pwe mwaaen een epwe mooat igina.’ Iwe ina een wopwene saew nge wopwene noa mooat tiw pwiuneoi na e oarosaen sessoan.

<sup>10</sup> Ieen minne oawpwe feeori, iginerhai repwe aerigirig, wopwe noa wa noa mooat igina oarosaen sessoan ee, ina nge iyo we efaingiug epwe noa itto



reemw nge epwene aengaeniug pwe, ‘Moaww-erh maereyaerei, itto mooat iga emwamwaai e.’ Ieen minne epwene aetaegisoag tae me neeiir aeremas kkena reno pwe een erhai aeremas eyor ipitoamw.

<sup>11</sup> Pwe iyo na e aetaegiasa tae epwe sessoanotiw, nge iyo na epwe oasossonaetiw epwe taegias tae.”

<sup>12</sup> Iwe Jesus a aengaeni iyo we e faingito pwe, “Igin wopwe gaen ffeeor oamw mwongoon oanowas ngaere mwongoon faaef, wosoapw faingiir maereyaeremw ngaere pwiimw ngaere perhaengioamw ngaere iyo kkena aeremesaen wenioaromw igina renaiwiis –pwe ina repwe pwan faingi sefaaeniug pwe wopwe pwan noa tapweer reen gupwun pwe repwe paniuwaeni ngaeniug meeta we wofeori ngaeniir.

<sup>13</sup> Igin wopwe gaen ffeeor oamw gupwun, faingiir rhoakkena remwaenene, rhoakkena emwaetete oanongeer, rhoa mae pirheer, me rhoa parh;

<sup>14</sup> ina nge wopwe wenepwu, pwe iga iir rese mmwen repwe paniuwaeni meeta we wofeori ngaeniir. Deus epwe paniuwaeni oamw feoffeor noan raaenin na oanongeer aeremas kena remwamwaai repwene menaw tae me reen mae.”

*Awewen Gupwun Igin Temoag we  
(Mat 22.1-10)*

<sup>15</sup> Oatowe erhai me neeiir waseona kkewe re-mooat reen *table* we e rongorong minikkewe, nge a aengaeni Jesus pwe, “Ifa mwo aar kker rhoakka repwe tapweei gupwun na noan minna Mweoiun Deus!”

16 Jesus a aengaeni pwe, “Eno erhai mwaaen efeeori eew gupwun igin temoag nge e igin towunap aeremas kka e faingiir.

17 Igiwe a toori oaton gupwun we nge a fang noa erhai naiun rhoan akkiuneo epwe noa faingiir waseona kkewe, ‘Oawitto pwe oanongaen meeta nge a oamoannatae!’

18 Iwe nge erhai me erhai neeiir a ffeor fetaen mwarhneokkiur. Manewe egommw a aengaeni rhoan akkiuneo we pwe, ‘Ngaang iya chuwaiuw eew maat nge ipwe noa mwo sengaeri; faaen pirhemw nge isoapw mmwenen tapweog.’

19 Nge iwe erhai a iura pwe, ‘Ngaang inaaen chuwaiur seig wakke nge iye ipwene noa aegina aaei aengaangaar; faaen pirhemw nge isoapw mmwenen tapweog.’

20 Nge iwe erhai a iura pwe, ‘Ngaang iye inaaen appwiuniupai noa rhag, nge ina faaen minne isoapw mmwenen toowow reen.’

21 Iwe rhoan akkiuneo we a sefaaen nge a noa aengaeni maasta we aan oanongaen minikkewe reiura. Maasta we a igin soong nge a aengaeni rhoan akkiuneo we pwe, ‘Mwetekkaei wow wooan aan temoag kena me aan mwittig kkomwu ne aepinoamw, nge wa pwigiir to rhoa mwaenene, rhoa mwaetete oanongeer, rhoa parh, me rhoa pirhema.’

22 Ese mmwaei mwo nge rhoan akkiuneo we a itto iura pwe, ‘Iya moann aaei feeori meeta kkewe wo iura, nge erhiuwen nenieer aeremas.’

23 Iwe maasta we a aengaeni rhoan akkiuneo we naiun pwe, ‘Wonoa itiwow noan ennap me aan paecchig kena enoa niugiun aepinoamw pwe

wopwe noa faingiir to aeremas, pwe epwe sseog noa noan iimw we imwaei.

<sup>24</sup> Ipwe aengaenigaemi pwe esooar erhai me neeiir rhooawe simmwaen faingiir ne epwe nnaeri egius me reen mwongoon gupwun e aaei.”

*Wunuunun Aaen Erhai Epwe No pwe Rhoan Kkayeo*

*(Mat 10.37-38)*

<sup>25</sup> Eew oat igiwe eigin towunap aeremas retetapwei Jesus, a wegitaeg nge a aengaeniir pwe,

<sup>26</sup> “Iyo kka reitto reei resoapw mmwenen no pwe naeyi rhoan kkayeo igine rese aerhaengiaei noa memmweer semeer me ineer, rhoan ngaenneer me naiiur, pwiir me mwengeyeer, me iir woan oanongeer.

<sup>27</sup> Iyo kena rese aiufera aar kurus nge ra itto tapweaei resoapw mmwenen no pwe naeyi rhoan kkayeo.

<sup>28</sup> Ngaere igine erhai me neeimi eniunniywaennei pwe epwe feeori eew iimw taegias, mesaemmwaen minne wopwe feeori ina wopwe mooat tiw wa aeperha paniuwaen, pwe wopwe giuneei ngaere epwe toaw ngaeniug paniuwaen aan moann ngaeniug engang na oamw.

<sup>29</sup> Ngaere wose feeori minneei, nge ina esoapw mmwenen moann ngaeniug iimw taegias eei mwirin oamw feeori noa poasopoason; nge oanongeer rhoakkena reweri meeta ewen repwene kekkaei aeginiug.

<sup>30</sup> Nge repwene iura pwe, ‘A rhaepetae oamw kaiu nge ese mmwenen moann ngaeniug oamw engaang!’

<sup>31</sup> Ngaere erhai *king* epwigiir seig sengeras sonotaw repwe noa moawun ngaeni pwan erhai *king* epwigiir riiuweig sengeras sonotaw, mesaemmwaen ina epwe mooat tiw a niun-niuwaennei mwo ngaere epwe mmwenen niir rhooran peig na epeig.

<sup>32</sup> Ngaere esoapw mmwen, iwe epwene fangenoa naiun rhooran akkiuneo reen *king* na erhai iga erhiuwen taaw pwe repwe feeori fengaenniy oapoas nepeteer.

<sup>33</sup> Epwe ieei rhag wusun pwe esooar neeimi ne epwe mmwenen no pwe naeyi rhooran kkayeo igine ese oatoranoa oanongaen aegiaeg.”

*Aesiig we Ese Saaet*  
(*Mat 5.13; Mark 9.50*)

<sup>34</sup> “Aesiig ina e mwamwaai, iwe ngaere esa saaet no, sisoapw mmwenen aesaleti sefaaeniy.

<sup>35</sup> Ese gacch ngaeni ppweon ngaere koiyas; re aekkaerh noa. Iyo eyor saeningan, epwe rorong!”

## 15

*Sheep we e Mwaenirh Noa*  
(*Mat 18.12-14*)

<sup>1</sup> Eew raaen nge ra noa ssow to rhooran iyoiyon *tax* me rhooa monofit ra itto aiussaening ngaeni Jesus.

<sup>2</sup> Nge Pharisees me sinsein anniug kkewe a rhaepetae aar mwangiuniungiun pwe, “Mwaaeneei e aetiwaar rhooa monofit nge epwan mmwennen mwongo reer!”

<sup>3</sup> Jesus a aeni ngaeniir fioangon awewe we:

<sup>4</sup> “Aere igine erhai neemi eyor epwiugiunw naiun *sheep* iwe nge erhai me neeiir e mwaenirh noa —meeta wopwene feeori? Wopwene nigitiir noa *sheep* kkewe tiweig me tiweman nge wa noa giutta fetaeneei manewe e mwaenirh noa ssi-aenin oamw noa rhuungi. <sup>5</sup> IGINE wonoa rhuungi nge wopwene igin kker, nge wopwene ngaettae wooan eferoamw

<sup>6</sup> nge wa pwiigi noa nee iimw. Wopwene faingiir to weni maereyaeremw me rhooran no oaromw, wopwene aengaeniir pwe, ‘Iya igin kker pwe iya rhuungi *sheep* we naeyi iwe e mwaenirh noa. Sipwene oagupwuna!’

<sup>7</sup> Iwe, ipwe aengaenigaemi pwe epwe pwan igin temoag kkeren weenaeng wooan erhai man monofit e toagun saengi monofitin mmweer rhoowe tiweig me tiweman ikkiwe rese toagun saengi monofitiir.

### *Faiun Senaapiy we Eppiung Noa*

<sup>8</sup> “Aere igine eyor erhai rhoopwut eyor seig naiun faiun senaapiy nge efai eppiung noa —meeta niewe epwene feeori? Epwe figi eew oappwun, a peoni noan iimw we imwan, nge a aetemaeginiy aan giutta toori aan noa weri.

<sup>9</sup> Oatona epwe noa weri nge epwene faingiir maereyaeren me rhoakkena reno oaron nge epwene aengaeniir pwe, ‘Iya igin kker pwe iya weri

faiun senaapiy we eppiung saengiaei. Sia oagupwuna.'

<sup>10</sup> Ipwe aengaenigaemi pwan ieen rhag taeppen aar kker angkenus kkewe naiun Deus igine erhai maan monofit a toagun saengi monofitin."

*Aetemwaaen we e Mwaenirh Noa*

<sup>11</sup> Jesus a soapwei noa nge a iura pwe, "Eyor erhai mwaaen reno riiurhai naiun aetemwaaen.

<sup>12</sup> Aetewe egit a aengaeni pwe, 'Semaiei, ngoatto inetiyy me reen minikkomwu oamw.' Iwe mwaaen we a giniyy minikkewe aan wooar aet riiurhai kkewe naiun.

<sup>13</sup> Enoa mwirin fitowu raaen nge aetewe egit a chuwaiuw noa minikkewe aan nge a pwigi senaapian nge a siusaengi miniwe pwugusan. A noa wooan eew faniuw taaw noa, iwe a noa oasonopa noa senaapiy kkewe naiun reen wegitaeg kkewe e aenneew.

<sup>14</sup> Iwe a noa oarosa noa senaapiy kkewe naiun. Nge enoa weni mwirin a noa itto eew naengeta ngaeni faniuw we, iwe a noa mwaenene noa aetewe.

<sup>15</sup> Iwe a noa engaang ngaeni erhai aeremesaen faniuw we, aan engaang ina rhooran oamwongon sino.

<sup>16</sup> Aetewe a gaen aeniaen pwe epwe mwongo minikkewe anan sino pwe igiwe esooar ne egaen ngaenneei anan.

<sup>17</sup> Amwiucchiunoan igiwe aetemwaaen we enoa metaf noa wooan nge a iura pwe, 'Oanongeer rhooran engaang kkewe naiun mwaaen we semaei nge eigin towunap aeneer nge ngaang iye ipwene oaropaen maen pecchai noa!

18 Ipwene iutae igina nge ipwene noa reen mwaaen we semaei nge iya aengaeni pwe, “Semaei, iya monofit ngaeni Deus nge iya pwan monofit ngaeniug.

19 Esa ferhanno ipwe ffai pwe ngaang noawumw; aeffitaegiaei noa rhag me rhoan engaang kkena noawumw.”

20 Iwe a iutae a sefaaen noa reen mwaaen we seman.

“Aetewe e rhiuwen taaw saengi iimw we imwan nge mwaaen we seman a weri; a igin ffaiyeow, iwe a fattapw ngaeni, a roamito aetewe naiun nge a faeisongei.

21 Nge aetewe a iura pwe, ‘Semaei, iya monofit ngaeni Deus nge iya pwan monofit ngaeniug. Isa ferhanno ipwe ffai pwe ngaang noawumw.’

22 Nge faer mwaaen we seman a faingiir rhoan akkiuneo kkewe naiun, ‘Oawmwetekkai! Oawnoa pwigito mengaag na oarosaen mwamwaa! oawpwe aememmengaagiu ngaeni. Nge oawwa iseni tae efai *ring* wooan aiuttiun nge oaw iseni tae nokkaan wooan pirheen.

23 Iwe nge oawwa noa oawpwe noa pwigito wakke na oarosaen soopwun oawwa itto niyy pwe oaw sipwene feeori eew gupwun faeregit pwe aan!

24 Pwe aetewe naeyi iwe a mae, igina a menaw; e mwaenirh noa nge igina iya weri.’ Iwe ra feeori gupwun we aar.

25 “Noan oatowe nge aetewe etugufaeyi eno noan maat. Nge a noa sefaaeneto reen iimw we imweer nge a rongorong pwe ra pwai me wur.

<sup>26</sup> A faingi erhai rhooran akkiuneo kkewe a aei-ineow pwe, ‘Meeta a wen?’

<sup>27</sup> Rhooran akkiuneo we a iura pwe, ‘Aet we pwiimw a sefaaeneto neeiimw, nge mwaaen we semoamw a aengaeniir repwe niyy noa wakke we oarosaen soopwun pwe igiwe enoa sefaaeneto nge esooar minne ewen ngaeni.’

<sup>28</sup> Aet we etugufaeyi a soong esa mwerhaen toonong no neeiimw; iwe mwaaen we seman a teeowow aeffaenipirhe ngaeni epwe toonong.

<sup>29</sup> Nge iiy a appaniuwaeni mwaaen we seman, ‘Pipiiy, fiteig raeg aaei engaang ngaeniug taepen aaen engaang erhai *slave*, nge esaaen yor mwo faaen eew ne i tipowwen ngaeniug. Nge meeta minne wo ngaenneaei? Erhai mwo *goat* nge wose ngaenneaei pwe aeipwe gupwun woan me rhoakka maereyaerei!

<sup>30</sup> Nge aete noawumw iye eoasonopa noa senaapiaen minikkewe wofang ngaeni woar rhoapwutoi chuwaai, nge enoa rhag itto nge wa niyy ngaeni wakke we oarosaen soopwun pwe aan mwongoon gupwun!’

<sup>31</sup> Mwaaen we seman a iura pwe, ‘Moawwerh naeyi, een wononno rhag oaroi, nge oanongaen minikka aaei nge eno pwe oamw.

<sup>32</sup> Nge sipwe apwapwa pwe sa kker, pwe aetewe pwiimw iwe a mae nge igina a menaw sefaaen; e mwaenirh noa nge igina iya weri.’”

## 16

*Soamwoonin Engaang we e Riugiuriug*



<sup>1</sup> Jesus a aengaeniir rhooran kkayeo kkewe naiun pwe, “Eno erhai mwaaen naiwiis eno erhai naiun rhooran akkiuneo e nemaeni minikkewe pisaegin. Ra aengaeni mwaaen we pwe rhooran akkiuneo we a oasonopa senaapiy kkewe naiun,

<sup>2</sup> iwe a faingito a aengaeni pwe, ‘Meeta minne iya rongorong pwe fioangomw? Foatogitiw pwapwioron minikka pisaegiy, pwe iga een wosoapw nono pwe rhooran nemenemaen minikka aaei.’

<sup>3</sup> Rhooran akkiuneo we a kkepastiw rhag woan nge a iura pwe, ‘Maasta e aaei epwene arhiuwaeyaei me reen engaang e aaei. Meeta ipwene feeori? Ngaang ise mamaaw pwe ipwe noa no pwe rhooran kkenin maat, iwe nge ngaang isaew pwe ipwe noa tingoar fetaen.

<sup>4</sup> Iya giuneei meeta ipwene feeori! Oatona epwe noa sooar noa engaang e aaei, epwene yor maereyaerei ikka repwene aewenimmwaeyaei nong noan imweer.’

<sup>5</sup> Iwe a faingiir nong rhooa kkewe eyor monofitiir ngaeni maasta we aan. A aeiineow iwe egommw pwe, ‘Fiteig monofitimw ngaeni maasta e aaei?’

<sup>6</sup> Mwaaen we a paniuwaeni pwe, ‘Epwiugiuw pwaerinaen tiikkaen *olive*.’ Rhooran akkiuneo we a iura pwe, ‘Ieen pwapwioron monofitimw; itto moat tiw nge wa foatogi pwe nimeig.’

<sup>7</sup> A pwan aeiineow iwe erhai pwe, ‘Nge een – fiteig monofitimw?’ Mwaaen we a paniuwaeni pwe, ‘Sengeras tutuun *wheat*.’ Nge a pwan aengaeni pwe, ‘Ieen pwapwioron monofitimw, foatogi pwe wanepwiugiuw.’

<sup>8</sup> Pwonno reen meeta we a feeori, maasta we

a aepingepinga rhoon akkiuneo we naiun iwe eriugiuriug, pwe ieei faaen minne aeremesaen soanop reigin tipaecchem reen feeoriun minikka ammweneer wooan oanongeer memmweer rhoakkena reno noan seram.”

<sup>9</sup> Iwe Jesus a pwan iura pwe, “Ipwe aengaeni-gaemi pwe, oawgiut maereyaeremi nge oawpwe nainai meeta wiinaemi me soanop, pwe oawpwe noa mae noa nge repwe mmwenen aewenimmwoag nong noan iimw na esooar iaenin.

<sup>10</sup> Iyo na ewenecchar menewan noan minikka emwittig nge epwe pwan weneccchar menewan noan minikka etetemoag; nge iyo na e oatupwutupw noan minikka emwittig nge epwe pwan oatupwutupw noan ikka e tettemoag.

<sup>11</sup> Pwe ngaere ese weneccchar menewoamw noan minikka pisaegin wooan soanop, nge epwe ifa wusun nge epwe niugiug reen pisaeg kka ennet?

<sup>12</sup> Pwe ngaere ese weneccchar oamw engaang ngaeni pisaegin erhai, nge iyo epwe mwerhaen fang ngaeniug ikkina pisaegimw?

<sup>13</sup> “Esooar erhai rhoon akkiuneo epwe engaang ngaeniir riiurhai maasta. Ina epwe oapwuta erhai, nge aerhaengi iwe erhai, me ngaere epwe mwamwaai ngaeni erhai, nge a aenneew ngaeni erhai. Ese mmwen oawpwe engaangapag ngaeni Deus me senaapiy.”

*Aekkaew Kkepas Kkewe Aaen Jesus*

*(Mat 11.12-13; 5.31-32; Mark 10.11-12)*

<sup>14</sup> Igiwe Pharisees kkewe ra rongorong minnee ra aeni fetaeneei aegekkaei Jesus, pwe igiwe iir re aerhaengi senaapiy.

<sup>15</sup> Jesus a aengaeniir pwe, “Aaemi rhooa kkewe regaen feeori mwamwaaiuw wunuunuur me noan meseer aeremas, nge Deus egiuneei noan tipaemi. Pwe minikka egaen yor ipitaen me noan tipeer aeremas nge esooar ipitan me noan tipaen Deus.

<sup>16</sup> “Oasoapwosoapw kkewe aaen Moses me ikkiwe foatogier profeta kkewe e enoa toorito oaton John Baptist; mwirin a itto Kkepas Mwamwaai we reen Mweoiun Deus, iwe oanongeer aeremas ra aetietiy nong repwe toonong.

<sup>17</sup> Iwe nge emererhaeg egius aaen naaeng me soanop repwe nurh noa me mmwaen aeppaerhigin oasoapwosoapw kkeei epwe nurh noa.

<sup>18</sup> “Erhai mwaaen epwe mweoi saengi pwiuniuwan nge a noa pwiuniuwaeni erhai, nge iiy a feeori eew feoffeoor aenneew; nge erhai ne epwiuniuwaeni erhai rhoopwut ne a siusaengi pwiuniuwan nge iiy a feeori monofit.

### *Mwaaen we e Naiwiis me Lazarus*

<sup>19</sup> “Eno erhai mwaaen naiwiis ememmengaag rhag mengaag cchoaw paniuwan nge egin mwamwaai aan nonno oanongaen raaenin.

<sup>20</sup> Epwan no erhai mwaaen affayeo itan Lazarus, erupw wooan oanongan, epwan gaen ikkitto reen aesemaen imwaen mwaaen naiwiis we,

<sup>21</sup> egaen aeniaen pwe epwe mwongo peipeyin mwongo kena egaen ppiungtiw me wooan *table* we aaen mwaaen naiwiis we. Nge gonaag mwo nge reitto tumwuri minikkewe rupwun.

<sup>22</sup> Iwe mwaaen affayeo we a maenoa nge angkenus ra itto pwigi epwe noa mooat oaron

Abraham me noan gupwun we weei naaeng. Iwe nge mwaaen naiwiis we a pwan mae ra noa nip-waeni,

<sup>23</sup> nge noan nifierno wonowe a igin metaeg, a noa fattae a noa weri Abraham me itaaw noa, a noa weri Lazarus pwe eno oaron.

<sup>24</sup> Wonowe a faingi, 'Semaiei Abraham, faaye-owaei, wa fangenoa mwo Lazarus epwe rhiri aiut-tiun noan eew rhaan pwe epwe itto aepetapeta minne rheon iuuwaei pwe ngaang iya igin metaeg noan aengaetei!'

<sup>25</sup> Abraham a iura pwe, 'Wo maengiy rhag naeyi, pwe noan oatowe wo menaw nge oanongaen mini mwamwaai nge itto reemw, nge Lazarus iwe oanongaen mini aenneew nge enoa reen. Igina iya no noan kker nge een wa no noan waeiraes.

<sup>26</sup> Nge soapw pwan ina rhag, pwe eew niipw gin nennoan eno nepetarh, manekka remwerhaen faaeraeg wow me igaan nge resoapw mmwenen toowow, nge iyo kena remwerhaen faaeraegto me igina nge resoapw pwan mmwen.'

<sup>27</sup> Mwaaen naiwiis we a iura pwe, 'Iya tingoar aeffaenipirhe ngaeniug semaei Abraham wopwe fangenoa Lazarus reen imwaen mwaaen we semaei,

<sup>28</sup> igiwe reno rhooa nimman pwiiy ee. Aengaeni epwe noa a noa atapeonneoggiur pwe rete itto noan pwiuneoi e nenien waeiraes.'

<sup>29</sup> Abraham a iura pwe, 'Mwaaen kkewe pwi-imw ra fasiun tapeonneog reen Moses me profeta kkewe; repwe aiussaening ngaeni meeta repwe iura.'

<sup>30</sup> Mwaaen naiwiis we a paniuwaeni pwe, 'Ese

nnaaf minna, semaei Abraham! Pwe ngaere erhai e menaw sefaaen tae me reen mae a noa reer nge repwe toagun saengi monofitiir.’

<sup>31</sup> Abraham a iura pwe, ‘Aere rese aiussaening ngaeniir Moses me profeta kkewe, nge iir resoapw niugiuniug, inamwo me igine erhai e menaw sefaaen tae me reen mae noa.’”

## 17

### *Meeta Kka e Oamonofitiir Aeremas (Mat 18.6-7, 21-22; Mark 9.42)*

<sup>1</sup> Jesus a aengaeniir rhoaan kkayeo kkewe pwe, “Minikka e feoffeori pwe aeremas repwe monofit ina epwe wewwen rhag, nge ifa mwo aenneewan ngaeni aeremas na efeeori minikkeei pwe epwe wen!

<sup>2</sup> Efaer gacch ngaeni igine aere egeeogeeo tae efai fai temoag rhaepin iuuwan a aegekkaerh noa neeset me mmwaen aan feeori pwe erhai aet mwittig kaan epwe monofit.

<sup>3</sup> Iwe oawemwaeri meeta kkomwu oawgaen feeori!

“Aere igine erhai pwiimw emonofit, soong ngaeni, aere e toagun saengi aan monofit, saeneti noa.

<sup>4</sup> Aere igine emonofit ngaeniug faaen fisuuw noan eraaen, nge a gaen itto aengaeniug pwe, ‘ngaang iya toagun saengi monofitiy,’ wopwe pwan saeneti noa.”

### *Niugiuniug*

<sup>5</sup> Oapostonus kkewe ra aengaeni Soamwoon pwe, “Oatomoga noa aemaem niugiuniug.”

<sup>6</sup> Soamwoon a paniuwaeni pwe, “Aere aaemi niugiuniug eweei nepaen faiun *mustard* een, emmwen oawpwe aengaeni waniwan temoag een pwe, ‘Wisaegtae me waeroamw wa noa foat noa nee set!’ ina epwe rongorong ngaeniug.

### *Aaen Erhai Rhoan Akkiuneo Engaang*

<sup>7</sup> “Aere erhai noawumw rhoan akkiuneo engaang fetaen noan maat aere eaefaenni noawumw *sheep*, iwe nge enoa itto me noan maat, wopwe mmwenen aengaeni pwe aemwetekkaeyiug pwe epwene mwongo?

<sup>8</sup> Aapw aere! Wopwe faer aengaeni pwe, ‘Wonoa feeori aenaei mwongo, nge wa ngaettae mengaagiun oamw engaang nge wa itto ngoatto aenaei pwe ipwe mwongo nge iun; inoa moann nge een wonaaen mwongo.’

<sup>9</sup> Rhoan akkiuneo we mwo nge wosoapw ngaenneei aan aerhigerhig pwe iga etapweei oamw akkiuneo, aere meeta?

<sup>10</sup> Epwan ina rhag wusumi; oatona oawpwe oamoanna meeta oawpwe feeori, nge oawwa iura pwe, ‘Aemaem rhag rhoan akkiuneo; aeifeeori rhag engaang kka aemaem.’”

### *Jesus eAecchipwa Seig Mwaaen*

<sup>11</sup> Igiwe Jesus a nennoa ngaeni Jerusalem, efaeraeg wooan ayiuweyiuwen nepetaen Samaria me Galilee.

<sup>12</sup> Oatowe a toonong noan eew pwugos, a rhu-ungiir seig mwaaen kaenepaai. Reiu rhag me itaaw,

<sup>13</sup> nge ra aekkepwas, “Jesus! Soamwoon! Faayeogemaem!”

<sup>14</sup> Jesus a weriir nge a aengaeniir pwe, “Oawnoa aengaeniir patere pwe repwe worigaemi.”

Igiwe ra feffaaeraeg noa nge a rhiuw noa minikkewe kaenepaiiur.

<sup>15</sup> Oatowe erhai me neeiir a weri pwe a cchipw noa miniwe ginin, iwe a sefaaen, nge a gaen igin oatomogatae aan aepingepinga Deus.

<sup>16</sup> A itto aerheitiw oanongan reen pirheen Jesus a itto fang aan aerhigerhig. Mwaaen we nge erhai re Samaria.

<sup>17</sup> Jesus a kkepas nge a iura pwe, “Nge aetae iwe seig rhooa kkewe e mwamwaai noa giniir; nge ifa ikkiwe tiweman?”

<sup>18</sup> Meeta faaen minne waseona een rhag minne e sefaaeneto pwe e itto fang aaen Deus aerhigerhig reen?”

<sup>19</sup> Nge Jesus a aengaeni pwe, “Iutae wa noa; pwe oamw niugiuniug a aetekkoagtae.”

*Itton Minna Mweoiun Deus  
(Mat 24.23-28, 37-41)*

<sup>20</sup> Aekkaerhai Pharisees re aeiineow Jesus in-eeta epwe itto minna Mweoiun Deus. Nge a pani-uwaeni pwe, “Minna Mweoiun Deus ina esoapw itto nge noan taeppen we sipwe rhuungi.

<sup>21</sup> Esooar ne epwe iura pwe, ‘Oaw pipiiy pwe ieei iiy!’ aere ‘Inaan iiy!’; pwe minna Mweoiun Deus ina a no neemi.”

<sup>22</sup> Iwe aengaeniir rhoaan kkayeo kkewe naiun pwe, “Eyor oatokka oaw aeneaneeni pwe oawpwe weri ew minikkena raaenin mwaaen we Naiun Aeremas, nge oawsoapw weri.

<sup>23</sup> Eyor manekka repwe aengaenigaemi pwe, ‘Fannoa iginaan!’ aere, ‘Fatto igaan!’ Nge aemi oawsoapw toowow noa giutta fetaeneei.

<sup>24</sup> Pwe igine epwene weriwer noan naaeng nge e aesserema noa noan naaeng, ina epwe pwan ina wusun mwaaen we Naiun Aeremas noan minna raaenin.

<sup>25</sup> Nge mmwan, ina epwe igin affayeo me serhoawun me reer aeremesaen raaennekkeei.

<sup>26</sup> Epwe pwan taeppen miniwe ewen mweoiun Noah, ina epwe pwan wen noan raaenin mini Naiun Aeremas.

<sup>27</sup> Oanongeer aeremas rerhiuwen mwommwongo me kukkupwun, nge mwaaen me rhoopwut repwiuppwiuniuw toori raaenin we Noah a teeotae rhiun pwoot we waan, iwe eitto rhag noataer we niir noa oanongeer.

<sup>28</sup> Epwe pwan taeppen wenimweoiun Lot. Oanongeer aeremas nge re mwongo noa rhag me kkupwun noa rhag, nge re chuwaai fetaen, foato fetaen, me kiau fetaen iimw.

<sup>29</sup> Noan raaenin we Lot a nigiti Sodom, aengaet me *sulfur* a piungtiw me noan naaeng a ittiw niir noa oanongeer.

<sup>30</sup> Epwe pwan ina wusun minne epwe wen noan raaenin na epwe pwaeto mwaaen we Naiun Aeremas.

<sup>31</sup> “Noan raaenin naan nge iyo eno wooan wungaen iimw, esoapw teotiw no nee iimw epwe pweipwog pisaegin; pwan ina rhag wusun iyo eno noan maat pwe esoapw pwan sefaaen noa nee iimw.

<sup>32</sup> Oaw maengiy rhag niewe pwiuniuwaei Lot!



<sup>33</sup> Iyo na emwerhaen epwe ammwarhiu menewan ina epwe ppiung saengi; nge iyo na eppiung saengi menewan, ina epwe menaw.

<sup>34</sup> Ipwe aengaenigaemi, pwe noan pwongin naan riiurhai aeremas re maiur wooan eew pooa; erhai repwe pwigi noa nge erhai epwe notiw.

<sup>35</sup> Riiurhai rhoopwut repwe ammaat mwongo; erhai repwe pwigi noa nge erhai epwe notiw.

<sup>36</sup> [Igine riiurhai mwaaen repwe engaang noan maat nge erhai ra pwigi noa nge erhai a notiw.]\*

<sup>37</sup> Rhoosan akkiuneo kkewe naiun ra aeiineow pwe, “Iya, Soamwoon?”

Jesus a paniuwaeni pwe, “Ese tiwegin igine epwe yor erhai manimae ee, nge witiyas repwe mweoiuto reen.”

## 18

### *Fioang Awewen Erhai Rhoopwut Mae Pwiuni- uwan me Erhai Soaw Kapwiung*

<sup>1</sup> Iwe Jesus a fioangei ngaeniir rhoosan kkayeo kkewe naiun eew fioangon awewe pwe repwe memmaeipin noa rhag oanongaen oat nge re-soapw mwetekkaein fangetae.

<sup>2</sup> “Eno erhai soaw apwiung noan eew aepinoamw nge ese mesagiu Deus nge ese pwan aesirowuur aeremas.

<sup>3</sup> Noan aepinoamw we nge epwan no erhai rhoopwut a mae pwiuniuwan, nge esoow ikkitto rhag reen pwe epwe tipaengi nge a aengaeni pwe, ‘Tipaengiaei me reer rhoosan appaniuwaen ngaeniaei.’

---

\* **17:36** Petenan eei nge esoano noan aekkaew petenan kka efoatofoat noan kkepesaen Greek.

<sup>4</sup> A ssiunaei aaen soaw apwiung we ese mwerhaen tipaengi rhoopwut we, nge enoa mwirin nge a maengiy nong rhag noan tipan pwe, ‘Inamwo ikka ise mesagiu Deus aere aesirowu aere-mas,

<sup>5</sup> iwe nge iga rhoopwut een a soaw ikkitto rhag angiurhiuwaei, iwe ipwene feori ngaeni meeta na e tipaeni. Ngaere ise feori ngaeni nge ina epwe ikkitto rhag angiurhiuwaei toori aaei sipegin aerhigerhig noa.’”

<sup>6</sup> Iwe Soamwoon a pwan iura pwe, “Oawaiussaening ngaeni meeta soaw apwiung aenneew we a iura.

<sup>7</sup> Iwe Deus esoapw faer ppaeniir aeremas kkena a finiir iga ra sessaeng ngaeni rhag neepwoong me neeraaen pwe epwe tipaengiir? Oawniuwaennei nge epwe mmwaei aan tipaengiir?

<sup>8</sup> Ipwe aengaenigaemi pwe Deus epwe mwetekkai aan oayoow ngaeniir minikkena iir re tipaeni. Iwe oawniuwaennei pwe mwaaen we Naiun Aeremas epwe weri tiwegin me woan soanop reen oatonoa epwe sefaaeneto?”

### *Fioang Awewen Erhai Pharisee me Erhai Rhooan Iyoiyon Tax*

<sup>9</sup> Jesus a pwan fioangei awewe een ngaeniir aeremas kka remaengiy pwe iir regacch noa memmweer aaemweoi iwe nge oanongeer aere-mas re sessoan tiw faer.

<sup>10</sup> “Nonno noa woor riiurhai mwaaen renoa noan *Temple* we pwe repwe noa maeipin; erhai Pharisee nge erhai rhoan iyoiyon *tax*.

<sup>11</sup> Pharisee we a noa imweoi noa pwe a maeipin nge a iura pwe, ‘Wa aerhigerhig Deus pwe ngaang ise rhegoaw, ise oatupwutupw, me maiur ngaeni pwiuniuwaen erhai, taeppeer aeremas kka aaemweoi. Wa aerhigerhig pwe ngaang ise taeppen rhoan iyoiyon *tax* na eno iginaan.

<sup>12</sup> Ngaang ise mwongo noan riuraan noan eew *week*, nge iya fang ngaeniug giniginin eew me reen seig me reen oanongan noa meeta pani-uwai.’

<sup>13</sup> Nge rhoan iyoiyon *tax* we eiu me itaaw noa nge ese mmwen mwo nge epwe fattae weei naaeng, a gaen tugutuguw ne aiungan nge a gaen iura pwe, ‘Deus, faayeowaei, ngaang erhai man monofit!’”

<sup>14</sup> Jesus a iura pwe, “Ipwe aengaenigaemi pwe rhoan iyoiyon *tax* naan nge saapw Pharisee naan minne enoa nee iimw nge e mwamwaai me noan sapweoiniun Deus. Pwe iyo na e aetaegiasa tae epwe sessoanotiw, nge iyo na epwe oasosson-aetiw epwe taegias tae.”

*Jesus a Maeipinaar Wonigaet Mwittig  
(Mat 19.13-15; Mark 10.13-16)*

<sup>15</sup> Aaemweoi aeremas repwigito naiiur wonigaet mwittig pwe Jesus epwe iseni tae paiun wooar. Rhoan kkayeo kkewe naiun ra weriir nge ra soong ngaeniir reen miniwe refeeori,

<sup>16</sup> nge Jesus a faingiir aetekke nge a aengaeniir pwe, “Fangeto aetekkena reei, nge oaw-soapw aiugiiur, pwe minna Mweoiun Deus ina aar aeremas kka reweer wonigaet.

17 Ennetaen, ipwe aengaenigaemi pwe iyo na ese aetiwa Mweoiun Deus taepfen erhai wonigaet, nge esoapw toonong noan.”

*Erhai Mwaaen Naiwiis  
(Mat 19.16-30; Mark 10.17-31)*

18 Erhai soamwooniir Jews a aeiineow Jesus pwe, “Sinsei mwamwaa, meeta ipwe feeori nge epwe yo ngaeniaei menaw na esooar iaenin?”

19 Jesus a aengaeni pwe, “Meeta woiura pwe imwamwaa, reen?” Esooar erhai ne emwamwaa pwe aeggaen Deus rhag.

20 Wogiuneei anniug kkewe: wosoapw ffeor manetmwaai, wosoapw nni aeremas, wosoapw mwoarho, wosoapw oatupwutupw tae kkepas wooan erhai, aesirowuur semoamw me inoamw.

21 Mwaaen we a paniuwaeni pwe, “Saengi rhag neenipwaen wonigaetei nge ngaang itapweei oanongaen oasoapwosoapw kkeei.”

22 Igiwe Jesus a rongorong miniwe nge a aengaeni pwe, “Erhiuwen no eew minne wopwe feeori. Wonoa ameow noa oanongaen pisaegimw nge wa fang senaapian ngaeniir rhooa affayeo, ina nge epwe yor wiinoamw me woainaaeng. Iwe wa itto wopwe itto tapweaei.”

23 Igiwe mwaaen we a rongorong miniwe a igin aenneew tipan, pwe igiwe iiy erhai man naiwiis.

24 Jesus a weri pwe a aenneew tipan nge a iura pwe, “Ifa mwo waeiraesin aar rhoakka repisaegisaeg repwe toonong noan minna Mweoiun Deus!

25 Egin mererhaeg aen erhai *camel* epwe toonong noan ngetaen efoarh oaguwa, me

mmwaen aen erhai mwaaen pisaegisaeg epwe toonong noan minna Mweoiun Deus.”

<sup>26</sup> Rhooa kkewe re rongorong miniwe ra aeiineo pwe, “Iwe, iyo rhag epwe mmwenen menaw?”

<sup>27</sup> Jesus a paniuwaeni pwe, “Minikkena ese mmwen ngaeniir aeremas nge emmwen ngaeni Deus.”

<sup>28</sup> Peter a iura pwe, “Pipiiy! Aemaem aeiya nigiti pwugusaemmaem nge aeiya itto tapweog.”

<sup>29</sup> Jesus a aengaeniir pwe, “Ennetaen, ipwe aengaenigaemi pwe aere erhai esiusaengi imwan, aere pwiuniuwan, aere pwiin, aere seman aere inan, aere naiun pwe faaen itaen minna Mweoiun Deus,

<sup>30</sup> ina epwe gin temoag minne epwe pwigi reen oate igina, nge noan oatona epwe itto epwe pwan pwigi menaw na esooar iaenin.”

*Aeinuwaen Aen Jesus Aepesa Aan Maenoa  
(Mat 20.17-19; Mark 10.32-34)*

<sup>31</sup> Jesus a paeniir noa rhooran akkiuneo kkewe seig me riiurhai a aengaeniir pwe, “Oaw aiussaening! Sipwene noa Jerusalem nge oanongaen meeta kkewe profeta kkewe reiura pwe wunuunun mwaaen we Naiun Aeremas ina epwene nnetaan wen.

<sup>32</sup> Repwene iseni nong neepaiiur Gentiles, ina repwene aeni aegekkaei, me aessaewa, nge reoattuffa.

<sup>33</sup> Repwene wirhiy nge reniiy noa, mwirin enuuw raaen nge a menaw sefaaen tae.”

<sup>34</sup> Nge rhooran akkiuneo kkewe naiun nge rese metefaaegini minikkewe; pwe faan kkepas kkewe

nge emwoan saengiir, iwe rese metefaaegini meeta kkewe Jesus e aepesa.

*Jesus a Aeffetanoa Mesaen Erhai Mwaaen Parh  
(Mat 20.29-34; Mark 10.46-52)*

<sup>35</sup> Jesus a aekkaerepa to Jericho, igiwe erhai mwaaen parh emooaton wenepeigin aan nge etittingoar noa rhag.

<sup>36</sup> Igiwe a rongorong aar rhoonanap we itto faaeraeg noa me oaron, nge a aeiineeor pwe, “Meeta eei?”

<sup>37</sup> Ra aengaeni pwe, “Jesus re Nazareth iye epwe faaeraeg na me igeei.”

<sup>38</sup> Mwaaen we aekkepwas noa, “Jesus, Naiun David, faayeowaei!”

<sup>39</sup> Aeremas kkewe reno mmwan ra soong ngaeni pwe epwe anniug noa. Nge egius mwo nge oatomoga noa aan iyaekkepwas, “Naiun David, faayeowaei!”

<sup>40</sup> Jesus a iug noa nge a akkiuneo pwe repwe pwigito man masparh we reen. Igiwe a arapeto nge Jesus a aeiineow pwe,

<sup>41</sup> “Meeta wa tipaeni pwe ipwe feeri ngaeniug?”

Nge a paniuwaeni pwe, “Soawumwaer! Ngaang i mwerhaen ipwe weriwer sefaaen.”

<sup>42</sup> Jesus a aengaeni pwe, “Iwe fanoa pwe wopwe weriwer! Oamw niugiuniug a aecchipwoag.”

<sup>43</sup> Iwe rhag nge wonowe a ffatenoa mesan, iwe a tapweei Jesus iwe a itto fang aen Deus aerhigerhig. Igiwe rhoonanap we ra weri miniwe ra aepingepinga Deus.

# 19

## *Jesus me Zacchaeus*

<sup>1</sup> Jesus a itto noan Jericho iwe ra feffaaeraeg noa.

<sup>2</sup> Eyor erhai soamwoonin rhoon iyoiyon *tax* itan Zacchaeus, erhai man naiwiis.

<sup>3</sup> Iiy e aekkaegina epwe weri Jesus nge igiwe iiy erhai mwaaen mwittig ese weri Jesus me noan pwuwa we.

<sup>4</sup> Iwe a fattapw noa me mmwaen pwuwa we a noa teeotae woan efoarh waniwan pwe epwe weri Jesus aan faaeraeg noa me igiwe.

<sup>5</sup> Oatowe Jesus enoa itto pwiuneoi we, enoa fattae a weri Zacchaeus iwe a aengaeni pwe, “Mwetekkaetiwiw Zacchaeus pwe ipwe no noan iimw we imwoamw raaneeni.”

<sup>6</sup> Zacchaeus a teo mwetekkaetiwiw a itto aewen-immwa Jesus noan aan kker.

<sup>7</sup> Oanongeer aeremas kkewe ra weri minikkewe a rhaepetae aar mwangiuniungiun pwe, “Mwaaen een epwene noa no noan imwaen erhai man monofit!”

<sup>8</sup> Zacchaeus a iutae nge a aengaeni Soamwoon pwe, “Soawumwaer! Ngaang ipwene fang esoapw pisaegiy ngaeniir man affayeo, nge ngaere eyor mane iriugiuriug ngaeni nge ipwe aesefaaeni paniuwaen minikkena aan faaen faawu.”

<sup>9</sup> Jesus a aengaeni pwe, “Menaw a toori imweei raaneeni, pwe pwan mwaaeneeni nge pwan iiy teoteeon Abraham.

<sup>10</sup> Manewe Naiun Aeremas eitto giut nge eitto aemenewaar rhooa mwaenirh noa.”

*Fioangon Faiun Gold*  
(Mat 25.14-30)

<sup>11</sup> Nugunupaen aar aeremas aiussaening minikkei nge Jesus a soapwei noa aan kkepas nge a fioangei ngaeniir eew fioangon awewe. Igina nge a aekkaerepa noa Jerusalem, nge rhoawe ra niuwaennei pwe miniwe Mweoiun Deus epwene oaropaen pwaeto.

<sup>12</sup> A iura pwe, “Eno erhai mwaaen taegias epwene noa wooan eew faniuw taaw noa epwene noa no pwe *king*, nge mwirin a sefaaeneto nee pwugusan.

<sup>13</sup> Wenimmwaen aan epwe noa a faingi fengaenniir rhoan akkiuneo kkewe naiun iwe seig, nge a ngaenneer eew tutuun *gold* nge a aengaeniir pwe, ‘Oaw giutta ngaere eyor minne oawpwe aemenewa ngaeni minneen igine ipwene noa.’

<sup>14</sup> Iwe nge aeremas kkewe naiun nge re oapwuta, iwe ra fangenoa rhoan pweipwogin mwaenieer wooan faniuw we eew pwe, ‘Aemaem aeise tipaeni mwaaen een pwe epwe no pwe aemaem *king*.’

<sup>15</sup> “Ra oatonongei mwaaen we pwe *king* nge a noa sefaaeneto. Iwe rhag nge a akkiuneo rhoan engaang kkewe naiun pwe repwe itto reen pwe epwe pipiiy a ifa nepaen minne ra aemenewa ngaeni senaapiy kkewe.

<sup>16</sup> Iwe egommw a iura pwe, ‘Menap, a seig aan paer noa faiun *gold* minne iya aemenewa ngaeni iwe efai iwe wo ngaenneaei.’

<sup>17</sup> Mwaaen we a iura pwe, ‘Wo igin mwamwaa. Een erhai rhoan akkiuneo we woigin



mwamwaa! Pwonno iga min paerhigerhig mwo nge wo aniugiuniug noan, een wopwene nemaeni seig aepinoamw.'

<sup>18</sup> Rhooan akkiuneo we ariiurhaiun a noa itto a iura pwe, 'Menap, a nimowu aan paer noa faiun *gold* minne iya aemenewa ngaeni iwe wongaenneaei.'

<sup>19</sup> Iwe mwaaen we a iura pwe, 'Een wopwene nemaeni nimowu aepinoamw.'

<sup>20</sup> Iwe erhai a noa itto nge a iura pwe, 'Menap, ieen faiun *gold* we noawumw ioapa noan eew mengaag.

<sup>21</sup> I mesagiug pwe iga een erhai mwaaen sosoong. Wopwigi minikka saapw oamw nge woginiy minikka saapw foatogiyoamw.'

<sup>22</sup> Mwaaen we a aengaeni pwe, 'Een erhai rhooan akkiuneo eaenneew! Minikkomwu mwaenioamw nge ipwene oamonofitiug wooan! Wogiuneei pwe ngaang erhai man sosoong, ipwigi mwo nge minikka saapw aaei nge iginiy uwaen irae kena ise foatogi.

<sup>23</sup> Iwe meeta rhag wose ngoannong senaapiy we naeyi noan *bank* reen? Ina nge ipwe pwigi nge epwene yor menewan iga iya sefaaeneto.'

<sup>24</sup> A aengaeniir rhoa kkewe re iu pwe, 'Pwigi saengi mwaaen mwuun faiun *gold* na nge oawwa ngaenneei mwaaen we seig naiun faiun *gold*.'

<sup>25</sup> Nge ra aengaeni pwe, 'Menap, a fasiun seig naiun *gold*!'

<sup>26</sup> A iura pwe, 'Ipwe aengaenigaemi pwe, iyo a yor meeta aan nge repwe pwan fang ngaeni, nge iyo ese yor meeta aan nge repwe pwigi saengi mwo nge iwe egius iwe eyor reen.

27 Igina, nge rhooa kkewe rhoaan kkoapwutoi ikkiwe rese tipaeni pwe ipwe no pwe aar *king*, oawpwigiir to igeei, iwe oawwa itto niir tiw me weni mmwaei!”

*Toonongon Jesus Noan Jerusalem  
(Mat 21.1-11; Mark 11.1-11; John 12.12-19)*

28 Mwirin aaen Jesus aepesa minnee, nge a gommw noa wenimmweer ra noa ngaeni Jerusalem.

29 Igiwe a aerepato Bethphage me Bethany me reen miniwe rhugun *Olives* nge a akkiuneeor noa riiurhai rhoaan kkayeo kkewe naiun

30 nge a aengaeniir pwe: “Oawnoa noan pwugos mwu mmwaemi; nge oatona oawpwe toonong nge oawpwe weri erhai *donkey* mwittig e feotaeg ina esaaen yor mwo erhai ne ewaawa. Oawpwaesi oawwa pwigito igeei.

31 Ngaere igine aeremas eaeiineogaemi aere meeta oawsaeneti reen, oawwa aengaeni pwe Soamwoon emwerhaen waawa.”

32 Ra noa nge oanongaen min kkewe Jesus e aengaeniir nge ewen ngaeni.

33 Igiwe ra pweppwaesi ooas mwittig we nge manewe naiun a mwaenieniy ngaeniir, “Meeta oawwa pwaesi noa reen?”

34 Ra paniuwaeni pwe, “Maasta emwerhaen waawa”,

35 iwe ra pwigi noa *donkey* we reen Jesus. Ra iseni tae minikkewe mengaagiiur woan, iwe ra iseni tae Jesus woan.

36 Igiwe Jesus a faaeraeg nge aeremas ra mmer-aeg tiw mengaagiiur woan ennap we.

<sup>37</sup> Igiwe a aerepato Jerusalem, pwiuneoi we enap we e ittiw me reen rhugun *Olives*, rhooa towunap kkewe naiun rhoan kkayeo ra rhaepetae aar fang aan Deus aerhigerhig, nge re aekkepwas temoag tae reen aar aepingepinga Deus reen oanongaen manaman kkena ra weri.

<sup>38</sup> Ra iura pwe, “Deus epwe aewenepwuwa *king* na eitto faaen itaen Soamwoon! Oapoas me wooai naaeng me nning ngaeni Deus na oarosaen taegias!”

<sup>39</sup> Aaemweoi Pharisees reno noa pwuwa we ra aengaeni Jesus pwe, “Sinsei, mwaenieniy ngaeniir rhoan kkayeo kkomwu noawumw pwe resoapw oacchorong!”

<sup>40</sup> Jesus a paniuwaeniir, “Ipwe aengaenigaemi pwe, aere igine repwe anniug, ina nge fai kaan minne repwe aekkepwas.”

### *Jesus a Saengiti Jerusalem*

<sup>41</sup> Igiwe Jesus a aerepato aepinoamw we, nge oatowe eweri nge a saengiti,

<sup>42</sup> nge a iura pwe, “Aetaemwo wogaen giuneei raaeneei meeta minne epwe pwigito oapoas! Nge igina een wosoapw mmwenen weri!

<sup>43</sup> Eew oat epwe noa itto rhoan kkoapwutomw repwene roangeog noa, nge re aetippoag, nge ra pineyi saengiug oanongaen pwiuneoi.

<sup>44</sup> Repwene oatoaropoag noa een me aeremas kkomwu noan minimwu neniemw; esooar efai faai kaan ne epwe notiw nenien, pwe iga een ese pwae ngaeniug oatowe Deus eitto pwe epwe aemenewoag!”

*Jesus a Noa Noan Temple we  
(Mat 21.12-17; Mark 11.15-19; John 2.13-22)*

<sup>45</sup> Jesus a noa noan *Temple* we nge a rhaepetae aan asiur wow rhoan ameomeo kkewe reno noan,

<sup>46</sup> a aengaeniir pwe, “Efoatofaat noan Pwapwior we e Santus pwe Deus e aepesa pwe, ‘*Temple* e aaei nge imwaen maeipin.’ Nge aaemi oawwa ssiuweniy pwe nenien wopoor rhoa mwoarho!”

<sup>47</sup> Oanongaen raaen nge Jesus e fenai noan *Temple* we. Soamwoonin patere me sinsein anniug me soamwooniir aeremas kkewe ra mwerhaen niy noa,

<sup>48</sup> nge ina rhag esooar eew meeta ne regiuneei pwe repwe feori ngaeni, pwe igiwe oanongeer aeremas kkewe nge re tipaeni repwe aiussaening ngaeni minikkewe petenaen mwaenian.

## 20

*Kkepas Aeiineon Nemaeniaen Jesus  
(Mat 21.23-27; Mark 11.27-33)*

<sup>1</sup> Eraaen igiwe Jesus e fenai ngaeniir aeremas me noan *Temple* we, efenaiuw Kkepas Mwamwaai we, nge soamwooniir patere, me sinsein anniug me fengaen me rhoa kkewe ra tugufaeyi ra noa itto

<sup>2</sup> nge ra aengaeni pwe, “Meeta nemaenioamw pwe wopwe feori minikkei? Iyo a ngaenneog oamw nemenem?”

<sup>3</sup> Jesus a paniuwaeniir pwe, “Ipwe aeiineogaemi eew kkepas aeiineo. Oaw aengaeniaei,

<sup>4</sup> iya e itto aaen John nemenem pwe epwe paptismus fetaen: saengi Deus aere saengi aeremas?”

<sup>5</sup> Ra rhaepetae aar aengimaw fengaen woor, “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Nge meeta rhag oawse niugiuniug ngaeni John reen?”

<sup>6</sup> Nge aere sipwe iura pwe, ‘Saengi aeremas,’ ina nge pwuwaen aeremas eei nge repwene teragirh, pwe iga reniugiuniug pwe John nge erhai profeta.”

<sup>7</sup> Ra paniuwaeni pwe, “Aeise giuneei iga eitto me ee.”

<sup>8</sup> Iwe nge Jesus a aengaeniir pwe, “Ina nge ngaang isoapw pwan aengaenigaemi iya iga ipwigi me ee nemaeniaei pwe ipwe feeori minikkeei.”

*Fioangon Awewen Rhoan Aemmwenen Maat we*  
(*Mat 21.33-46; Mark 12.1-12*)

<sup>9</sup> Iwe Jesus a aeni eew fioang awewe ngaeniir aeremas kkewe. “Eno erhai mwaaen a foatogi eew maetaen *grape*, nge a ngaenneer aaemweoi rhoan maat pwe repwe aefaenniy. Iwe rhag nge a saei taaw noa.

<sup>10</sup> Enoa itto oatowe repwe giniiy uwaen waniwan kkewe, a fangenoa erhai rhoan akkiuneo pwe epwe noa pwigi wiwiin me reen uwaen maat kkewe. Nge rhoan maat kkewe ra wirhiy nge ra aesefaaeni noa nge esooar meeta epwigi.

<sup>11</sup> Iwe a pwan fangenoa erhai rhoan akkiuneo; rhoan maat kkewe ra pwan noa wirhiy nge ra feeori ngaeni aekkaew wegitaeg aessaew nge re aesefaaeni noa nge esooar meeta epwigi.

<sup>12</sup> A pwan fangenoa aeiniurhaiun rhoon akki-  
uneo kkewe; rhoon maat kkewe ra pwan oa-  
woasu nge re aerheiwow niugiun maat we.

<sup>13</sup> Manewe aan maat we a iura pwe, ‘Meeta  
minne ipwene feeori? Maeni ipwene fangenoa  
aeterhaeng enaeyi; etiwegin nge repwe  
aesirowu!’

<sup>14</sup> Nge igiwe rhoon maat we ra weri, ra  
pwiungiuw fengaenniy woar pwe, ‘Ieei mwaaen  
we naiun mwaaen we aan maat eei iwe epwe  
pwugusaeni minnee. Oawitto sipwe niy noa,  
pwe sipwe pwigi minne pwugusaen pwe pwu-  
gusarh!’

<sup>15</sup> Iwe ra oatorawow niugiun maat we nge ra  
niy noa.”

Jesus a aeineeor pwe, “Meeta manewe aan  
maat we epwe feeori ngaeniir rhoon maene-  
maen kkewe?

<sup>16</sup> Epwe itto a itto niir noa mwaaen kkewe, nge  
a ngaenneer aaemweoi maat we.”

Igiwe aeremas ra rongorong minnee nge ra  
iura pwe, “Aapw saapw ina!”

<sup>17</sup> Jesus a wegitaeg ngaeniir nge a aeineeor  
pwe, “Iwe ina nge meeta awewen miniwe noan  
Pwapwior we e Santus?

‘Fai we rhoon kaiu iimw re aerheei noa,  
nge faer ina fai we egin yor ipitan me mmwaen  
oanongan.’

<sup>18</sup> Oanongeer rhoakka repwe ppiungiutiw  
woan faai een nge repwe mwetoarotoar noa;  
nge aere faai een epwe ppiungiutiw woan erhai,  
epwe aepettatiw.”

*Kkepas Aeiineon Tax*  
(*Mat 22.15-22; Mark 12.13-17*)

<sup>19</sup> Sinsein anniug me soamwoonin patere kkewe ra mwerhaen repwe torofi Jesus, pwe igiwe regiuneei pwe fioangoor miniwe a aengaeniir; nge igiwe remesagiur aeremas kkewe.

<sup>20</sup> Iwe ra weti ngaeni eew oat ne repwe mmwennen torofi. Ra fang ngaeniir aaemweoi mwaaen senaapiy pwe repwe noa feoriir noa pwe iir aaemweoi mwaaen wenewen, iwe ra fangenoa iir pwe repwe noa oatupwu Jesus pwe repwe torofi reen aan kkepas pwe epwe mmwen pwe repwe fangenoa iiy reen *Governor* reen Rome ina eyor maemaewan.

<sup>21</sup> Iwe aeremas kkewe ra aengaeni Jesus pwe, “Sinsei, aegiuneei pwe minikkomwu wo aepesa nge e wenewen. Aei giuneei pwe een wose aefaeniy wunuunun erhai me erhai, nge wa fenaiuw wenewenen nee tipaen Deus ngaeniir aeremas.

<sup>22</sup> Aengaenigemaem, e mwamwaai aarh sipwe fang *tax* ngaeni Soamwoonin Rome, aere aapw?”

<sup>23</sup> Jesus e metefaaegini oatupwutupw we aar nge a aengaeniir pwe,

<sup>24</sup> “Pwaerito efai senaapiy *silver*. Mesaen iyo me itaen iyo imwu eno wooan?”

Ra paniuwaeni pwe, “Soamwoonin Rome.”

<sup>25</sup> Jesus a iura pwe, “Iwe ina nge oaw ngaenneei Soamwoonin Rome meeta aaen Soamwoonin Rome, nge oawngaenneei Deus meeta aaen Deus.”

<sup>26</sup> Iwe esooar meeta ne emmwen pwe repwe torofi Jesus reen petenaen kkepas kkewe

epaniuwaeni ngaeniir me weniimmweer rhooa towunap we, iwe ra anniug noa rhag pwe ra mwaar reen sefaaenin kkepas kkewe aan.

*Kkepas Aeiineon Menaw Sefaaen*  
(*Mat 22.23-33; Mark 12.18-27*)

<sup>27</sup> Aaemweoi Sadducees, iwe re iura pwe esooar menaw sefaaen me reen mae, ra itto aengaeni Jesus pwe,

<sup>28</sup> “Sinsei, Moses minne e foatogi anniug eei pwe aemaem: ‘Aere erhai mwaaen a mae nge esooar naiun wooan rhoopwut we pwiuniuwan, ina nge mwaaen we pwiin epwe pwiuniuwaeni rhoopwut we pwe epwe yor naiun pwe epwe ffai pwe naiun mwaaen we a mae.’

<sup>29</sup> Reno fusiuman pwipwi; mwaaen we etugufaeyi a pwiuniuwaeni nge emae noa nge esooar naiun.

<sup>30</sup> Iwe ariiurhaiun a pwan pwiuniuwaeni rhoopwut we,

<sup>31</sup> pwan ina rhag iwe aeiniurhaiun. Oanongeer me fusiuman nge ina rhag miniwe ewen ngaeniir. Remae noa nge esooar naiiur.

<sup>32</sup> Mwirin noan, nge rhoopwut we a maenoa.

<sup>33</sup> Iwe igina, wooan raaenin na manimae repwene menaw sefaaen, iyo me neeiir epwe pwiuniuwaeni rhoopwut we? Pwe igiwe rhooawe fusiuman nge repwiuniuwaeni niewe.”

<sup>34</sup> Jesus a paniuwaeniir pwe, “Mwaaen me rhoopwuton faaen mweoiuw nge re rhooan ngaenne,

<sup>35</sup> iwe nge mwaaen me rhoopwut kena ra ffin tae pwe repwe menaw sefaaen iwe nge ra no noan



mweoi na epwe noa itto nge ina resoapw rhiuwen pwiuppiuniuw.

<sup>36</sup> Iir repwene weei rhag angkenus pwe re-soapw mmwenen mae. Ra no pwe naiun Deus pwe ra menaw sefaaen me reen maenoa.

<sup>37</sup> Moses a aeffeta noa pwe manimae nge remenaw sefaaen tae. Me reen petenaen fioan-gon waniwan we e ppwunuwow aengaet me reen iwe e aepesa kkepessaen Soamwoon pwe, ‘aaen Abraham Deus, aaen Isaac Deus, me aaen Jacob Deus.’

<sup>38</sup> Pwe iiy minne aar Deus rhoakka re menaw nge soapw rhoakka ra mae, pwe me reen nge oanongeer aeremas nge re menaw me reen.”

<sup>39</sup> Aekkaaemweoi me neeiir sinsein anniug we ra mwaenieniy tae, “Sinsei, eigin gacch aesse-faaenin kkepas we oamw!”

<sup>40</sup> Pwe iir ra mesag pwe repwe aeiineo mwo nge eew kkepas aeiineo.

*Kkepas Aeiineon Iyo na Kristus  
(Mat 22.41-46; Mark 12.35-37)*

<sup>41</sup> Jesus a aeiineeor pwe, “Meeta emmwen pwe re iura pwe Kristus nge teoteeon David reen?”

<sup>42</sup> Pwe David woan oanongan nge eiura me noan pwapwior we Psalms,  
‘Soamwoon a aengaeniaei Soamwoon:  
Mooat tiw peig mwaaneei

<sup>43</sup> toori aaei ipwe iseniir tiw rhoan oapwutoag faaen pirhemw

pwe repwe no pwe nenien pirhemw.’

<sup>44</sup> David e faingi pwe iiy ‘Soamwoon’; iwe nge e ifa wusun nge Kristus epwe no pwe teoteeon David?”

*Jesus a Atapeonneoggiur Reen Sinsein Anniug Kkewe*

*(Mat 23.1-36; Mark 12.38-40)*

<sup>45</sup> Igiwe aeremas re aiussaening ngaeni nge Jesus a aengaeniir rhoon kkayeo kkewe naiun pwe,

<sup>46</sup> “Oawaefaennigaemi reen sinsein anniug kkewe, reaerhaengi aar faaeraeg fetaen faaen mengaaggiur min enaenaei, nge reaerhaengi aar aeremas repwe aewenimmwaar me aesirowuur me noan imwaen chuwaai, nge re fini rhag neniyy kkena nenieer rhooa taegias me noan wutteer Jews me pwiuneoi mwamwaai me noan gupwun.

<sup>47</sup> Reoapwurhaar rhoopwut kkewe ra mae pwiuniuweer, nge ra pirifa saengiir pwuguseer, nge ra oangona ngaeniir aeremas aar maepin enaei! Iwe nge aegaeregaeriir ina epwene igin waeiraes!”

## 21

*Maenigaech we Aaen Rhoopwut we a Mae Pwiuniuwan*

*(Mark 12.41-44)*

<sup>1</sup> Jesus a fan fetaen nge a weriir rhooa naiwiis pwe ra iseis nong aar maenigaech noan nenien maenigaech me noan *Temple* we,

<sup>2</sup> iwe nge a pwan weri erhai rhoopwut mwaenene a maenoa pwiuniuwan a iseis nong riiufai manfaifai pwe aan maenigaech.

<sup>3</sup> Nge a iura pwe, “Ennetaen, ipwe aengaeni-gaemi pwe maenigaech na rhoopwut mwaenene we efang ina e temoag saengi aar oanongeer aeremas towunap kkewe.

<sup>4</sup> Pwe oanongeer nge re iseni nong nusegin wi-ineer; nge rhoopwut een inamwo iga eigin af-fayeo nge efang oanongaen minikkenena eno reen.”

*Jesus e Aepesa Toaroponoan Temple we  
(Mat 24.1-2; Mark 13.1-2)*

<sup>5</sup> Aaemweoi me neeiir rhooran kkayeo kkewe re fiffioangei *Temple* we reen nningen faai kkewe eno wooan me niffang kkewe aar aeremas ngaeni Deus. Nge Jesus a iura pwe,

<sup>6</sup> “Oanongaen minikka oawwa weri, ina eyor eew oat ina epwe noa itto nge esooar efai faai kaan ne epwe notiw nenien; oanongan noa nge repwene toaropoti.”

*Affayeo me Aewwaeiraes  
(Mat 24.3-14; Mark 13.3-13)*

<sup>7</sup> Ra aeiineow pwe, “Sinsei, ineeta epwe wen minneei? Meeta na epwe wen nge epwe pwaeri ngaenigemaem pwe minikkeei nge epwene wen?”

<sup>8</sup> Jesus a iura pwe, “Oawaefaennigaemi; oaw-teorh tupw. Towuneppeer aeremas repwene itto faaen itaei nge repwene aepesa pwe, ‘Ngaang minne iiy! A ieei oatowe!’ Nge oawsoapw tap-weer.

<sup>9</sup> Oawsoapw mesag igine oawpwe rongorong kkepessaen moawun me fitigogon weni faniuw; ik-keei minikka epwe mmwaen wen, iwe nge saapw reen a arapeto ne soapwonoan.”

<sup>10</sup> A pwan soapwei noa a pwan iura pwe, “Faniuw me faniuw nge repwene fiow fengaen, eew mweoi me eew mweoi repwene moawun fengaen.

11 Epwene yor fanemwar tettemoag, me naengeta, me semwaai temoag me oanongaen pwiuneoi; epwene yor mini ariuriu me aemmesag ittiw me weeinaaeng.

12 Ina rhag nge wenimmwaen minikkeei epwene wen, ina repwene torofigaemi nge ra aewwaeiraesigaemi; ra pwigigaemi noa noan wutteer Jews pwe oawpwene noa apwiung iwe nge oawnoa kanepwus; repwene pwigigaemi wenimmweer *king* me soamwoon pwe faaen itaei.

13 Nge a ieei oaton aaemi oawpwe aepesa Kkepas Mwamwaai we.

14 Oawpwe fasiun oamoannatae neetipaemi pwe oawsoapw aiunaengiy aaemi noa saeneti-gaemi,

15 pwe ngaang ipwe ngaennegaemi mwaeniaemi me repiaemi nge esooar erhai rhooan kkoapwutomi epwe mmwen epwe appaniuwaeni aere paniuwaeni mwaeniaemi.

16 Aaemi ina inaemi me semaaemi, pwiimi, perhaengiyaemi, me maereyaeremi, minne repwe fangenoa aaemi. Nge aamweoi aaemi ina repwene nigaemi noa.

17 Oanongeer aeremas nge repwene oapwutae-gaemi noa pwe faaen itaei.

18 Ina rhag ina eyaen mwo aennirhimwemi nge esoapw ppiung noa.

19 Oaw oarhorho, nge ina nge oawpwe menaw.

*Jesus a Aepesa Wunuunun Ffeir Noan Jerusalem  
(Mat 24.15-21; Mark 13.14-19)*

20 “Iginde oawpwe weriir sonotaw aar pwaeni-aeniy noa Jerusalem, ina nge oawwa giuneei pwe a arap oaton aan epwene ffeir noa.

21 Iwe rhooawe reno Judea repwe fattapwetae weei rhug; rhooawe reno nee aepinoamw repwe siusaengi, rhooawe reno neman nge resoapw it-tiw no nee aepinoamw.

22 Pwe ikkinaan raaenin kena raaenin aegaere-gaer, nge minikkeei epwe pwaeritae minikkiwe mwaeniaen Pwapwior we e Santus e aepesa.

23 Epwe ifa mwo aar affayeo rhoopwut pwoopwo me ikka renayigit noan oaton naan! Temoagon aewwaeiraes epwene itto weni faniuw, nge aen Deus aegaeregaer epwene itto wooar aeremas kaan.

24 Aaemweoi repwene mae wooan saeitan nge aaemweoi repwene pwigiir noa wooan aekkaaemweoi faniuw; nge re Gentiles ina repwene itto pwuraegraeg wooan Jerusalem toori aan moanno noa minna oatoor.

*Itton Mwaaen we Naiun Aeremas  
(Mat 24.29-31; Mark 13.24-27)*

25 “Epwene yor eew aeginn epwene wen ngaeni aenet me meram me fiu. Nge wooan soanop nge towunepaen faniuw repwene maegin no noan aewwaeiraes, repwene mesagiu piungpiungiun noa me pwuurtaen saaet.

26 Aeremas repwene niyoarorhrorh reen aar mesag noan aar wetiwet ngaeni meeta epwe wen ngaeni faeinaengiy, pwe minikkena mae-maewaen noan naaeng repwene mwagiut saengi nenieer.

<sup>27</sup> Noan oatonaan nge miniwe Naiun Aeremas epwene pwaeto me noan naengemaan reen maemaewan me nningen.

<sup>28</sup> Oatona epwe wen minikkeei, nge oawwa iutae nge oawwa saeregi tae rhimwemi, pwe menewaemi ina a arapeto.”

*Fenaiun Waniwan e Fig*  
(*Mat 24.32-35; Mark 13.28-31*)

<sup>29</sup> Jesus a aengaeniir fioangon awewe een: “Oaw maengiy efoarh waniwan *fig* me oanongaen waniwan kkewe aaemweoi.

<sup>30</sup> Nge oawpwe weri minikkenena rheon pwe a pwiugiuw wow, oawwa giuneei pwe a arapeto neraeg.

<sup>31</sup> Epwan ieei rhag taeppen, igine oawweri minikkeei pwe a wen, ina nge oawwa giuneei pwe arapeto minna Mweoiun Deus.

<sup>32</sup> “Ennetaen, ipwe aengaenigaemi pwe oanongaen minikkeei nge epwe wen weni mmwaen iga aeremesaen igina repwe maenoa.

<sup>33</sup> Naaeng me soanop repwe soapwonoa, nge aaei kkepas esoapw soapwonoa.

*Oaw Aefaennigaemi*

<sup>34</sup> “Oaw aefaennigaemi pwe oawte igin gupwun me oappwunaas me aaemi aiunaengiy menaen menaw eei, nge epwe tooto raaenin naan nge epwe rhiuwen torofigaemi rhag

<sup>35</sup> taeppen iga oawyo noan taefirh. Pwe minneeii ina epwe wen ngaeniir oanongeer aeremesaen noan faeinaengiy.

<sup>36</sup> Ina oawpwe aefaennigaemi nge oawmaeipin noa rhag pwe epwe yor maemaewaemi noan oatonaan epwe wenewen minikkeei iwe me aemi noa iutae me wenimmwaen mwaaen we Naiun Aeremas.”

<sup>37</sup> Jesus aeni raaenin kkeei reen aan fenai noan *Temple* we, nge enoa nee oatofaaef, nge a noa woan rhugun *Olives*.

<sup>38</sup> Nee oatosor moawugowug nge oanongeer aeremas ra maegeto noan *Temple* we pwe repwe aiussaening ngaeni aan fenai.

## 22

### *Aar Rhiu Aenneewa Jesus*

*(Mat 26.1-5; Mark 14.1-2; John 11.45-53)*

<sup>1</sup> A arapeto oaton gupwunon fenoawa we esooar *yeast* reen, iwe regaen iura pwe *Passover*.

<sup>2</sup> Soamwoonin patere me sinsein anniug kkewe re mesagiur aeremas iwe ra kiukkiutta eew oat ne repwe niy noa Jesus noan mwoanomwoan.

### *Judas a Tipaeni Epwe Fangenoa Tinnimaen Jesus*

*(Mat 26.14-16; Mark 14.10-11)*

<sup>3</sup> Saetan a itinong nee tipaen Judas, pwan itan Iscariot, iwe erhai me neeiir rhoan kkayeo kkewe seig me riiurhai.

<sup>4</sup> Judas a noa mwaenieniy ngaeniir soamwoonin patere kkewe me soamwooniir poosun *Temple* we reen wunuunun aan epwe fang ngaeniir Jesus.

<sup>5</sup> A gacch neetipeer rhoawe iwe ra iura pwe repwene fang senaapiy reen miniwe epwene feeri.

<sup>6</sup> Judas a tipieew ngaeni miniwe iwe a rhaepetae aan kiukkiutta eew oaton ne egacch pwe epwe fangenoa menewaen Jesus nge aeremas resoapw giuneei.

*Jesus Oamoannatae pwe Epwe Mwongo Mwongoon Passover*

*(Mat 26.17-25; Mark 14.12-21; John 13.21-30)*

<sup>7</sup> A itto raaenin gupwunon fenoawa we esooar yeast reen, igiwe regaen ninni *sheep* pwe mwongoon *Passover*.

<sup>8</sup> Jesus a fangenoa Peter me John a aengaeniir pwe, “Oawnoa oamoannatae mwongoon *Passover* we aarh.”

<sup>9</sup> Ra aeineow pwe, “Iya iga wo mwerhaen pwe aeipwe noa oamoannatae me ee?”

<sup>10</sup> A paniuwaeniir pwe, “Oawitinong neeaepinoamw, nge erhai mwaaen na epwe pweipwog ruumen rhaan ina epwe itto rhuungigaemi. Oawwa tapweei noa noan iimw na epwe noa toonong noan,

<sup>11</sup> nge oawwa aengaeni mwaaen na imwan iimw naan pwe: ‘Sinsei e aeineo ngaeniug pwe, Ifa sengkin na rhoan kkayeo kena naeyi me ngaang aeipwe mwongoon *Passover* me ee?’

<sup>12</sup> Ina epwene pwaeri ngaenigaemi eew sengkin faeregiti ina wooan tae, ina efasiun moannotae noan, nge ina igina oawpwene noa oamoannatae me ee.”

<sup>13</sup> Ra noa rhoawe ra noa weri pwe oanongaen minikkewe Jesus e aengaeniir nge ewen ngaeni, iwe ra noa oamoannatae mwongoon *Passover* me ee.



*Aaen Soamwoon Mwongoon Faaef*

*(Mat 26.26-30; Mark 14.22-26; 1 Cor 11.23-25)*

<sup>14</sup> Enoa toori oatowe nge Jesus a moaat tiw reen *table* we reer oapostonus kkewe naiun.

<sup>15</sup> A aengaeniir pwe, “A igin noa tipaei pwe sipwe aeni fengaenniy mwongoon *Passover* eei wenimmwaen aaei ipwe toonong noan aaei aewwaeiraes!

<sup>16</sup> Pwe ipwe aengaenigaemi pwe, isoapw rhiuwen mwongonoa mwongo eei toori oatona epwe pwae noa oanongaen minna faan minna mwongoon *Passover* me noan minna Mweoiun Deus.”

<sup>17</sup> Iwe Jesus a pwiigi eew kkap, a fang aan aerhigerhig ngaeni Deus, nge a iura pwe, “Oawpwiigi minneen pwe oawpwe amakkiu fengaenniy woami.

<sup>18</sup> Ipwe aengaenigaemi pwe saengi igina a noa nge isoapw iun no *wine* een toori tooton minna Mweoiun Deus.”

<sup>19</sup> Iwe a pwiigi fenoawa we a fang aan maeipinen aerhigerhig, iwe a giniiy nge a ngaenneer nge a iura pwe, “Ieen minne oanongaei, iye ipwene fangenoa pwe aegin aaemi. Oawpwe feeori minneen pwe ipwe gaen memmaeng ngaenigaemi.”

<sup>20</sup> Pwan taeppen rhag miniwe efeeri igiwe a noa moanno noa mwongo we nge pwiigi kkap we nge a iura pwe, “Ieen miniwe kkepaen ppwon ffeo we aaen Deus iye reen minne cchaei, iye epwene nipinoa pwe aegin aaemi.

<sup>21</sup> “Iwe nge oawpipiiy! Pwe mwaaen we epwe fangenoa tinnimaei iye eno reei oaron *table* eei!

<sup>22</sup> Mwaaen we Naiun Aeremas ina epwene mae noa noan aaen affeoor Deus, iwe nge ifa mwo

aenneewan ngaeni mwaaen na e fangenoa tinni-maen!”

<sup>23</sup> Iwe rhag nge ra maegetae aeiineo fengaan wooar iyo erhai neeiir na epwe mmwenen feeori minnee.

### *Aengiingin Iyo na e Taegias*

<sup>24</sup> Rhooa kkayeo kkewe ra itto aengiingi fengaan wooar iyo na oarosaen taegias.

<sup>25</sup> Jesus a aengaeniir pwe, “*King* kena soamwooniir re Gentiles ina eyor maemaeweer wooar, iwe nge iir soamwoon kaan nge iir minne reiura pwe ‘iir maereyaereer aeremas.’

<sup>26</sup> Nge aaemi esoapw ieei wusumi; oawpwe faer feeori pwe iyo na oarosaen taegias epwe faer weer rhag maan wonigaet, nge soamwoon repwe weer rhag rhooan akkiuneo.

<sup>27</sup> Iyo na oarosaen taegias, manna emooat tiw pwe epwe mwongo aere manna e inet mwongo? Manewe emooat tiw minna e taegias. Ngaang iye ino neemi nge ngaang minne i inet mwongo.

<sup>28</sup> “Oawwa nonno reei noan oanongaen aaei waeiraes;

<sup>29</sup> nge eweei rhag igiwe manewe Semaiei a ngaenneaei maemaewaei pwe ipwe nemenem, nge ngaang ipwe pwan ngaennegaemi iiy maemaewaei.

<sup>30</sup> Aaemi oawpwe mwongo me iun me reen *table* eaeinoa minna Mweoiuy, iwe nge aaemi oawpwe mooat wooan minikkaena nenieer soamwoon oawpwe nemaeniir aeinang kkewe seig me ruwowu ikkiwe aae Israel.

*Jesus e Aepesa Aaen Peter Iura pwe Ese Giuneei  
(Mat 26.31-35; Mark 14.27-31; John 13.36-38)*

<sup>31</sup> “Simon, Simon! Aiussaening! A fasiun saene-taeg pwe Saetan epwe soatonigaemi, pwe epwe aeyimweoiuw noa rhooa mwamwaai me rhooa aenneew, taeppen rhag iga rhooran maat regaen aeyimweoiuw noa *wheat* saengi peeon.

<sup>32</sup> Nge ngaang i maeipinoag een Simon, pwe oamw niugiuniug esoapw ppiung noa. Nge oatonoa wopwe noa toagun ngaeniaei nge wa aemaewaar rhooa kkomwu pwiimw.”

<sup>33</sup> Peter a panuwaeni pwe, “Soamwoon, ngaang iya oamoannatae ipwe tapweog reen kanepwus me oamw mae!”

<sup>34</sup> Jesus a iura pwe, “Iaengaeniug Peter, pwe esoapw keokkeok maniug neepwongiy toori oatona wopwe iura faaen enuuw pwe wose giuneei.”

*Pwetoaw, Tutu, me Saeitan*

<sup>35</sup> Jesus a aeiineeor rhooran kkayeo kkewe naiun pwe, “Oatowe i aefengaegaemi noa nge esooar aaemi pwetoaw, tutu me nokka, nge eyor minne esooar reemi?”

Ra panuwaeni pwe, “Esooar mwo.”

<sup>36</sup> Jesus a iura pwe, “Nge igina, iyo eyor aan pwetoaw aere tutu nge epwe pwigi; nge iyo esooar naiun saeitan, epwe chuwaiuw noa mengaagiun pwe epwe meoni efoarh saeitan.

<sup>37</sup> Pwe ipwe aengaenigaemi pwe Pwapwior we eSantus eiura pwe, ‘Iiy ina a pwan aeffitaeg ngaeniir rhag rhoakkena re aenneew,’ ina epwe

nnetaen wen ngaeniaei, pwe iga minikka kkepe-saei ikka efoatofloat nge ikka a pwae noa pwe ennet.”

<sup>38</sup> Rhooan kkayeo kkewe ra iura pwe, “Emwaeri! Soamwoon, riiufoarh saeitan ikka!”

Nge iya iura pwe, “A toaw!”

*Jesus a Maeipin Wooan Rhugun Olives*  
(*Mat 26.36-46; Mark 14.32-42*)

<sup>39</sup> Jesus a nigiti aepinoamw we nge a noa ngaeni miniwe rhugun *Olives*, igiwe efasium gaen noa e, nge rhooan kkayeo kkewe ra pwan tapweei noa.

<sup>40</sup> Igiwe ra toori pwiuneoi we, nge a aengaeniir pwe, “Oawmaeipin pwe oawte ppiungiunong noan sessoat.”

<sup>41</sup> A nigitiir iwe a sooar mwet taaw saengiir egius, a noa foatotiw pwe a maeipin.

<sup>42</sup> A iura pwe, “Semaiei, aere womwerhaen nge wa arhiuwa saengiaei kkepaen waeiraes ee. Nge soapw minne tipaei, pwe minna tipoamw minna epwe mmwen.”

<sup>43</sup> Erhai angkenus naaeng a itto reen a itto aemaemaewa tae.

<sup>44</sup> Noan aan igin waeiraes egius mwo nge eaetemaegin reen aan maeipin, moaniyoanon e ssopwetiw nee ppweon nge a weei rhag sossopwun ccha.

<sup>45</sup> Enoa iutae me reen maeipin, a sefaaen noa reer rhooan kkayeo kkewe naiun nge a noa weriir pwe ra maiur, ra gin mmaniuniu reen aar nee tip cchoaw.

<sup>46</sup> A aengaeniir pwe, “Meeta oawwa maiur reen? Oaw rhimwitae oawwa maeipin pwe oawte ppiungiunong noan sessoat.”

*Aar Torofi Jesus*

*(Mat 26.47-56; Mark 14.43-50; John 18.3-11)*

<sup>47</sup> Jesus erhiuwen mwaenieniy nge a noa itto eew pwuwaen aeremas, Judas minne emmweer, iwe erhai me neeiir rhooawe seig me riiurhai a war. A itto reen Jesus a itto faeisongei.

<sup>48</sup> Nge Jesus a iura pwe, “Judas, faeisong mwu oamw minimwu wopwene fangenoa tinnimaen Naiun Aeremas reen?”

<sup>49</sup> Oatowe rhooran kkayeo kkewe reno reen Jesus ra giuneei miniwe epwene wen, nge ra aeiineow pwe, “Soamwoon, aeipwe mmwenen nainai saeitan kka naimaem?”

<sup>50</sup> Erhai me neeiir e pwiigi fena rhooran akkiuneo we naiun Soamwoonin Patere iwe gopiy noa peig mwaanen saeningan.

<sup>51</sup> Iwe nge Jesus a iura pwe, “Iug noa, a gacch nepaen!” A geotteopa saeningaen mwaaen we iwe a gacch noa.

<sup>52</sup> Jesus a aengaeniir rhooawe soamwoonin patere me soamwooniir poosun *Temple* we me mwaaen tugufaeyi kkewe reitto pwe repwe itto torofi, “Meeta oawnoa itto faaen saeitan me soapwon irae reen, pwe iga aetae ngaang erhai man mwoarho?”

<sup>53</sup> Inonno reemi oanongaen raaen noan *Temple* we, nge esooar aaemi torofiaei. Iwe nge igina minne a oatomi, pwe iga maemaewaen pwoong roorh a nemenem.”

*Peter a Iura pwe Ese Giuneei Jesus*

*(Mat 26.57-58, 69-75; Mark 14.53-54, 66-72; John 18.12-18, 25-27)*

54 Ra torofi Jesus ra pwigi noa noan iimw we imwaen Soamwoonin Patere; nge Peter epwan tettapweer to me itaaw.

55 Effooan eew aengaet noan wororaen iimw we, nge Peter a itto mooat tiw oaroor rhoaawe referoangoroangei noa aengaet we.

56 Igiwe erhai rhoapwut rhoan engaang a weri pwe emooat oaron aengaet we, a fan wewen ngaeni nge a iura pwe, “Pwan mwaaen een nge rhoaniuwaen Jesus!”

57 Nge Peter eiura pwe, “Rhoapwut mwuun, ngaang ise giuneei mwaaen na!”

58 Ese mmwaei mwo nge erhai mwaaen a pwan weri Peter nge a pwan iura pwe, “Pwan een erhai rhoaniuwan!”

Nge Peter a iura pwe, “Mwaaen mwuun, soapw ngaang!”

59 Epwe eew awa me mwirin nge erhai mwaaen a pwan kkepas ngaeni pwe, “Ennetaen pwe mwaaen een rhoaniuwaen Jesus, pwe iga iiy pwan erhai re Galilee!”

60 Peter a panuwaeni pwe, “Mwaaen mwuun, ise giuneei meeta mwu wo iyaekkepesa!”

Iwe rhag nge igiwe erhiuwen mwaenieniy nge a keokkeok noa maniwug we.

61 Soamwoon a wegitaeg a fan wewenei Peter, iwe nge Peter a maengiy meeta we Soamwoon e aengaeni, “Wenimwaaen epwe keokkeok maniwug neepwongiy, nge een wopwe aepesa faaen enuw pwe wose giuneaai.”

62 Peter a toowow a igin noa saeng.

*Ra Aeni Aegekkaei Jesus Nge re Wirhiy  
(Mat 26.67-68; Mark 14.65)*

<sup>63</sup> Mwaaen kkewe re posuw Jesus ra aeni fetae-  
neei aegekkaei nge re wirhiy.

<sup>64</sup> Ra pwaniuw noa mesan nge ra aeiineow pwe,  
“Aegina! Iyo we e wirhiug?”

<sup>65</sup> Egin towunap kkepas aenneew kka repwan  
aengaeni.

*Jesus a Noa Weni Mmwaen Council  
(Mat 26.59-66; Mark 14.55-64; John 18.19-24)*

<sup>66</sup> Enoa itto raaenin we, nge tugufaeyi me soam-  
woonin patere me sinsein anniug ra mwiirh fen-  
gaen, nge ra pwigito Jesus me weni mmweer.

<sup>67</sup> Ra aengaeni pwe, “Aengaenigemaem, een  
minne Kristus?”

A panuwaeni, “Aere i aengaenigaemi nge oaw-  
soapw niugiuniug ngaeniaei;

<sup>68</sup> iwe aere i aeiineogaemi eew kkepas aeyeg,  
oawsoapw panuwaeni.

<sup>69</sup> Iwe nge saengi igina a noa, miniwe Naiun  
Aeremas epwene mooat peig mwaaenen Deus na  
oarosaen maemaew.”

<sup>70</sup> Ra maegin iura pwe, “Ina nge een minne  
Naiun Deus?”

Nge a panuwaeniir, “Aaemi minimwu oaw iura  
pwe ngaang.”

<sup>71</sup> Ra iura pwe, “Esooar no ne sirhiuwen weti  
pwe epwe itto pwaeritae aenneewan! Giirh  
woan oanongarh nge sia rongorong miniwe  
eiura!”

## 23

### *Jesus me Weni Mmwaen Pilate*

*(Mat 27.1-2, 11-14; Mark 15.1-5; John 18.28-38)*

<sup>1</sup> Rhooa towunap we ra maegin iutae ra paeni-noa Jesus weni mmwaen Pilate,

<sup>2</sup> iwe a rhaepetae aar oaturu Jesus me ee: “Aemaem aeiweri mwaaen een pwe eotupwuur aeremas, egaen iura pwe resoapw fang *tax* ngaeni Soamwoonin Rome, nge epwan iura pwe iiy miniwe Kristus, iwe erhai *king*.”

<sup>3</sup> Pilate a aeiineow pwe, “Een minne aar *king* re Jews?”

Jesus a paniuwaeni, “Een minimwu wo aepesa.”

<sup>4</sup> Pilate a aengaeniir soamwoonin patere kkewe me aeremas kkewe pwe, “Esooar meeta minne igiuneei pwe teren mwaaen een.”

<sup>5</sup> Nge ra egius mwo nge reangimaaw tae, “Reen aan fenai minne a rhaepiy tae fiow nepeteer aeremas me woan oanongaen Judea. Erhaepetae me Galilee iwe nge igina a toorito igei.”

### *Jesus Weni Mmwaen Eroles*

<sup>6</sup> Igiwe Pilate a rongorong minneei, nge a aeiweg pwe, “re Galilee mwaaen een?”

<sup>7</sup> Igiwe a pwae ngaeni pwe Jesus eitto me pwiuneoi we Eroles enemaeni, iwe a fangenoa Jesus reen Eroles, iwe iiy epwan no Jerusalem reen oatowe.

<sup>8</sup> Eroles a igin kker igiwe a weri Jesus, pwe igiwe a fasiun rongorong kkepessaen Jesus nge e tipaeni pwe epwe weri rhag me mweoiuwe. E tipaeni pwe epwe weri aen Jesus feori aekkaew kkeman.



<sup>9</sup> Iwe Eroles a aieyegiy Jesus aekkaew kkepas aieyeg, nge Jesus ese paniuwaeni.

<sup>10</sup> Soamwoonin patere kkewe me sinsein an-niug kkewe ra toonong nge ra aetemaeginiy pwe repwe oamonofitiy Jesus.

<sup>11</sup> Eroles me sonotaw kkewe naiun ra aeni aegekkaei Jesus iwe nge refeeri ngaeni aekkaew min aenneew; iwe ra iseni tae eew mengaag nning wooan iwe nge ra fang sefaaen noa reen Pilate.

<sup>12</sup> Noan raaenin we rhag nge Eroles me Pilate ra maereyaer noa; nge igiwe mmwan nge re aenneew fengaen.

*Ra Aettiweginiy Aaen Jesus Mae Noa*

*(Mat 27.15-26; Mark 15.6-15; John 18.39–19.16)*

<sup>13</sup> Pilate a faingi fengaenniir soamwoonin patere, me mwaaen kkewe me rhooa towunap we,

<sup>14</sup> nge a aengaeniir pwe, “Oaw pwigito mwaaen een reei nge oawiura pwe e oatupwuur aeremas. Igina iya pipiyy gacchiuw me igei nge esoar minne iweri pwe oawpwe oamonofitiy wooan.

<sup>15</sup> Eroles mwo nge esoar minne e oamonofitiy ngaeni, iwe a aesefaaenito reerh. Esoar meeta ne mwaaen een efeeri nge epwe mae reen.

<sup>16</sup> Iwe ipwene aengaeniir pwe repwene wirhiy nge ra saeneti noa.” [

<sup>17</sup> Noan oanongaen gupwunon *Passover* nge Pilate egaen saeneti noa erhai rhoaan kanepwus ngaeniir aeremas.]\*

<sup>18</sup> Rhoaanap we ra aekkepwas rhag pwe, “Niiy noa! Saeneti ngaenigemaem Barabbas!” (

---

\* **23:17** Petenan eei nge esoano noan aekkaew petenan kka efoatfoat noan kkepessaen Greek.

19 Barabbas e kanepwus reen aan aeffiowuur aeremas noan aepinoamw we me aan nni menaw aeremas.)

20 Pilate emwerhaen epwe saeneti noa Jesus iwe a pwan tingoar sefaaen ngaeniir pwuwa we.

21 Nge iir ra faer aekkepwas sefaaen pwe, “Kurusuw noa! Kurusuw noa!”

22 Aeinuwaen aaen Pilate kkepas ngaeniir a iura pwe, “Meeta monofit na efeeri? Ngaang esooar minne iweri pwe efeeri ne sipwe niy noa reen! Ipwene aengaeniir pwe repwe wirhiy nge ra saeneti noa.”

23 Nge iir egius mwo nge re aekkepwas temoag tae pwe repwe kurusuw noa Jesus, enoa oarosan noa nge ina miniwe ra feeri.

24 Iwe Pilate a feeri ngaeni Jesus meeta we aar aeremas tingoar.

25 Pilate a saeneti noa mwaaen we retipaeni, iwe re kanepwusa pwe e aeffiow aeremas me nni menaw aeremas, nge Jesus a iseni ngaeniir pwe repwe feeri ngaeni minna retipaeni.

### *Ra Kurusuw Noa Jesus*

*(Mat 27.32-44; Mark 15.21-32; John 19.17-27)*

26 Sonotaw kkewe ra paeninoa Jesus, igiwe ra feffaeraeg noa, ra rhuungi erhai re Cyrene itan Simon iwe eitto saengi eew soapw. Ra torofi iwe ra ngaettae kurus we woan, nge ra feeri pwe epwe aiufera kurus we me mwirin Jesus.

27 Eew pwuwaen aeremas towunap ra tettaapwei noa mwirin; aekkaerhai rhoapwut reno neeiir ra saengiti.

28 Jesus a wegitaeg ngaeniir nge a aengaeniir pwe, “Rhoapwuton Jerusalem! Oawsoapw

saengitiaei, pwe oawfaer saengiti gaemi me aetekkomwu naimi.

<sup>29</sup> A ikkitto raaenekena aeremas repwene iura pwe, ‘Ra wenepwu rhoopwut kkena esooar nai-iur, esaaen yor mwo aar nainai, nge esaaen yor mwo aar atiut!’

<sup>30</sup> Ina oatona aeremas repwene aengaeni rhug pwe, ‘Piungtiw woamaem!’ nge re aengaeni taeiit pwe, ‘Opaegemaem!’

<sup>31</sup> Pwe ngaere minikkeei a wenewen iga erhiuwen arawaraw waniwan, nge epwe ifa wusun igine a ppwass?”

<sup>32</sup> Riiurhai mwaaen, rhooran kanepwus, ra pwan paeniir wow repwe noa niir noa me reen Jesus.

<sup>33</sup> Renoa itto reen pwiuneoi we regaen iura pwe “Peopeoi Rhimw”, ra itto kurusuw noa Jesus me ee, fengaen me rhooran kanepwus kkewe riurhai, erhai me peig mwaaenin nge erhai me peig rhoopwuton.

<sup>34</sup> Jesus a iura pwe, “Semaiei, oamwusaar noa! Rese metaf reen minikka refeeori.”

Re aekkaerh *dice* pwe repwe inetiy minikkewe mengaagiun wooar.

<sup>35</sup> Aeremas ra iun oawruru soamwooniir Jews kkewe ra gaen aeni fetaeneei aegekkaei: “A aemewenaar aemweoi; iwe nigiti ngaeni epwe aemewenaar oanongan ngaere ennetaen pwe iiy Kristus we Deus e fini!”

<sup>36</sup> Sonotaw kkewe ra pwan aeni fetaeneei aegekkaei: ra itto reen ra ngaenneei *wine* kkewe emwaenn,

<sup>37</sup> nge ra iura pwe, “Aemenewa oanongoamw ngaere ennetaen pwe een soamwooniir Jews!”

<sup>38</sup> Wooan tae rhimwen nge effoat pwe: “Ieen minne Kingaen Jews.”

<sup>39</sup> Erhai me neeiir rhoan kanepwus kkewe e kurus a gaen aessaewa pwe: “Saapw een miniwe Kristus? Aemenewoag nge wa pwan aemenewaegemaem!”

<sup>40</sup> Nge mwaaen we erhai a soong ngaeni a iura pwe, “Wose mesagiu Deus? Oamw mae epwan aeffitaeg ngaeni rhag aan.

<sup>41</sup> Iwe nge giirh ina efin pwe sipwe kurus pwe paniuwaen aenneew kena giirh sifeeri; nge iiy esooar min aenneew ne efeeeri.”

<sup>42</sup> Iwe nge a aengaeni Jesus pwe, “Maengiaei, Jesus, igine wopwene noa itto noan nemenem na oamw!”

<sup>43</sup> Jesus a aengaeni pwe, “Iya ppwoneei ngae-niug raaeneei pwe een wopwe no reei noan Paradise.”

### *Maeanoan Jesus*

*(Mat 27.45-56; Mark 15.33-41; John 19.28-30)*

<sup>44-45</sup> Saengi nuginupaen oanowas nge aenet esa ttin no nge a rorhappiung noa faniuw we enoa gona enuw konook; iwe nge mengaag we etteoraeg noan *Temple* we mwo nge a taeringatiw faaen ruwowu. <sup>46</sup> Jesus a aekkepwas noa nge a iura pwe, “Semaiei! Iya iseni nong minne ngeoniuy noan poawumw!” Eiura rhag minneei nge a nurh noa aan ngasangas.

<sup>47</sup> Soamwoonin sonotaw we eweri miniwe a wen, iwe a aepingepinga Deus, nge iwe a iura pwe,

“Ennet pwe erhai aeremas mwamwaai mwaaen we!”

<sup>48</sup> Igiwe aeremas kkewe re maegeto pwe rhoaan oawruru miniwe a wen, igiwe ra weri, ra sefaaen noa neeiimw, nge ra tugutuguw aiungeer reen aenneewaen tipeer.

<sup>49</sup> Oanongeer rhooa kkewe regiuneei Jesus, fengaen me rhoopwut kkewe retapweeito me Galilee, renoa iun oawruruto me itaaw.

### *Paeyinoan Jesus*

*(Mat 27.57-61; Mark 15.42-47; John 19.38-42)*

<sup>50-51</sup> Eno erhai mwaaen itan Joseph iwe re Ari-mathea, eew aepinoamw me noan Judea. Iiy erhai mwaaen mwamwaai nge essoar, e wewweti rhag itton minna Mweoiun Deus. Inamwo igiwe iiy erhai rhoaan *Council* we, nge ese tipieew ngaeni niunniuwaen we aar me miniwe ra feeori.

<sup>52</sup> A noa reen Pilate nge a noa tingoar miniwe oanongaen Jesus.

<sup>53</sup> A noa pwinititiw miniwe oanongaen nge a tiugiumi noa noan mengaag pwerh we, nge a oawnanong noan paeyi we iwe ekken wow neeiin faai, iwe esaaen yor mwo manimae ne etonong noan.

<sup>54</sup> Wooan Aenimowu miniwe, a gin egius rhag nge epwene itto Sabbath.

<sup>55</sup> Rhoopwut kkewe retapweei mwirin Jesus me Galilee ra tapweei noa Joseph ra noa weri paeyi we me wunuunun aaen miniwe oanongaen Jesus won noan.

<sup>56</sup> Ra sefaaen noa neeiimw ra noa oamoannatae aar waningas me neoningas pwe repwe noa aepiti miniwe oanongaen Jesus.

Wooan Sabbath ra aseoseo, pwe ina miniwe e foatofaat noan Anniug we.

## 24

### *Aaen Jesus Menaw Sefaaen*

*(Mat 28.1-10; Mark 16.1-8; John 20.1-10)*

<sup>1</sup> Sunday nee oatosor moawugowug nge rhoopwut kkewe ra mwet noa reen paeyi we, nge repweipwog noa neoningas kkewe reoamoannatae.

<sup>2</sup> Ra noa weri fai we pwe a mwagiut saengi aesemaen paeyi we,

<sup>3</sup> iwe ra toonong noan paeyi we; nge rese rhuungi miniwe oanongaen Soamwoon Jesus.

<sup>4</sup> Ra riu reen meeta we a wen, iwe rhag nge riiurhai mwaaen igin maretin mengaagiur ra iu me oaroor.

<sup>5</sup> Reen aar igin mesag, rhoopwut kkewe ra foatotiw nee ppweon, nge mwaaen kkewe ra aengaeniir pwe, "Meeta faan aaemi giutta mwaaen e menaw me neeiir rhooa mae reen?"

<sup>6</sup> Esa nono igeei; a menaw sefaaen tae. Oawmaengiy meeta we eaengaenigaemi igiwe eno noan Galilee:

<sup>7</sup> "Mwaaen we Naiun Aeremas ina epwene toonong neepaiur rhooa monofit, repwe kurusuw noa, nge mwirin enuuw raaen epwe menaw sefaaen tae."

<sup>8</sup> Iwe nge ra maengiy noa meeta kkewe Jesus e aepesa,

<sup>9</sup> ra sefaaen saengi paeyi we, ra noa fioangei ngaeniir rhooawe seig me erhai rhoaan kkayeo me pwan oanongeer rhooawe aaemweoi.

10 Rhoopwut kkewe iwe Maria Magdalene, Joanna, me Maria we inaen James; iir me rhoopwut kkewe aemweoi ra aengaeniir oapostonus kkewe minikkewe a wen.

11 Nge oapostonus kkewe ra maengiy pwe meeta we rhoopwut kkewe reaepesa nge min ffeoretæ rhag, iwe rese niugiuniug ngaeniir.

12 Nge Peter a iutæ rhag nge a fattapw noa reen paeyi we; a pwoarotiw nge a weri pwe a mengaag kkewe rhag. Iwe a mwet sefaaen noa neeiimw nge a mwaar reen meeta we a wen.

### *Faaeraeg Ngaeni Emmaus*

13 Noan raaenin we rhag nge riiurhai mwaalen kkewe rhoaniuwaen Jesus ra faaeraeg ngaeni eew soapw itan Emmaus, iwe epwe fisuuw *miles* saengi Jerusalem,

14 iwe nge regaen mwaenieniy fengaen woor reen oanongaen meeta kkewe a wen.

15 Igiwe rekekkepas me fioangei minikkewe, nge Jesus a noa arapeto reer iwe a itto faaeraeg eew noa meyiir;

16 nge ra weri nge rese giuneei pwe Jesus miniwe.

17 Jesus a aengaeniir pwe, “Meeta mwu oawiyaepesa fengaenniy, woan aaemi feffaeraeg noa?”

Iwe ra iunoo, ra mas affayeo noa.

18 Erhai me neeiir, itan Cleopas, a aeiineow pwe, “Een rhag me neeiir waseona woan Jerusalem minne wose giuneei meeta kka a wewwen noan raaenin kkewe a noa?”

19 “Meeta kena?” a aeyeg.

Ra paniuwaeni pwe, “Minikkewe ewen ngaeni Jesus re Nazareth we. Mwaaeneei nge erhai profeta, iwe Deus me oanongeer aeremas nge regiuneei pwe eyor maemaewan noan oanongaen meeta kka e iura me feeori.

<sup>20</sup> Soamwoonin patere me mwaaen kkewe aarh ra fangenoa pwe repwe noa niyy noa, iwe me kurusuw noa.

<sup>21</sup> Nge aeiya iseni aemaem aepiniugiuniug woan pwe iiy minne epwene saeneti noa Israel me noan aenneew! Nge soapw ina rhag, pwe a enuuw raaen mwirin aan wen minikkewe.

<sup>22</sup> Aaemweoi rhoopwut kkewe rhoaniuwarh minne reariugemaem; renoa reen paeyi we nee oatosor moawugowug,

<sup>23</sup> nge rese weri miniwe oanongan. Ra sefaaeneto nge ra iura pwe aaemweoi angkenus repwae ngaeniir nge ra aengaeniir pwe iiy a menaw sefaaen tae.

<sup>24</sup> Aaemweoi aemaem ra noa reen paeyi we nge ra noa weri pwe oanongaen meeta kkewe rhoopwut kkewe re aepesa nge ennet, pwe rese weri minna oanongan.”

<sup>25</sup> Iwe Jesus a aengaeniir pwe, “A ifa mwo pwurhomi, me mmwaeyin aaemi niugiuniug ngaeni oanongaen meeta profeta kkewe re iura!

<sup>26</sup> Pwe esoapw faer ieei wusun aaen Kristus waeiraes reen minikkeej weni mmwaen aan noa toonong noan minna nningen?”

<sup>27</sup> Iwe Jesus a aemmetefa ngaeniir meeta kkewe kkepesan me noan oanongaen Pwapwior we e Santus, rhaepetae me noan mini pwapwioron Moses me oanongaen minikkewe foatogieer pro-



feta kkewe.

<sup>28</sup> Igiwe ra arapeto reen soapw we refaeraeg ngaeni, Jesus a feori pwetae epwe faaeraeg saengiir;

<sup>29</sup> nge iir ra ammwarhiu sefaaeniy, ra iura pwe, “Notiw remaem, epwene oaropaen pwoong nge iye a rorhappiung noa.” Iwe a toonong pwe epwene notiw reer.

<sup>30</sup> Iwe a mooat tiw pwe epwene mwongo reer, a pwigi fenoawa we, nge a maeipina; a giniiy fenoawa we nge a ngaenneer.

<sup>31</sup> Iwe egius mwo nge eppwun noa meseer nge ra giuneei pwe iiy, iwe rhag nge e soano saengiir.

<sup>32</sup> Ra iura fengaenniy pwe, “Meeta ese weei rhag ppwunon aengaet me noan tiparh, igiwe emwaenieniy ngaenigirh me wooan ennap reen aan aemmetefa ngaenigirh meeta we e foatfoat noan Pwapwior we e Santus?”

<sup>33</sup> Ra iutae rhag ra noa Jerusalem, ra noa rhuungi rhoan kkayeo kkewe seig me erhai me rhooawe aaemweoi,

<sup>34</sup> ra iura pwe, “A menaw sefaaen Soamwoon! A pwae ngaeni Simon!”

<sup>35</sup> Rhooawe riiurhai ra itto floangei ngaeniir miniwe ewen me wooan ennap, me wunuunun aar giuneei pwe iiy Soamwoon igiwe a giniiy fenoawa we.

*Jesus a Pwae Ngaeniir Rhoan Kkayeo Kkewe Naiun*

*(Mat 28.16-20; Mark 16.14-18; John 20.19-23; Feof 1.6-8)*

<sup>36</sup> Oatowe rhoa kkewe riiurhai rerhiuwen mwaenieniy, nge Soamwoon erhiuwen iunoa

rhag me neeiir nge a aengaeniir pwe, “Oapoas epwe no reemi.”

<sup>37</sup> Ra igin mesag pwe ra maengiy pwe ra weri erhai aniu.

<sup>38</sup> Nge a aengaeniir pwe, “Meeta oawwa aiuraeg reen? Meeta oawtip mwaramwar fetaen reen?”

<sup>39</sup> Oawpipiyy paeyi me pirheei, pwe oawpwe weri pwe ngaang minneen. Oawgeotteopayaei, pwe oawpwe giuneei, pwe esooar aniu ne egaen yor fitigon me rhiun, nge oawpwe weri pwe eyor woai.”

<sup>40</sup> Igiwe e aepesa minneei nge a pwaeri ngaeniir paiun me pirheen.

<sup>41</sup> Nge iir resaaen niugiuniug rhag, reen aar igin kker me tip mwaramwar; iwe a aeiineeor pwe, “Eyor minne sipwe mwongo me igeei?”

<sup>42</sup> Iwe ra ngaenneei egiufet iig appwerh,

<sup>43</sup> iwe epwigi nge a aengi me wenimmweer aeremas kkewe.

<sup>44</sup> Iwe a aengaeniir pwe, “Ikkeei minikkewe ifasiun aengaenigaemi oatowe irhiuwen no reemi: oanongaen minikkewe effoat pwe wunuunuy noan Oasoapwosoapw we aen Moses, me minikkewe foatogieer profeta kkewe, iwe me noan pwapwioron Psalms nge epwe nnet.”

<sup>45</sup> Nge a sugi noa aar niunniuwaen pwe repwe metefaaegini oawton Pwapwior we e Santus,

<sup>46</sup> nge a aengaeniir pwe, “Ieen miniwe effoat: Kristus epwe affayeo nge a menaw sefaan mwirin eoniuraen,

<sup>47</sup> nge noan minna itan nge kkepas we kkepe-saen toagun saengi monofit iwe me sessaenin

monofit epwe fenaiuw ngaeniir oanongaen fanuiuw, epwe rhaepetae me Jerusalem.

<sup>48</sup> Aaemi rhoan pwaeritae oanongaen minikkeei.

<sup>49</sup> Iwe nge ngaang ipwene aefengatiw woami meeta we mwaaen we Semaiei eppwoneei. Nge aaemi oawpwe no rhag nee aepinoamw toori aan ittiw woami maemaew na woai naaeng.”

*Jesus a Noa Naaeng*

*(Mark 16.19-20; Feof 1.9-11)*

<sup>50</sup> A pwigiiir wow me noan aepinoamw we toori noa Bethany, igiwe a aetitae paiun nge a aepiniir noa.

<sup>51</sup> Nugunupaen aan aepiniir nge a nigitiir pwe a noa weei naaeng.

<sup>52</sup> Iir ra oassoara iiy nge ra sefaaen noa Jerusalem, reen aar igin kker,

<sup>53</sup> nge ra no rhag noan *Temple* we reen aar fang ngaeni Deus aan aerhigerhig.

**Pwapwior we e Santus**  
**Satawalese: Pwapwior we e Santus (New Testament)**  
copyright © 2024 Wycliffe Bible Translators, Inc.

Language: (Satawalese)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-03-11

---

PDF generated using Haiola and XeLaTeX on 18 Mar 2025 from source files dated 11 Mar 2025

6f137abd-4cdf-5de2-a1d6-1be1650a67b8